

HUANIYA ESOHUI QUEA PAME NEE TEHUE CANAJE JESOSA QUITOJA JUAN

*Eseyá Eyacuiñajji ba meeyá Jesosa Quito meshi
yasiijje poeyanaje ese jayojja yamiji*

¹ Yahuajo nei nei meshi, aquiana cuana, dejja pea'ai pana jjimahuajo, Jesosa Quito yaña tiiya poa Eyacuiñajji nijje. E'e, oya Eyacuiñajji nei neiya e'e jojo nei poa. ² E'e, oya Eyacuiñajji nijje yaña poa yahuajo nei nei meshi cuana, ojjaña aquiana cuana pana jjimahuajo. ³ Eyacuiñajjiya oya pana mee ca'ya poa aquiana, meshi cuanaya, dejja, epóna pea'ai, ojjaña pana ca'ya poa Jesosa Quito-hua. Ojjaña aquiana pana jjima jjemo, chama' pome. ⁴ E'e, oya, Jesosa Quito, yaña tiitiia poa. Ohuaya eseya Eyacuiñajji ba mee cani. Jama-jjeya ohuaya ba'e tiitii mee cani eseya cuana. Eyacuiñajjiyo quea ja'a jjashahuabaqui mee cani pea'ai. ⁵ Jamatii mecajje quea apo nee neejo cuaquijijiya jeaja'a cani. Jiquio ecua cuaquijiji mecajje jjinequiani jama jayojja Jesosaa dejja mimishi cuana quea ja'a nee jjashahuabaqui mee cani. Eshahuaa Jesosa Quito eseya jaahuana pajea mee sa acani. Chojja. Ohuaya ojaya epeejji cuana jaahuana tiitii cani. E'e, oya cuaquijiji quijjo'yo aija jama.

Huani, Sacaniaja bacua ejja

⁶ Oe dejja Jodea meshijo ba'e Huani bajjani Eyacuiñajjiya huoojea canaje Jesosa Quitojo huohuiya. ⁷ Eyacuiñajjiya Huani jama acanaje ba'a: —¡Poquicue miya! Ojjaña huohuiquicue jama ba'a: “Eyacuiñajjiya huoojea'yo ma cuaquijiji quijjo'yo ajja jayojja poeyani ojjaña cuana quea ja'a jjashahuabaqui meeya. Jamajjeya ¡onijke jjapeequicue!”

Jamajjeya Eyacuiñajjiya Huani huoojea canaje.

⁸ Oya Huani ma cuaquijiji jayojja jama pojjeama; oya ca ca oma oe poquinaje Jesosa Quitojo huohuiya, ma cuaquijiji jayojjajo huohuiya.

⁹ Eyacuiñajjiya Jesosa huoojea canaje meshi yasijje. Ohuaya ojjaña cuana quea ja'a jjashahuabaqui mee caje Eyacuiñajjiyo. ¹⁰ E'e, oya ma cuaquijiji jayojjaya poeyanaje dejja cuana nijje ba'eya. Yahuajo ohuaya meshi cuana, dejja cuana pea'ai pana ca'ya poa. Jamatii oya dejja cuanaja ba jjima ojjaña cuana pana'yojji epo. ¹¹ E'e, oya poeyanaje Jodea meshi yasijje, ojaya huapa pojjeama cuana huasijje. Jamatii oya cajaa acanaje beca cuaa: —¡Chojja, oya Eyacuiñajji bameejji pojjeama! —poso beca cuaa acanaje.

¹² Beca cuaa ca ca Jesosa Quitoja esohui sha-jja'ajja canaje. Ojo jama acanaje ba'a: —E'e jojo nei oya Eyacuiñajji ese bameejji poani —acanaje beca cuaa.

Jamaya jjashahuabaquianijo, Jesosaa oya cuana Eyacuiñajjiya bacua cuana po mee canaje jama ba'a: ¹³ Yahuajo eseja ejeajjiya eseveya jea ca poa; eseja enaesveya eseveya mejo ca poa. Jamajjeya eseveya cuayani ese ejjaja bacua, Eyacuiñajjiya bacua pojjeama. Eyacuiñajjiya ca ca eseveya oja bacua a

sa acanijo ohuaya ohuaye nei eseya oja bacua po mee cani.

Esohui quea bihui nee Jesosa Quitojo

¹⁴ Jamajjeya oya Eyacuiñajji ese ba meeya poeyanaje yamijji, ese cuana nijje ba'eya. Ecuanaa oya banaje quea ca'a nee nee. Oja Chiiya oya, oja Bacua Ejja oe nei quea ca'a nee huoojea canaje meshi yasijje ese cuana jaahuana tiitiiji. Ohuaya ojjaña Eyacuiñajji esohui e'e nei huohui canaje ojjaña huasijje pea'ai.

¹⁵ Huaniya ojo huohui canaje. Majoya oya ba majje taaaanje jama ba'a: —¡Bacue! Jjeya nei pea dejja quea pame nee poeje. Yahuajo nei nei e cuaya jjimahuajo oya yaña tiitiia poa Eyacuiñajji nijje. Jamajjeya oya quea ca'a nee nee; eya quea ca'a pishana —poanaje Huani.

¹⁶ E'e, eseya shajjama' poani. Jamatii ohuaya ojjaña cuana quea jea nee nee atiitii cani quea pame nee nee. ¹⁷ Yahuajo nei nei esohui huohuijji Moisesiya esohui Eyacuiñajji esohui eyacuiñajji cuana tehue majje ba mee ca'ya poa. Jesosa Quitohua, ma Eyacuiñajji huoojea'yo ojjaña jaahuanajjiya ca ca ojjaña cuana ba mee canaje Eyacuiñajjiya eseya cuana quea jea nee nee acani, ojaya esohui e'e nei ba mee cani pea'ai. ¹⁸ Eyacuiñajji Echii Ai jjacojja ba mee qui ajja tii. Jamatii oja Bacua Ejja oe nei Eyacuiñajji nei pea'ai, Eyacuiñajji nijje nequi, oja Chii nijje tii. Ohuaya eseya Eyacuiñajji ba mee cani, oja Chii.

Huaniya, ma ona besameejji poaniya huohui canaje Jesosa Quitojo

(Mateo 3.11-12; Macoso 1.7-8; Noca 3.15-17)

Huaniya, ma ona besameejji poaniya Betania cuiñajjijo, Jodana cuei ojje mijijje nequi, ojjaña cuana Eyacuiñajjijo besa mee canaje. ¹⁹ Jamajjeya Jenosanena cuiñajjijo ba'eya Jodio dejja etii cuaa Huani que huoojea canaje Eyacuiñaggi nijje emimijji cuana, Eyacuiñajjija equi jaahuanajji cuana pea'ai. Huani ba majje huohui'ajja canaje: —¿A'ya cuae mi so'o? ¿A'a miya Eyacuiñajjija huoojea'yo ojjaña jaahuanajji?

²⁰ —Chojja —saja'ame acanaje Huaniya—, chojja, eya Eyacuiñajjija huoojea'yo ojjaña jaahuanajji pojjeama. Eya ca ca iña Quito pojjeama —poanaje.

²¹ —Jamajjeya ¿a'ya cuae mi oe so'o? — huohui'ajja canaje—. ¿A'a miya Enia, Eyacuiñajjija esohui huohuijji yahuajo ba'ya poa?

—Chojja —saja'ame acanaje Huaniya—. Eya Enia pojjeama.

Jamajjeya huohui'ajja ca o'oyanaje cuaa jama ba'a: —E'e. Yahuajo Moisesiya huohui ca poa Eyacuiñajjija pea esohui huohuijji nei poeje. ¿A'a miya ma esohui huohuijji neiya?

—Chojja —Huaniya acanaje.

²² Jamajjeya Jodio cuaa Huani huohui'ajja ca o'oyanaje: —¿A'ya cuae mi oe? ¿A'ya cuae mi poani so'o, de? ¡Huohuicue mo oe! Jodio etii cuaa ecuana huoojea canaje mi baa. ¿Yajja huohuiñaqui'yome acuae oe aje o que poqui o'oya majje so'o?

²³ Jamajjeya Huaniya saja'a canaje jama ba'a: —Yahuajo nei nei Eyacuiñajjija esohui huohuijjiya Isaiaa ejo huohui ca poa jama ba'a:

“Quijje esohui huohuijji poeje esohui huohuiya. Meshi quimajo huohui huicha'a huicha'a

caje jama ba'a: "Emeshi mese nei poeje. ijamajjeya oe apoa pocuajicue! ijamajje o poeyajo, ojaya esohui quea ja'a nee shajja'ajja neinei'yocue!"

Jamaya aca'ya poa Isaiaa yahuajo —Huani poanaje.

²⁴⁻²⁵ Jamajoya ma Jodio dejja cuanaa Huani huohui'ajja ca o'oyanaje: —¿A'a e'e jojo nei miya Eyacuiñajjija huoojea'yo ojjaña jaahuanajji pojjeama? ¿A'a cuae mi Enia pojjeama, ma Eyacuiñajjija esohui huohuijji yahuajo ba'ya poa pojjeama so'o? ¿A'a cuae mi Eyacuiñajjija pea esohui huohuijji nei, ma ecuanaja etiquiaa ishoa'ajja caninaje pojjeama so'o? ¿Achajjajo acuaeaya oe miyaya ecuana, Jodio cuana, besa meeña Eyacuiñajjijo so'o? —poanaje cuana.

²⁶ Huaniya jama acanaje ba'a: —Eyaya miquianaya Eyacuiñajjijo besa meeña cuei enajo. Pea dejja jiquio tiijo nequi. Jjeya oya miquianajaya ba jjima. ²⁷ Oya quijje pishana miquianajaya eba poaje Eyacuiñajjija huoojea'yo ojjaña jaahuanajji. Oya ca ca oe nei quea ca'a nee nequi. Eya ca iña quea ca'a nee pishana. Jamajjeya aje oe eya Jesosa Quito cojja neijo nequi sa po ajja. Eya quea bicho, de.

²⁸ Jamaya poanaje Huani Betaniajo, Jodana cuei ojje mijijje nequi, ojjaña cuana Eyacuiñajjijo besa mee canijo.

Jesosa Quito Eyacuiñajjija huoojea'yo ojjaña cuanaja mimishijo mano'yohua

²⁹ Majoya mecahuajje Huaniya ojjaña huasi-jje esohui huohui ca o'oyanijo, Jesosa o que

poeyanaje. Huaniya Jesosa ba majje ojjaña cuana huohui neinei canaje jama ba'a: —¡Bacue oe, oya poeyani Jesosa, Eyacuiñajjija huoojea'yo! Oya manoje'yo ojjaña cuanaja mimishi cuijea'yojji. E'e, Eyacuiñajji nijje emimijji cuaa ñajjajja cuia majje Eyacuiñajji yasijke dahua cani oya mimishi cuanajo quene'ama epo meejji. Ñajjajja jayojja jama poaje'yo Jesosa; manoje'yo ojjaña cuanaja mimishi cuijea neinei'yojji —Huani poanaje—.

³⁰ E'e, yahuajo pishana eyaya miquianaya huo-huinaje ojo jama ba'a: Jjeya nei pea dejja quea pame nee nee poeje. Yahuajo nei nei e cuaya jjimahuajo oya yaña tiiya poa Eyacuiñajji nijje. Jamajjeya oya quea ca'a nee nee; eya quea ca'a pishana —Huani poanaje.

³¹⁻³³ —E'e, yahuajo oya ecuea ba jjima poa. Jamatii Eyacuiñajjiya e huoojea jjimahuajo huo-hui canaje jama ba'a: “¡Dejja cuana besa meecue enajje ej! Besa meeñaño, miyaya baje oe dejja. Ecuea Edojjoshahua Pame huia' jama ma dejja sapa biajje cuabesa ba'eje; jjapashineijje ba'eoqueje'yo. Maya ecuea ecue Bacua Ejja, ecue huoojea'yo. Ohuaya ojjaña miquiana que Edojjoshahua Pame dobiqui mee caje'yo, miquiana quea ja'a nee nee ejjashahuabaqui meejji” eya acanaje Eyacuiñajjiya —Huani poanaje.

—E'e, eyaya e'e jojo nei banaje jama ba'a: Eya Jesosa besa meeñaño, eyatahuatahua jjaca'apejoquinaje. Eyacuiñajjija Edojjoshahua Pame huia' jama o sapa biajje cuabesa ba'enaje. Jjapashineijje ba'eoquenaje. Jamajjeya jjeya oya ecuea eba nei nei, Jesosa. Yahuajo miquianajaya oya ba jjima. Jamajoya eya poeyanaje ojjaña

Eyacuiñajjijo besa meeya. Miquianaya oya Eyacuiñajjija huoojea'yo ojjaña jaahuanajji ba meeya eya poeyanaje pea'ai. ³⁴ Jamajjeya eyaya miquianaya huohui neineiaña: E'e jojo nei nei eyaya oya banaje. Jesosa ca ca oe e'e jojo nei Eyacuiñajjija Bacua Ejja oe nei —poanaje Huani Jodio cuana nijje.

Jesosaa iyaa canaje beca dejja onijke e'ani tiitiiji, o shajja'ajjajji

³⁵ Majoya mecahuajje Huaniya, ma ona besameejji poaniya jomajo, Jodana cuei sahuajo nequiya esohui huohui canaje oja epeeiji nijje, becanejjiji pe'a'i nijje. ³⁶ Jesosa jjayejjequiani ba majje Huaniya oja epeeiji cuana huohui canaje jama ba'a: —¡Bacue Jesosa! Oya Eyacuiñajjija huoojea'yo. Oya manoje'yo ojjaña cuanaja mimishi cuijea'yojji.

³⁷ Huanija esohui Jesosajo shajja'ajja majje oja epeeiji becanejjiji pe'a'i Jesosa nijje poquinaje. ³⁸ Jesosaa ejiojjije poquijeya Huanija beca epeeiji o quiquishiji poquije bajea canaje. Ba majje huohui'ajja canaje: —Epeeiji cuana, ¿ajeo miya enijke poeyani?

—Eshui huohuijji —saja'a canaje —, ecuana poeyanaje mi baa; mi shajja'ajja sa poani. ¿Achejo ba'e miya? —poanaje.

³⁹ —E'e —Jesosa poanaje —, ¡ocue poe'ajja! ¡Cua'a, enijke po'yocue!

Jamajjeya Jesosa nijje poquinaje equi yasijje, o ba'e yasijje. Onijke aninaje ma pojja, eshequi oquequiaj; o shajja'ajjajji po'yonaje oya cuana, ma bajjani ba'a: Anesi oja epeeiji nijje pea'ai.

⁴⁰ E'e, Anesi pea dejja nijje Huanija ehuohui sha-jja'ajja majje Jesosa nijje poquinaje. Anesi ca ca Simohuija echahua mese, ma quijje bajjani canaje Penoja echahua mese. ⁴¹ Jamajjeya mecajjeahua nei Anesiya oja o'i sa'ajja canaje. Ba majje huohui canaje: —O'i, eyaya Eyacuiñajjija huoojea'yo ese jaahuanajji banaje, Jesosa Quito.

⁴² Majoya Anesiya oja o'i Simohui bajjani Jesosa que dojo canaje. Simohui ba majje Jesosaa huohui'ajja canaje jama ba'a: —Epeejji, miya ecuea eba. Miya Huanija bacua ejja, Simohui bajjani. Eyaya miya bajjanije'yo ecuea esohuijo Sepa bajjani —poanaje. Jienoja esohuijo Peno bajjani canaje, Ese Ejjaja esohuijo Mei bajjani.

*Jesosaa iya canaje pea cuana onijje e'ani tiitiijji,
o shajja'ajjajji*

⁴³ Majoya mecahuajje, mecajjeahua nei Jesosa poquinaje Janinea meshi yasijje, Jodana cuei ojje miji yasijje. Poqui jehuaa Penipe ba canaje. Ba majje iyaa canaje: —Penipe, jocue poe'ajja, enijje pol'yocue; ecuea epeejji pol'yocue! — Jesosaa acanaje; o que poquiajo ojaya epeejji pojji aca'yonaje.

⁴⁴ Penipe, Peno, Anesi pea'ai ca ca oe Bete-saida cuiñajjijo ba'e. ⁴⁵ Jamajjeya Penipeya oja epeejji Natanaeni sa'ajjaqui canaje. Ba majje huohui canaje: —Ecuea epeejji, ecuanaa Eyacuiñajjija huoojea'yo ese jaahuanajji banaje. Ojo Eyacuiñajjija esohui huohuijjiya yahuajo nei nei ba'ya poaa, Moisesiya pea'aiya tehue ca poa, ma ojjaña Jodio cuaa ishoa'ajja caniya. Oya Jesosa bajjani, Joseja bacua ejja, ma Nasanena cuiñajjijo

ba'enaje. Eyaya maya banaje, de —poanaje Penipe.

46 —¿A'a oya Nasanenajo ba'enaje? Jomajo pa jjaja chama' dejja quea pame —poanaje Natanaeni.

—Chojja —poanaje Penipe —, ipoecue, oya bahuacue!

47 Jamajjeya oya cuana poquinaje Jesosa baa. Majoya Natanaeni poeje ba majje Jesosa onijje miminaje jama ba'a: —E'e Natanaeni, miya Jodio e'e jojo nei. Eyacuiñajji shajja'ajjajji poani. Miya ca ca oe siajje po ajja nei nei pealai.

48 Ma shajja'ajja majje Natanaeni jama poanaje ba'a: —¿A'a eya miquea eba? ¿Ache shono acuaeya miyaya eya banaje so'o? —poanaje.

—Natanaeni, miya ecuea eba yahuajo. Penipeja iyaa jjimahuajo, iquena acui yajjanajo ani eyaya miquea ejjashahuabaquijji banaje —Jesosa poanaje.

49 Jamajjeya Natanaeniya acanaje: —Esohui huohuijji, e'e jojo nei miya Eyacuiñajji Bacua Ejja oe nei poani tii. E'e, miya Jodio cuanaja Emeshi Mese nei!

50-51 Jesosaa oya huohui canaje: —Eyaya miya huohuinaje jama ba'a: “Eyaya miya banaje iquena acui yajjanajo ani”. Jamajjeya ecuea esohui shajja'ajja majje miya jjashahuabaquinaje jama ba'a: “E'e jojo nei miya Eyacuiñajji Bacua Ejja”. Jamajoya miyaya baje Eyacuiñajji eya ma dejjaja ba jjima amee caje'yo. Cuanaya Eyacuiñajji esohuidojoji cuana nequioqueje e jaahuanaa, ojjañaja Edoe Mese jaahuanaa.

Jamaya miyaya baje'yo, Natanaeni, enijje jjapeequianijo —Jesosa poanaje.

2

Oe dejja jjahuanaquinaje Cana cuiñajijo

¹ Majoya beca cahuime po majje oe dejja jjahuanaquinaje Canajo, Janinea meshijo. Ejjahuanaquijijo quea huiso cuana iyaa canaje ojee ijzia'ijjiaa. Jesosaja enaese Mania iyaa canaje pea'ai. ² Jesosa o shajja'ajjajji cuana nijje poeyanaje pea'ai jjahuanaquije baa, ojee ijzia'ijjiaa pea'ai. ³ Ojee ijzia'ijjia anijo, acuijjajja na ishijeyo canaje cuaa. Jamajjeya Jesosaja enaese onijje miminaje jama ba'a: —Jesosa, bacue, acuijjajja na ishijeyo canaje cuaa. Oe poanaje. ¿Ae e'ishi'yojji?

⁴ —Ecue nae, ¿yajjajo acuae moyo huohui'ajjaña acuijjajja najo? ¡Ishoa socue oe! Quije pishana eyaya oya cuana asahuaje —Jesosa poanaje.

⁵ Jamajjeya ojaya enaeseya echacojji cuana huohui canaje jama ba'a: —¡Jesosaja esohui jayojjaya nequiaa oe acue! —poanaje Mania.

⁶ Jomajo me oejje oe, 6 meshimisi ena nequijji quea quemo nee nee, quea ao nee nee yani, 60 litros shojji. Ma meshimisijo ena nequia cani eme shacula huicha'a huicha'ajji. Jamaya oya cuaa acanaje ijzia'ijjia jjimahuajo. ⁷ Jamajjeya Jesosaa echacojji cuana jama acanaje ba'a: —¡Ena shocue meshimisi ai cuana huasijke! —poanaje.

Echacojji cuana: —E'e —poanaje.

Meshimisi ai cuana huasijke ena sho canaje. Cuatajea mee canaje. ⁸ Jamajjeya cuatajea cajo,

Jesosaa echacojji cuana jama acanaje ba'a: —E'e.
ijjeya oe pojji dojocue equi mese yasijje!

Jamajjeya oe pojji dojo canaje e'ishi mee'ajjajji.
⁹ Ma ena ishi'ajja canaje equi meseya. Jamatii
ojoya ba jjima jiquio eteohuejjajo nequi ena Je-
sosaa acuijjajja na pojji acanaje. Echacojji cuan-
aja eba ojaye nei Jesosaa eteohuejjajo nequi ena
acuijjajja na pojji aca'ya poa; pea cuanaja ba
jjima. ¹⁰ Jamajjeya equi meseya ishi majje joya
ejjahuanaquijji iyaa canaje. Huohui canaje jama
ba'a: —Epreejji, jiquio acuijjajja na quea pame
nee nee. Pea cuua acuijjajja na quea pame, quea
biquia nee ishi mee cani ebionei. Majoya ojjaña
jejje majje acuijjajja na quea biquia pishana quia
cani. Miyaya ca ca oe acuijjajja na quea biquia
nee, quea pame nee nee quijje nei ishi meeña —
poanaje e'equi mese.

¹¹ Jamaya acanaje Jesosaa Janinea meshijo,
Canajo. Jamaya ohuaya ma dejjaajjima acani
acoo canaje. Ba majje ojjaña cuana jama poanaje
ba'a: —E'e jojo nei Jesosa quea ca'a nee nee.
Ohuaya ojjaña acani, ma dejjaajjima acani
pea'ai.

O shajja'ajjajji cuana pea'ai jama poanaje ba'a:
—E'e jojo nei Jesosa Eyacuiñajjija huoojea'yo oj-
jaña jaahuanajji, Quito.

¹² Majoya Jesosa Capenaoma huasijje
poquinaje. Oja nae, oja chahua cuana, ojaya
epreejji cuana pea'ai onijje poquinaje. Jomajo
aninaje cuana oe pojji cahuime.

Eyacuiñajjija equi yasijje poqui majje Jesosaa

*aquiana quiajji cuana huoojeacuayajea canaje
(Mateo 21.12-13; Macoso 11.15-18; Noca 19.45-46)*

¹³ Quijje pishana ojjaña Jodio cuana Jenosanena huasijje poquinaje quea bihui nee ojee ijija'iijja ma shejo ba'a esohuidojiji cuaa yahuajo Ejito meshijo Jodioja ebacula cuana cuia'yo jjima shejo. Ma epajea'yoji pojjeamajo jjachichaquinaje. Jamajjeya Jesosa pea'ai poquinaje Jenosanena huasijje. Poe majje Eyacuiñajjija equi yasijje poquinaje. ¹⁴ Dobiqui majje Jesosaa ba canaje quea huiso dejja cuaa aquiana quia cani; ana'ai yahue cuana, ñajajja cuana, huia' cuana pea'ai quia cani. Bejjo pea bejjo sosejje quia caqui ba canaje pea'ai. ¹⁵ Ba majje Jesosaa jjono ecuiasejjajeajji iña canaje. Dejja aquiana quiajji cuana, ñajajja cuana, ana'ai cuana pea'ai cuiahuoojeacuayajea canaje esecue yasijje, ojjaña. ¹⁶ Bejjo pea bejjo sosejje quiajji cuanaja bejjo nequijji cuana jeapajjajea canaje; bejjo jjahuojjojeajeaqui canaje. Huia' quiajji cuana Jesosaa huohui canaje jama ba'a: —Jiquio equi ca ca ecue Chii nijje emimijji. Aquiana quiajji pojjeama equi. ¡Miquea aquiana cuana dojo'yocue esecue yasijje! ¡A'a jja oe Eyacuiñajjija equi aquiana quiajji equi jayojja jama ajji! —Jesosa poanaje.

¹⁷ Ma ba majje ecuana, Jesosaja epeejji cuana, ojee jjashahuabaquinaje jama ba'a: —E'e, Eyacuiñajjija esohui huohuijjiya yahuajo nei nei tehue ca poa jama ba'a:
“Ecue chii, eya jjashahuaba neineiquiani miquea equi jaahanajji. Jamajjeya mimishi cuaa

eya niñebla cani”.

Jama tehuemeya aca poa yahuajo nei. Oya cuaa Jesosajo tehue ca poa, de —poanaje Jesosaja epee-jji cuana.

¹⁸ Jamajjeya Jodio cuana Jesosa nijje quea quene poanaje, oya Eyacuiñajjija huoojea'yo pojjeama posojo onijje mimijajinaje jama ba'a: —¿Aya acuae mi huoojea canaje ecuana Eyacuiñajjija equijo anijo huoojeacuayajear? ¿A'a cuae miya Eyacuiñajjija huoojea'yo nei? ¡Caba'ajja sahua! !Ma dejjaajjima acani a'ajja socue ecuanaja ebajji, Eyacuiñajjija e'e jojo nei miya a'a huoojea canaje ebajji!

¹⁹ Jesosaa oya cuana saja'a canaje: —¡Bacue! Miquianaa jiquio equi jeabichajea'yajo eyaya jiquio equi iyaje o'oya pea beca peejjima cahuime.

²⁰ —Chojja, de —Jodio cuana poanaje—. Quea huiso nee nee, ⁴⁶ shequiajame jiquio equi iya canaje cuaa. ¿Achajja acuae equi jeabichajea majje miyaya iyaje o'oya pea beca peejjima cahuime? ¡Chojja, de! —poanaje.

²¹ Jamatii Jesosa Eyacuiñajjija equijo pojjeama miminaje; ojaya eyamijo jjashahuabaquiani.

²² E'e, quijje Jodio cuaa Jesosa quecua'yo majje, Eyacuiñajjija oya shequi mee caje o'oya pea beca peejjima cahuimejo. Jamajje quijje Jesosa shequi o'oyajo, ecuana o shajja'ajjajji cuana jiquio esohuijo jjashahuabaquije. Jama poaje ba'a: —E'e de, Eyacuiñajjija esohui e'e nei; Jesosaja ehuohui pea'ai e'e nei —poaje quijje.

²³ Jamajjeya Jenosanena huasijke Jodio cuana ojee jjachichaquinaje. Quea bihui nee ijji'ijjianaje esohuidojojiya yahuajo nei Jodioja

ebacula cuana cuia'yo jjima shejo, ma pajea'yo jjima yajji. Jesosa pea'ai Jenosanenajo aninaje. Jomajo Jesosaa quea huiso ma dejjaajjima acani acanaje. Ba majje quea huiso cuana poanaje: —¡E'e jojo nei Jesosa Eyacuiñajjija huoojea'yo ojjaña jaahuanajji! —poanaje cuana.

24-25 Jamatii Jesosaja eba nei nei ojjaña dejja cuanaja ejjashahuabaquijji. Quea tai, epeejji e'e jojo nei pojjeama beca cuana. Jamajjeya ohuaya ojjaña quea ja'a nee huohui jjima jama ba'a: —E'e jojo nei eya ca iña jiquio Eyacuiñajjija Bacua Ejja —jamaya huohui jjima so'o Jesosaja.

3

Jesosa miminaje Nicodemo nijke

1 Majoya oe dejja Jesosa que poeyanaje, oya Nicodemo bajjani. Oya Jodio etii cuana nijje pea Jodio cuana huoojeajji poani, Paniseo dejja cuana jama jjashahuabaquime poani. **2** Oya, Nicodemo Jesosa que poeyanaje mecajje quehuajje. Jama acanaje ba'a: —Esohui huohuijji, Eyacuiñajjija miya ameesahua cani ma dejjaajjima acani. Jamajjeya ecuanaja eba Eyacuiñajjija miya huoojea canaje ecuana sohuihuohuiya.

3 Jesosaa oya huohui canaje Eyacuiñajji nijje eba'e tiitii'yojjijo; jama poanaje ba'a: —Nicodemo, eyaya miya e'e jojo nei huohuaña: ¡Bacue! Jiquio ecua epona jjamejoqui majje bacua cuayani jayojja jama Eyacuiñajjija miya cacuaya mee ca o'oyahua jiquio ecua esho'i cuayani jama. Jamajjeya Eyacuiñajjija miya ebacula sho'i jayojja

jama acaje'yo, miya ba'e tiitii mee caje'yo onijje, ojjañaja Emeshi Mese nei nijje —Jesosa poanaje.

⁴ —Chojja de, ¿a'a cuae se dejja etii cuaya o'oyame so'o? —Nicodemohua acanaje—. ¿A'a cuae eseja enaeseja yone yasijje ba'edobiqui o'oya majje ebacua jama cuaya o'oyame so'o? Chojja, de —acanaje Nicodemohua.

⁵ Jamajjeya Jesosaa oya huohui ca o'oyanaje: —Nicodemo, e'e jojo nei ecuea ehuohui jama ba'a: Jiquio ecua ebacua esho'i cuayani jama Eyacuiñajjiya miya cacuaya mee ca o'oyahua. Joya Eyacuiñajji shajja'ajjajji poani enajo besa mee majje, Eyacuiñajji Edojjoshahua Pameya oya quea pame jjashahuaba tiitiiqui mee majje pea'ai miya pea jjashahuabaquime poaje'yo. Oya Eyacuiñajji nijje ba'e tiitiije'yo. Jamaya po ajjajo ca ca Eyacuiñajji nijje eba'e tiitii'yojji pojjeama eyajo. ⁶ E'e Nicodemo, ojjaña cuana enaeseja mejo bacua cuayani yahueja jea, oja chii jayojja yamiji. Joya Eyacuiñajji Edojjoshahua Pameya pea jjashahuabaquime po mee ca'yani ca ca Eyacuiñajji Edojjoshahua Pame onijje nequi —Jesosa poanaje—. ⁷ Eyaya miya huohuinaje e'e jojo nei ebacua esho'i cuayani jama Eyacuiñajjiya miya cacuaya mee ca o'oyahua. Jamatii a'a jama jjashahuabaquijji ba'a: “Chojja de, ¿yajja epojji?”

⁸ Miyaya beni shajja'ajjaña; beni baña pea'ai acui iña dojo cani. Jamatiiache huesha beni poeani miquea ba jjima; achacua poquije miquea ba jjima pea'ai. Jiquio ecua beni achacua poquije ba jjima jayojja jama miquea ba jjima pea'aiache shono,achejo pojja'a Eyacuiñajji Edojjoshahua Pameya dejja pea jjashahuabaquime po mee

ca'yani. Jamaya miquea eba pojjeama. E'e, Eyacuiñajjiya miya cacuaya mee ca o'oyahua ebacua esho'i cuayani jayojja jama —Jesosa poanaje.

⁹ —E'e pojja'a. ¿Achajja acuae ebacua esho'i cuayani jayojja jama epojji so'o? —huohui'ajja canaje Nicodemohua.

¹⁰ —Nicodemo, miya Jedio esohui huohuijji; Eyacuiñajjiya esohui yahuajo nei etehue'yo huohuijji. Jamajjeya ¿yajjajo miquea ba jjima ebacua esho'i cuayani jayojja jama epojji eba'eiji pea ba'eme epo'yojji? —Jesosa poanaje.

¹¹ —Eyaya, Huaniya ma ona besameejji poaniya pea'ai miya e'e jojo nei huohuaña jama ba'a: Ma ecuanaja eba poa huohuaña pea ba'eme epo'yojjijo; ma ecuaa yahuajo banaje pea'ai huohuaña. Jamatii miya, pea Jedio esohui huohuijji cuana pea'ai ecuanaja esohuijo jama poani ba'a: “Chojja, siajje oya cuana poani”. E'e, miquianaaya ecuana siajjepoji poso aña —Jesosa poanaje—. ¹² E'e, eyaya miya huohuaña ebacua esho'i cuayani jayojja jama Eyacuiñajjiya Edojjoshahua Pameya miya pea jjashahuabaquime po mee caje'yo, Eyacuiñajji nijje eba'e tiitii'yojji. Jamatii ecuea esohui quea quehua miquea. Jamajjeya eyaya miya Eyacuiñajjiya ejjashahuabaqui'yojji eyajo huohuaajo, ¿a'a ecuea esohui quea ja'a poaje miquea? Chojja, quea quehua poaje pea'ai. ¹³ ¡Shajja'ajjacue ecuea esohui, Nicodemo! Dejja cuana eyahuasijje dobiqui'yo majje meshi yasijje epoe o'oyajji pojjeama ojjaña eyajo ba'e huohuiya, Eyacuiñajjiya ejjashahuabaqui'yojjijo pea'ai epoe o'oyajji pojjeama huohuiya. Eya ma ojjaña

Edoe Mese eyajo ba'e'yonaje. Eya eyajo ba'e poeyanaje meshi yasijje. Jamajjeya eyaye nei baña ojjaña eyajo, Eyacuiñajjija ejashahuabaquijji ecuea eba pea'ai —Jesosa poanaje—.¹⁴ Cuanaya eya, Eyacuiñajjija huoojea'yo ojjaña jaahuanajji ba'ehuanasohuajea caje'yo cuaa. E'e, yahuajo nei nei meshi jabojo Moisesiya baa peyo jayojja acui aojo ba'ehuanasohua ca poa ojjañaja ebajji; ojjaña joya peyoja ijija baa peyo jayojja ba cajo, Eyacuiñajjija huaquia mee ca'ya poa. Jiquio ecua Moisesiya baa peyo jayojja ba'ehuanasohua ca poa jayojja jamaya quijje eya ba'ehuanasohuajea caje'yo cuaa acui ecueata'apeejo ojjañaja mimishijo mano'yohua, mimishi cuijea'yojji sosejje.¹⁵ Jamajjeya Eyacuiñajjija ojjaña ba'e tiitii mee caje'yo onijje, ca ejo jama jjashahuabaquijao ba'a: “E'e jojo nei ohuaya ecuea mimishi cuijea neinei caje'yo”. E'e, enijje jjapeequiajo, Eyacuiñajjija quea nee nee epo mee'yojji pojjeama cuaquijo —Jesosa poanaje.

¹⁶ —E'e Nicodemo —Jesosa poanaje pea'ai— , Eyacuiñajjija ojjaña cuana ojjaña meshijo ba'e quea jea nee nee acani. Jamajjeya eya, oja Bacua Ejja oe nei huoojea canaje ojjañaja mimishijo mano'yohua. Jamajjeya ojjaña joya e'e jojo nei enijje jjapeequiani Eyacuiñajjija ba'e tiitii mee caje'yo onijje eyajo; quea nee nee epo tiitii mee'yojji pojjeama.¹⁷ Ecue Chiija eya huoojea jjima ojjaña tecueaa. Ecuea ejjashahuabaqui'yojji jama pojjeama ba'a: “Ojjaña cuana quea mimishi nee poanijo, quea nee nee po meeje'yo; quea nee tii tii”. Chojja, Eyacuiñajjija eya, oja Bacua Ejja oe nei onijje eyajo ba'ya poa meshi yasi-

jje huoojea ca poa. Ojjañaja mimishi cuijea'yo majje enijje ba'e tiitii meeje'yo —Jesosa poanaje —. ¹⁸ Jamajjeya ojjaña joya e'e jojo nei enijje jjapeequiani Eyacuiñajjiya huohui caje jama ba'a: “Miquianaya ecue Bacua Ejjaja epreejji e'e jojo nei poanijo, mimishi cuijeaje'yo. Quea nee nee epo mee'yojji pojjeama cuaquijo” Eyacuiñajjiya acaje —Jesosa poanaje—. Pea cuana enijje jjapeequi ajjajo ca ca Eyacuiñajjiya yahuajo jama acaje ba'a: “Miquianaya ecue Bacua Ejjaja oe nei nijje jjapeequi ajjajo cajaa aje'yo, mimishi cuana cuijea'yo jjima aje'yo. Jamajjeya quea nee tii tii poaje'yo” Eyacuiñajjiya acaje —Jesosa poanaje—. ¹⁹ E'e, Eyacuiñajjiya eya, oja Bacua Ejjaja huoojea canaje esohui e'e nei huohuiya, ojjaña cuana quea jjashahuabaqui ja'a nee po meeyea. E'e, eya cuaquijiji jayojja jama poanijo ojjaña quea jjashahuabaqui ja'a po meeje'yo. Jamatii quea huiso cuana ecuea esohui shajja'ajja sa po aija, mimishi cuana ojaya quea boti neejojo. Quea mimishi nee ba'e, de. Jamajoya Eyacuiñajjiya oya cuana cajaa acaje'yo. Quea nee tii tii poaje'yo cuaquijo. ²⁰ Quea mimishi ba'eja boti'ama Eyacuiñajjiya esohui e'e nei; cajaa acani quea mimishi ba'yaniya jjejojo. Jamajjeya enijje jjapeequi aija. Quea mete jjashahuabquiani jama ba'a: “¡Jesosaa mo tecuea caje ecue mimishijo!” ²¹ Ojjaña joya quea pame nee ba'eya ca ca Eyacuiñajjiya esohui quea boti nee acani. Enijje jjapeequianijo, eyaya oya cuana quea jjashahuabaqui ja'a po meeña. Jamajjeya oya cuana jama poani ba'a: “E'e, Eyacuiñajjiya eya quea pame ba'e meesahua cani ojaya esohui

jayojja” poani—Jesosaa Nicodemo huohui canaje. Majoya Jesosa Nicodemo nijje mimipajeanaje.

Huaniya ma ona besameejji poaniya Jesosajo huohui ca o'oyanaje

²² Majoya Jesosa Jenosanenajo ani poquinaje o shajja'ajjajji cuana nijje Jodea meshi yasijje, pea cuiñajji cuana huasijje. Jomajo nequi cuana Jesosaa sohuihuohui cananananje. O shajja'ajjajjiya dejja cuana besa mee cananananje Eyacuiñajjiyo.

²³ Huaniya jomajo dejja besa mee canaje pea'ai Enoni cuiñajjiyo, Sanima cuiñajji pejjejo pea'ai ena quea doejo. Ojjaña pojajao quea huiso dejja cuana, ponaña pea'ai Huani que poquinaje. Eyacuiñajjiyo enajo besa mee canaje. ²⁴ E'e, ma pojajao emeshi mese Enodeja Huani jeanobia jjima poanaje.

²⁵ Jamajjeya oe Jodio dejja Huanija epeejji cuana mimicuijjeanobia canaje. Jama poanaje ba'a: —¿Ache dejja acuae mi Eyacuiñajjiyo enajo besa mee majje eseya e'e jojo nei quea boejea po mee caje'yo so'o? ¿A'a Huaniya pojja'a? ¿A'a cuae peaa besa mee cajji, Jesosa shajja'ajjajjiya pojja'a besa mee cajji? —Jodio poanaje.

²⁶ Jamajjeya Huani que poquinaje ojaya epeejji cuana, huohui'ajjaa jama ba'a: —Esohui huohuijji, ma dejja joya yahuajo minijje nequinaje cuei ojje mijijje, ma ojo miyaya jama huohuinaje ba'a: “Oya Eyacuiñajjiya huoojea'yo ojjaña jaahuanajji”, maaya jjeya o shajja'ajjajji nijje onaya besa mee cani; ojjaña cuana aje oe jjeya o que poquiani. Jesosaa quea huiso nee nee Eyacuiñajjiyo besa mee cani. ¿Apiojji shai? —poanaje Huanija epeejji cuana.

²⁷ Huaniya oja epeeiji cuana saja'a canaje: —¡A'a quea yeno pojji! Jamaya Eyacuiñajjiya oya pea cuana besa mee cani. Yahuajo quea huiso dejja e que poeyanaje; Eyacuiñajjiya oya cuana huoojea canaje. Jjeya ca ca ojjaña cuana Jesosa que poquiani; Eyacuiñajjiya oya cuana huoojea cani. ²⁸ Miquiaaya ecue sohui yahuajo shajja'ajjanaje. Jama poanaje ba'a: "Eya Eyacuiñajjiya huoojea'yo ojjaña jaahuanajji pojjeama. Eyacuiñajjiya eya huoojea canaje ebionei Jesosajo huohuiya". ²⁹ E'e —Huani poanaje —, Jesosajo jama jjashahuabaquicue ba'a: Ejjahuanaquijjijo, epona yahueja ehuanase poaje'yo. Jamatii yahueja epeeijiya poe majje jjahuanaquiequi ba cani. Yahue ojaya ehuanase nijje mimiani shajja'ajja majje quea bihui nee poani ojaya epeeiji. Jiquio ecua yahueja epeeiji o ba majje quea bihui nee poani jayojja jama eya Eyacuiñajjiya huoojea'yo ojjaña jaahuanajji Jesosa bajjani ba coo majje quea bihui nee nee poani; eya Jesosaja epeeiji. ³⁰ ¡Ojjaña cuaa oya cashajja'ajja tiitii cahua! Quijje ca ca ojjaña cuana e que poepajeaje'yo. Jamatii capoahua —poanaje Huani, ma ona besameiji poani.

³¹ ¡Bacue! Eyacuiñajjiya huoojea'yo ojjaña jaahuanajji eyajo tii ania poa, meshi yasijke poeyanaje. Jamajjeya oya ojjaña huoojea'yojji poani tii; ohuaya e'e jojo nei Eyacuiñajjiya ejjashahuabaquijji ba mee cani. Huani ca ca jiquiojo anija mejo, dejjaja jea. Jamajjeya aje oe dejja, oja chii jayojjaya. Dejja jama mimiani. Jamajjeya Eyacuiñajjiya esohui oe pojji ba mee cani, Huaniya. ³² Eyacuiñajjiya huoojea'yo ojjaña

jaahuanajji ca ca Eyacuiñajji nijje eyajo ania poa. Jamajjeya ohuaya jama huohui cani ba'a: “Eyacuiñajji jaahuanajji ecuea eba nei nei. Maya eyaya miya huohuaña”. Jamatii ojaya esohui shajja'ajja sa po ajja beca cuana. ³³ Ojjaña joya e'e jojo nei oya shajja'ajja sa poani ca ca jama poani ba'a: “Eyacuiñajji esohui e'e nei; ¡Cashajja'ajja'yahua!” ³⁴ E'e, Eyacuiñajji huoojea'yo ojjaña jaahuanajjiya, Jesosaa Eyacuiñajji esohui huohui cani e'e jojo nei. Eyacuiñajji Edojjoshahua Pameya oya huohui meesahua cani; quea ja'a nee ameesahua cani tii tii. ³⁵ Eyacuiñajjiya oja Bacua Ejja quea jea nee nee acani tii. Jamajjeya oya jama poani Jesosa nijje: —Miya ecuea ecue Bacua Ejja quea jea nee nee. ¡Jamajjeya ojjaña huoojea'yojji pocue tii, meshijo, eyajo pea'ai! —poani Eyacuiñajji.

³⁶ Jamajjeya ojjaña joya e'e jojo nei Jesosa nijje jjapeequiani, Eyacuiñajjiya Bacua Ejja shajja'ajja cani pea'ai onijje ba'e tiitii mee caje'yo eyajo. Ojjaña joya o shajja'ajja sa po ajja ca ca onijje eba'e mee'yojji pojjeama. Eyacuiñajjiya oya cuana cajaacajae'yo; quea nee nee poaje'yo tii cuaquijo.

4

Epona Samania meshijo ba'e jjapeequinaje Jesosa nijje

¹ Jamajje Jesosa Jodea meshijo ani quea huiso dejja cuana o shajja'ajja poeyanaje, Eyacuiñajjiyo besa meeya pea'ai. Jesosa nijje jjapeequinaje quea huiso nee nee. Majoya aje oe onaaya Jodio esohui huohuijji cuana, Paniseo cuana pea'ai

huohui canaje jama ba'a: —Jesosaja epeejji cuana quea huiso nee nee; Huanija epeejji ca ca oe pojji —jamaya poanaje pea cuana.

Ma shajja'ajja majje Paniseo cuana quea quene poanaje Jesosa nijje. Jjashahuabaquinaje jama ba'a: —Ecuana quea huiso epeejji sa poani Jesosaja epeejji huisoajja —poanaje. ² (Jamatii Jesosa shajja'ajjajji cuaa Eyacuiñajjijo enajo besa mee canaje cuana, Jesosa que poeyajo. Jesosaja ca ca pea cuana Eyacuiñajjijo besa mee jjima.) ³ Jamajjeya Paniseo cuana onijje quea quene ba majje Jesosa Jodea meshijo ani poqui o'oyanaje Janinea meshi yasijje, ecuana nijje poquinaje.

⁴ Janinea meshi yasijje ejiojjije poquije Samania meshijo aniñaquinaje. ⁵ Samania meshijo ani poqui majje Sica cuiñajji pejjejo Jesosa jomishoca aninaje ena eteohuejja quea doe pejjejo. Jomajo yahuajo nei nei Jodio etiiquianaa Jacobohua ma meshijo que quia ca poa oja bacua ejja Jose. ⁶ Ma quejo yahuajo nei nei Jacobohua teo mee ca poa ena eteohuejja quea doe nee nee. Jamajjeya Jesosa ma ena eteohuejja huasijje poeyanaje eshequi biacojjajja nequijo. Jesosa hueahuea majje anioquenaje ma ena eteohuejja pejjejo ejomishocajji. ⁷⁻⁸ Anioque majje Jesosaa ecuana acanaje jama ba'a: —¡Poquicue miquianaya Sica huasijje bobi jjesheya!

Ecuana poquiajo oe Samania epona poeyanaje ena eteohuejja huasijje ena jjequisohuaa jjonojo. Jesosaa oya huohui canaje jama ba'a: —Epona, ¡che mo ena quiacue e'ishijji! —poanaje.

⁹ Jodio cuanaja Samania cuana boti'ama nei. Samania cuana nijje mimi ajja, ojee ijzia'ijjia ajja

pea'ai Jodio pojjeama jjejojo. Jamajjeya ohuaya Jesosa saja'a canaje: —Miya Jodio dejja; eya ca ca Samania pona. Jamajjeya ¿apiojji miya enijje mimiani enajo, ena quiajji? —poanaje Samania pona.

¹⁰ —E'e —Jesosa poanaje —, eya miquea ba jjima. Eyacuiñajjiija ejjashahuabaqui'yojji quea pame nee miquea ba jjima pea'ai. Maya miquea eba jojjemo miya enijje jama mimime pome ba'a: “¡Che mo oe ena quiacue e'ishijji!” Miya jama enijje emimi jojjemo eyaya miya quiame ena naba taja'ama epo'yojji tii tii —Jesosa poanaje.

¹¹ —E'e pojja'a —epona poanaje—, ena etehuejja quea doe nee nee nequi. Miquea chama' ena ejjequisohuajji. Jamajje ¿achejo acuae ena nequi, ma ena ishi majje eya quea naba taja po maja ajja epojji? ¹² Esejaya etiiquianaa Jacobohua jiquio ena teohuejja mee ca poa yahuajo nei. Ohuaya oja bacua cuana, oja ñajjajja cuana, pea huo cuana pea'aiya ishi mee majamaja ca poa jiquio ena. Majoya ojjañaa ecuaaya jiquio ena ishi majamajaña. ¿A'a cuae miquea pea ena eba? ¿Achejo nequi pea ena quea pame nee nee? Jacoboja ba jjima poa. Miya pojja'a quea jjashahuabaqui ja'a nee nee. ¿A'a Jacobo quea jjashahuabaqui ja'a pishana? —huohui'ajja canaje eponaa.

¹³ —Epona —Jesosaa huohui canaje —, ojjaña miquianaya jiquiacua poeyani ena ishiya. Jamatii ishi majje quea naba taja po o'oyani. ¹⁴ Eyaya pea ena quiaje ojjañaja e'ishijji. Ma ena ishi majje quea naba taja po o'oya ajja. E'e, jjanijo ena oshe quea pame nee cuayani, huosa'yo ajja. Jiquio jayojjaya

eyaya quiaje'yo. Jamajjeya eyaya miya ba'e tiitii meeje'yo —Jesosa poanaje.

¹⁵ —¡Che iña maya pea ena quiacue e'ishijji! — Samania ponaa Jesosa acanaje—. Jamajjeya eya quea naba taja po ajja o'oya poaje. Jamajjeya eya jiquio ena eteohuejja huasijke epoe o'oyajji pojjeama ena jjehuaa —poanaje.

¹⁶ —E'e, ¡poquicue! ¡Miqueahue jjequicue! — Jesosa poanaje ma epona nijje.

¹⁷ —Chama' ecueahue —saja'ame acanaje eponaa.

—E'e jojo nei jjeya miquea yahue chama' — Jesosa poanaje—. ¹⁸ Ecuea eba jama ba'a: Yahuajo miquea yahue cuana me oekiye huijje poa, ojjaña jja miquea yahue ehuei poanaje. Jjeya miya pea dejjajo ba'e, miquea yahue pojjeamajo. Jamajjeya miya e'e jojo nei poani: “Chama ecueahue” — Jesosaa acanaje Samania pona.

¹⁹ —E'e jojo nei ojjaña miquea eba. Jamajjeya ecuea eba miya Eyacuiñajji esohui huohuijji e'e jojo nei. ²⁰ Ecuanaja etiiquianaa Eyacuiñajji bi-huia ca poa jiquio Samania meshijo, eyiyo biajje. Miquianaya, Jodio cuana ca ca jama poani ba'a: “Jenosanenajo ca ca oeya Eyacuiñajji bihuiajji, pea eyiyojo pojjeama” miquianaya poani —poanaje Samania pona.

²¹ —¡Shajja'ajjacue mo, epona! —Jesosaa oya acanaje —. Quijje pishana miquianaaya Eyacuiñajji, esejaya Chii bihuiajje, ojjañaa. Jiquio eyiyo huasijke poe jjimaa, Jenosanena huasijke poi-qui jjimaa pea'ai oya bihuiajje. ²² Jjeya ojaya esohui jayojja jama pojjeama aje oe miquianaaya, Samania cuaa Eyacuiñajji bihuiaña. Oya miquiana-

jaya ba jjima. Ecuanaa ca ca Eyacuiñajji bihuiaña ojaya esohui jayojja. Eya oja huoojea'yo ojjaña mimishi cuijea'yojjii Jodio dejja. Jamajjeya Eyacuiñajji ecuanaja eba, Jodio cuanaja. ²³ Jamajjeya jjeya nei ojjaña esejaya Chii, Eyacuiñajji bihuiaje e'e jojo nei, ojo quea ja'a nee jjashahuabaquije. E'e, Eyacuiñajji jama poani ba'a: "Jamaya eya cabihuia cahua ojjaña. Jamaya ecuea quea boti nee" poani. ²⁴ Eyacuiñajji yani tii tii eshe. Jamatii oya jjaba meequi aija ecojja. Jamajjeya o bihuajji epohua Eyacuiñajji cabihuia cahua e'e jojo nei, ojaya esohui jayojja jama quea ja'a nee ojo jjashahuabaquiani —Jesosaa acanaje.

²⁵ —E'e —poanaje epona —, ecuea eba quijje Eyacuiñajji huoojea'yo ojjaña jaahuanajji poeje. Oya Quito bajjani poaje. Poe majje ohuaya ecuana quea ja'a nee ba mee caje Eyacuiñajji esohui.

²⁶ —Eya ca ca iña jiquio Eyacuiñajji huoojea'yoja Quito bajjani. Jjeya nei miya Quito nijje mimiani —Jesosaa acanaje.

²⁷ Majoya Jesosa shajja'ajjajji cuana bobi jjeshe majje poe o'oyanaje Jesosa que. Jesosa ba caña'yonaje Samania pona nijje mimiani. Ba majje jjashahuabaquinaje jama ba'a: —¿Apiojji shai Jesosa epona nijje mimiani? —jamatii huohui'ajja jjima: —Epona, ¿ajeo miya poeyanaje? —ajjima: —¿Jesosa, ajeo miya Samania epona nijje mimiani? —jamaya ecuana mimi jjima Jesosa nijje poanaje.

²⁸ Majoya ena jjequijji ohua acani jea cananananje eponaa, poquicuajinaje Sica huasijje huohui pohua. ²⁹ Ojjaña cuana huohui cañaquinaje

jama ba'a: —¡Poecuajicue oe! Oe dejja ena eteohuejja pejjejo ani; ohuaya ojjaña ecuea eba'ejji huohui ca'yonaje. ¿A'a oya pojja'a Eyacuiñajjija huoojea'yo ojjaña jaahuanajji? ¡Poe'ajja! ¡Ejjaba'ajjaquiqui! —poanaje epona.

³⁰ Eponaa huohui cajje ojjaña Sicajo ba'e poqui canaje Jesosa baa.

³¹ Ojjaña cuana poe jjimahuajo, ecuana, o shajja'ajjajjiya Jesosa nijje jama poanaje ba'a: —Esohui huohuijji, ¡bobi oe ijjia socue!

³² Jamatii Jesosaa jama acanaje ba'a: —Ecuea pea bobi yani ecuea e'ijjajji, ma miquea ba jjima.

³³ Jamajjeya ecuana ojee miminaje: —¿A'a pojjeama oya pea cuaa bobia canaje? —poanaje.

³⁴ Jesosa ecuanaja esohui shajja'ajja majje jama poanaje ba'a: —Bobi ijjia majje miquianaya quea bei poani. Ecue Chiiya eya huoojea canaje ojjaña jaahuanajji; ojjaña ojaya esohui ajeyo'yo majje eya quea bei poaje, bobi ijjia majje jayojjaya —Jesosa poanaje —. ³⁵ Miquianaya jama poani ba'a: “Quijje anoso sejjaje'yo, ebeca pee pea'ai ba'ime po majje. Eyaya ca ca miquianaya huohuiaña jama ba'a: ¡Bacue! Jomajo quea huiso dejja cuana poeani. Anoso ejahua jayojjaya jama oya cuana poeani. E'e, oya cuana Eyacuiñajjijo jjashahuabiquiani. Onijke jjapeequi'yo sa poani. ¡Jamajjeya enijke jjapeequi meesahuacue! ³⁶ E'e, echacojji anoso quecuajji, anoso sejjajji pea'ai eque meseya sosequia cajji. Jamajje ojjaña queabihui nee poaje'yo —Jesosa poanaje—. Oya jayojjaya Eyacuiñajjija acaje ojaya echacojji cuana. Joya esohui huohuicoojji cuana sosequia caje; joya pea cuana enijke jjapeequi meesahuajji poani

pea'ai sosequia caje. Enijje jjapeequiajo ba'e tiitii meeje'yo enijje eyajo. Jamajjeya ojjaña cuana quea bihui nee nee poaje'yo. ³⁷ E'e, yahuajo jama poanaje cuana ba'a: "Oe echacojjiya eso' quecua majje quijje pea echacojjiya chicha caje'yo". Jjeya jamaya e'e jojo nei poani. ³⁸ Jjeya eyaya miya huoojeaña anoso chichajji jama, ojjaña cuana enijje jjapeequi meesahuaa. Yahuajo Eyacuiñajjija esohui huohuijjiya oya cuana esohui ba mee canaje. Jamatii ojjaña cuana jjabahuejjaqui jjima. Jjeya miquianaaya esohui huohui o'oyajo, oya cuana ecuea epeejji e'e jojo nei poaje'yo—Jesosa poanaje ecuana nijje, o shajja'ajjajji cuana nijje.

³⁹ Majoya quea huiso nee nee Samania cuana poeyanaje Jesosa que. Oya cuana Samania eponaja esohuijo jjashahuabaquiani. Ohuaya jama acanaje ba'a: —Jiquio dejaa ojjaña ecuea eba'eiji huohui ca'yonaje. E'e jojo nei jiquio dejja Eyacuiñajjija huoojea'yo ojjaña jaahuanajji, Quito bajjani—epona poanaje.

⁴⁰ Jamajjeya Jesosa que poe majje Samania dejja cuana jama poanaje ba'a: —Esohui huohuijji, iecuana nijje che anicue!

—E'e, anije ecuana —Jesosa poanaje.

Jamajje aninaje. Beca cahuime sohuihuohui canaje. ⁴¹ Jamajjeya Jesosaja esohui shajja'ajja majje ojjaña cuaa jama acanaje ba'a: —¡E'e jojo nei oya Quito! —poanaje.

⁴² Epona nijje jama poanaje: —Yahuajo miquea esohuijo ecuana beshahua nei jjashahuabaquinaje oya e'e jojo nei Quito. Jjeya ca ca oja sohui shajja'ajja majje ecuanaja eba nei nei Jesosa e'e jojo nei Eyacuiñajjija huoojea'yo

ojjaña jaahuanajji; mimishi cuijea ca'yajje aje se ba'e tiitii mee caje'yo eyajo —poanaje Samania dejja cuana.

Jesosaa jjaajaqui mee ca'yonaje onaja bacua ejja beshahua nei poqui jeyoani

⁴³ Jamajjeya Samania meshijo beca cahuime ani majje Jesosa poqui o'oyanaje Janinea meshi yasi-jje, Cana huasijje. ⁴⁴ Yahuajo Jesosaa ecuana, o shajja'ajjajji cuana jama acanaje ba'a: —E'e jojo nei pea cuaa Eyacuiñajji esohui huohuijji shajja'ajja cani. Jamatii ojaya cuiñajji ojaya huapa pojjeama cuana ca ca oe jjashajja'ajjaqui sa po'yo ajja.

Jamajjeya Jesosa jjeya Nasanena huasijje, ma o esho'yahua ba'ya poa huasijje dobiqui jjima.

⁴⁵ Jamatii Janinea meshijo ejiojjije poquianijo, Janinea dejja cuana oya ba majje jama poanaje ba'a: —Esohui huohuijji, mi poe'yajo ecuana quea bihui nee nee. Yahuajo ecuanaa miya banaje Jenosanena huasijje poqui. E'e, esohuidojiji cuaa yahuajo Jodioja ebacua cuana cuia'yo jjima shejo, Jenosanena huasijje ojee ijzia'ijjiaa poqui ecuaaya miya banaje. Miyaya quea huiso cuana jjaajaqui mee'yonaje, ma dejja ajiima acani anaje quea huiso pea'ai. E'e, miya Eyacuiñajji esohui huohuijji nei nei —poanaje cuana.

⁴⁶ Jamajjeya Jesosa poqui o'oyanaje Cana huasijje, ma ohua yahuajo ejjahuanaquijjijo ena acuijjajja na pojji aca'ya poa huasijje. Canajo Jesosa aninaje ecuana nijje, o shajja'ajjajji cuana nijje. Jamajjeya oe emeshi mese neija dejja huoo-jeasahuajjiya Jesosajo shajja'ajja canaje: —Jesosa

Jodea meshijo yahuajo ani Janinea meshi yasijje poe'yonaje. Canajo jjeya nequi.

47 Oja bacua ejja quea mano nee jaa quea huesha pishana, Capenaomajo jaa. Jamajjeya maya shajja'ajja majje Jesosa que poquicuajicua-jinaje. Jama acanaje ba'a: —Jesosa, ipoecuajicue Capenaoma huasijje! ¡Ecue bacua ejja jjaajaqui mee'yocue! Quea mano nee jaa, beshahua nei poquijeyo jaa —poanaje.

48 Jesosa ojjaña cuana nijje jama poanaje ba'a: —Miquiana cuana Janinea meshijo ba'e beshahua nei jjashajja'ajjaqui ajja. Eyaya ma dejjaajjima acani mi amajamajajo, miquianaya jjashahuabaqui ajja jama ba'a: “E'e jojo nei Jesosa Eyacuiñajiji huoojea'yo ojjaña jaahuanajji” — Jesosa poanaje.

49 —Esohui huohuijji Jesosa, jamatii —ejeajji poanaje—. ¡Poecuajicue oe, ecue bacua ejja epoquijeyo cuahuajo!

50 —Epeejji, ¡quea bihui poquicue miquea equi yasijje! Eyaya mique bacua ejja jjaajaqui mee'yonaje; apoa poanaje —Jesosaa emanojaaja ejeajji acanaje.

Jesosaja esohui shajja'ajja majje ebacuaja ejeajji quea bihui nee poquinaje jjashahuabaquiani jama ba'a: —E'e jojo nei Jesosa quea sohui poja nee nee; ecue bacua ejja jjaajaqui mee ca'yonaje.

51 Ojaya equi yasijje poquianijo, oja chacojji cuana poeyanaje. O ba majje taaanaje: —¡Miquea ebacuaja boeca'yonaje! Quea pame nee jjeya ani'yo. Huaquia'yonaje —poanaje.

⁵² —E'e —ejeajji poanaje—, jamaya quea pame nee. ¿Ache nei eshequi nequijo acuae apoa poanaje so'o?

—Yahuajo apoa poanaje, omamecajje tii, eshequi ejjajeapaaquijo oya boeca'yonaje —poanaje echacoji cuana.

⁵³ —E'e nei —ejeajji jjashahuabaquinaje —, omamecajje tii eshequi ejjajeapaaquijo Jesosaa eya huohui canaje jama ba'a: “Miquea ebacua ejja jjaajaqui'yonaje; apoa poanaje” —ejeajji poanaje.

Jamajje equi yasijje dobiqui majje ojaya huapa pojjeama cuana nijje jama poanaje ba'a: —E'e, Jesosaa ecue bacua ejja jjaajaqui mee ca'yonaje, boeca mee ca'yonaje. ¡Oya ca ca oe Eyacuiñajji huoojea'yo ojjaña jaahuanajji! — poanaje ebacuaja ejeajji.

Jamajjeya ojjaña jama poanaje ba'a: —E'e jojo nei oya Jesosa.

⁵⁴ Jamaya Janinea meshi yasijje poe o'oya majje Jesosaa Cana cuiñajjijo pea dejjaja ba jjima aca o'yanaje.

5

*Jesosaa dejja jeo'ajja Metena ena sahuajo jaajeo
mee ca'yonaje*

¹ Majoya quijje ojjaña Jodio dejja cuana poqui o'yanaje Jenosanena huasijje ojee ijija'ijjiaa Eyacuiñajji bihuiaa. Jamajjeya ecuanaya Jesosa nijje, o shajja'ajjajji cuana nijje pea'ai Jenosanena huasijje poqui o'yanaje. ² Jenosanena cuiñajji mei jiyojo Ñajjajja Dobiquijji esecue yani. Ma ese-ecue pejjejo yani ena, bae sisi jama, ebesajji, Emeo

esohuijo Metena ena bajjani. Ena sahuajo yani me oejjje equi sisi. ³ Jomajo quea huiso emano cuana jaanaje: cojjama' cuana, jeo'ajja cuana, jiojjijajja cuana pea'ai. Ohuaya esohuidojodzi ishoa'ajja cani; jama jjashahuabiquime poani ba'a: — E'e, Eyacuiñajjiya esohuidojodziya ena cajeaquejjo cahua. Jamajjeya eya ena huasijje nequidobiquiajo, jjaajaqui mee caje'yo.

⁴ E'e, Jodio cuaa jama acanaje ba'a: — Esohuidojodziya quijje nei poe huicha'anijo ena jeaquejjo mee cani. Ena jeaquejjo cajo, ojjaña emano cuana ena huasijje canequidobi cuajiquiahua. Joya ebionei besaje'yo ca ca jjaajaqui mee caje'yo, huaquia mee caje'yo pea'ai Eyacuiñajjiya —poanaje Jodio cuana.

⁵ Jamajjeya oe dejja jomajo jeo'ajja jaanaje. Quea shequiaja huiso nee nee jaa poa, 38 shequiajame. ⁶ Jesosaa poe majje ba canaje dejja emano-jaa jeo'ajja. Jesosaja eba ma dejja quea shequiaja huiso nee nee jaa poa. Jamajje oya huohui'ajja canaje: —¿A'a miya jjaajaqui'yo sa poani? ¿A'a miya jeo sa poani? —Jesosa poanaje.

⁷ —E'e —emanojaaa saja'a canaje —, jamatii chama' pea dejja e dojodzi ena jeaquejjo poani yasijje e besa mee'yoji. Jamajjeya eya ebionei ebesa'yoji pojjeama. Eya jjapashineijje poquian-ijo, pea ebionei besacuajiquije —poanaje emano-jaa, jeo'ajja.

⁸ Jesosaa oya jama acanaje ba'a: —Epeejji, ¡nequisohua'yocue oe! ¡Jeocue! ¡Miquea equi yasijje equipajajji bebo majje dojo'yocue!

⁹ Jjeya nei jeo'ajja jeocuajji'yonaje. Jamajje nequisohua'yonaje; oja equi yasijje equipajajji bebo

majje dojo ca'yonaje; jeopoqui'yonaje. Jesosaa oya jeo mee ca'yonaje Jodioja epojja ejomishocajjijo. ¹⁰ Jamajjeya ma dejja equipajaajji dojo cani ba majje Jodio cuana quea tecue onijje poanaje: —¡De! ¿Apiojji acuae miyaya equipajaajji dojoña so'o? ¡Jjeya epojja ejomishocajji, de! ¡Aquiana jjeya dojoca ajja! Jamaya eseja esohui huohuijji cuaa huohui cani —poanaje.

¹¹ Ma dejja ejeo'yohua saja'a canaje jama ba'a: —Jamatii. Oe dejja eya jeo mee'yo majje jama acanaje ba'a: “¡Poquicue miya; miquea equipajaajji bebo majje dojocue!” poanaje.

¹² —E'e pojja'a —Jodio cuana poanaje —. “¡Miquea equipajaajji dojocue!” poanaje. ¿Ae bajjaniya acuae maya miya huohui canaje so'o? —huohui'ajja canaje.

¹³ —Cua'a, de —saja'ame acanaje—. Ache dejja shai eya jeo mee ca'yonaje. E jeo mee'yo majje oya pea dejja quea huiso nijje poquinaje —poanaje. (E'e, dejja quea huiso nee nee jomajo ani.)

¹⁴ Quijje pishana Jesosaa ma dejja oja jeo mee'yo ba ca'yonaje Eyacuiñajjija equijo. Jama huohuime acanaje ba'a: —E'e epeejji, jjeya miya quea pame neequi'yo, quea aja nee nequi. Jamajjeya ¡a'a quea mimishi po o'oyajji! Quea mimishi po o'oya majje mi quea mano nee nee po o'oya chana', quea tai nee nee; yahuajo jeo ajja, quea nee pishana poanaje —Jesosaa acanaje.

¹⁵ Jesosa shajja'ajja majje poqui'yonaje Jodio cuana huasijje. Huohuiqui canaje jama ba'a: —E'e, Jesosa bajjaniya eya jeo mee ca'yonaje —poanaje.

16 Jamajjeya jeo'ajja poanajeya huohui cajje Jodio cuaa Jesosa niñeba canaje; quecua'yo sa acanaje pea'ai, Jesosaa jeo'ajja cuana jeo mee ca'yonaje epojja ejomishocajjiyo.

17 —Ecue Chiiya quea pame nee acani tii tii epojja ejomishocajjiyo pea'ai —Jesosaa oya cuana saja'a canaje—. Jamajjeya eyaya pea'ai ecue Chiiya jayojjaya jama quea pame aña ojjaña pojajo.

18 Jamajoya Jodio etii cuaa Jesosa quecua sa neinei acanaje. Jama huohui canaje ba'a: —Esejaya etiiquiaa yahuajo esohui tehue ca poa jama ba'a: “¡Epojja ejomishocajjiyo a'a chacojjil!” aca poa.

Jodio cuaa Jesosa niñeba canaje jama pea'ai ba'a: —Oya, Jesosa etiiquianaja etehue'yo jama po ajja —poanaje.

Yahuajo Jesosa Jodio nijje jama poanaje pea'ai ba'a: —Eyacuiñajji ecue Chii, de.

—Chojja, de, Jesosa siajje poani —niñebame acanaje Jodio cuaa Jesosa.

Jodio cuaa jama acanaje pea'ai ba'a: —Jesosa siajje poani jama ba'a: “Eya Eyacuiñajji jayojjaya poani” siajje, de —jamaya Jodio cuaa acanaje.

jEyacuiñajjiya Bacua Ejja Jesosa quea ca'a nee eba'e tiitii mee'yoji!

19 Jamajjeya Jesosaa ma Jodio etii cuana huohui canaje jama ba'a: —Eyaya miquianaya e'e jojo nei huohuiaña jama ba'a: Eyacuiñajjiya eya, oja Bacua Ejja oe nei huoojea canaje; eyaya ojaya esohui jayojja jama aña. Eyaya huohuiaña ecue Chiiya ejjashahuubaquijji, ecuea ejjashahuubaquijji pojjeama. Ojjaña ecue Chiiya acani ecuea eba.

Jamaya ca ca eyaya aña pea'ai. E'e, ojjaña ecue Chiiya acani eyaya aña pea'ai, eya oja Bacua Ejjaajjejojoya. ²⁰ Eya ecue Chiija quea jea nee nee. Jamajjeya eya ba mee cani ojjaña joya ohua amee sa acani huiiso tii. Eyaya ma dejjaajjima acani aña ba majje miquianaya jama poaje ba'a: “E'e nei, yahuajo jamaya ajjima cuanaja poa. Chama'pea Jesosa jayojja” poaje miquianaya. ²¹ Jamaya ecue Chiiya eya amee caje'yo ba'a: Ecue Chiiya emano'yojaa shequi mee ca o'oyani jayojja jama eyaya ba'e meeje o'oya, ojjaña ecue babaca'yo cuana pea'ai —Jesosa poanaje—. ²² Ecue Chiija ehuohuijji pojjeama joya ojaya epreejji pojjeama, joya quea nee nee poaje'yo tii cuaquijo. Joya ojaya epreejji poani ba'e tiitii mee caje'yo onijje ehuohuijji pojjeama pea'ai. Chojja, ohuaya jama huohuime acanaje ba'a: “Ecue Bacua Ejjaacahuohui cahua ecuea ejjashahuabaqui'yojji”. ²³ Jamajjeya ojjaña joya ecue Chii shajja'ajjajji poaniya eya oja Bacua Ejja shajja'ajja caje'yo pea'ai. Ojjaña joya eya Eyacuiñajji Bacua Ejja shajja'ajja sa po'yo ajja Eyacuiñajji, e huoojea'yojji shajja'ajja sa po'yo ajja pea'ai —Jesosa poanaje.

²⁴—E'e jojo nei nei ecuea ehuohui minijje jama ba'a —Jesosa poanaje—: Ojjañaa joya ecue sohui shajja'ajja cani, e huoojea'yojji sohui e'e jojo nei shajja'ajjajji poani pea'ai ba'e tiitii meeje'yo enijje eyajo; cu aqui yasijje epoqui'yojji pojjeama. Chojja, oya cuana yahuajo eshahuaja epreejji poanjejo cu aqui yasijje poqui'yo quiaye. Jjeya ca ca ba'e tiitii meeje'yo enijje, ecuea epreejji jojoya. ²⁵ ¡Shajja'ajjacue mo! —Jesosa poanaje—. E'e jojo nei ojjaña shajjama' poani Eyacuiñajjiya ba

cani emano'yo jayojja, epoquijeyo'yo jayojja. Jamatii ehuohui'yo ejo, Eyacuiñajjija Ebacua Ejjajo shajja'ajja caje'yo. Ecuea esohui jayojja jama e'e jojo nei atiitii cajo, eyaya ba'e tiitii meeje'yo enijje eyajo. ²⁶ E'e, Eyacuiñajji ecue Chii yani tii tii, eshe. Jamajjeya ohuaya eya, oja Bacua Ejja huoojea canaje ojjaña joya onijje jjapeequiani ba'e tiitii mee'yohua. ²⁷ Cuanaya eya ojjañaja Edoe Mese poanijo Eyacuiñajjiya eya huoojea canaje jama ba'a: “¡Miyaya huohuicue joya minijje jjapeequiani ba'e tiitii meeje'yo minijje! ¡Huohuicue pea'ai joya miquea epeejji pojjeamajo quea nee tii tii poaje'yo cuaquijo!” jamaya Eyacuiñajjiya eya acanaje —Jesosa poanaje—. ²⁸ E'e, e'e jojo nei quijje ojjaña yahuajo emano'yo cuana iyaa majje eyaya oya cuana shequi meeje o'oya —Jesosa poanaje—. Ecuea esohuijo ja'a jjashahuabaquijji jama ba'a: “¿Yajja yajji? ¿Achajja shai ohuaya emano'yo cuana shequi mee caje o'oya?” a'a jamaya pojji! ²⁹ E'e jojo nei oya cuana eshe o'oya po mee majje ojjaña ecuea epeejji eyaya ba'e tiitii meeje'yo enijje. Ojjaña shajjama' cuana ca ca shequi o'oya majje quea nee nee poaje'yo tii tii cuaquijo. ³⁰ E'e, Eyacuiñajjiya eya huoojea canaje ojjaña huasijke huohuiya jama ba'a: “Joya ecuea epeejji cuana poani eyaya ba'e tiitii meeje'yo enijje. Beca cuana ca ca ecuea epeejji pojjeamajo quea nee nee poaje'yo tii tii”. Eyacuiñajjiya e huoojea majje jama acanaje ba'a: “¡Ojjaña ecuea ejjashahuabaquijji ojjaña cuana huohuiquicue!” acanaje. Eyaya ojaya esohui jayojja jama aña, ecuea ejjashahuabaqui'yojjijo pojjeama. Jama-joya eyaya Eyacuiñajjija ejjashahuabaqui'yojjijo jay-

ojja jama añajo ecuea esohui ojjaña e'e jojo nei — Jesosa poanaje.

Jesosa Eyacuiñajjija huoojea'yo ojjaña jaahuana-jji, oja Bacua Ejja

³¹ Majoya Jesosaa Jodio cuana huohui canaje jama ba'a: —Miquianaya ejo jjashahuaba que-huaquiani jama ba'a: “Jiquio dejja jama huohui cani ba'a: —Eya ca iña iquio Eyacuiñajjija huoojea'yo ojjaña jaahuanajji —acani, de. Jamatii ohuaye neiya jama huohui canijo oya ecuanaja eshajja'ajjajji pojjeama” jjashahuaba que-huaquiani miquianaya —Jesosa poanaje—. Jamatii ecuea esohui e'e jojo nei. ³² Eya ee nei pojjeama; eya ecue Chii nijje. Ohuaya ojjaña ba mee cani eya oja huoojea'yo. Ecuea eba ojaya esohui ejo e'e jojo nei. ³³ Yahuajo miquianaaya pea cuana huoojeanaje Huani que e huohui'ajja. Huaniya miquianaya e'e nei huohui canaje jama ba'a: “Jesosa e'e jojo nei Eyacuiñajjija huoojea'yo ojjaña jaahuanajji, oja Bacua Ejja oe nei” acanaje Huaniya, ma ona besameejji poaniya —Jesosa poanaje.

³⁴ —Eyacuiñajjija Huani huoojea canaje ejo huohuiya. Eyaya miquianaya huohui o'oyaña ma Huaniya ejo huohui canaje. Jamatii miquianajaya ejjashahuabaqui'yojji ejo quea ja'a pojjeamajojo eyaya miquianaya huohui o'oyaña. Miquianaaya Huaniya esohui ejo eshajja'ajja jojjemo eyaya miquianajaya mimishi cuijea'yome —Jesosa poanaje.

³⁵ —Cuaquijiji mecajje jijianiya quea ja'a ojjaña ba mee cani jayojja jama Huani poa. Ohuaya

miquianaya quea ja'a nee ba mee canaje Eyacuiñajija esohui ejo, ma yahuajo miquea ba jjima poa. Ebionei miquianajaya oja sohui ejo quea boti nee poanaje; jamatii quijje shajja'ajja sa po'yo ajja poanaje. ³⁶ E'e —Jesosa poanaje—, Huaniya ejo huohui canaje. Jamatii oya dejja. Pea yani, ecue Chii. Ecue Chiiya miquianaya ba mee cani eya oja huoojea'yo. E'e, ecue Chiiya eya ameesahua cani ma dejja aijima acani. Ma ajeyo'yo majje miquianaya ba meeje e'e jojo nei eya Eyacuiñajija huoojea'yo ojjaña jaahuanajji. ³⁷ Ecue Chiiya miquianaya ba mee cani jama ba'a: Ohuaya e'e jojo nei eya huoojea canaje. Jamatii miquianajaya oya ba jjima ecojjaja. Miquianajaya aje oe oja mimi shajja'ajja jjima pea'ai. ³⁸ Ojaya esohui miquianajaya shajja'ajja jjima. Eya oja huoojea'yo. Jamajjeya miquianaya ecue sohui shajja'ajja sa po'yo ajja pea'ai —Jesosa poanaje—. ³⁹ Eyacuiñajija esohui yahuajo etehue'yo miquianaaya ba huicha'a huicha'aña, ba majamaja majje miquianaya eba'e tiitiije poso jjabaquiani. Ma esohui etehue'yo yahuajo ejo tehue ca poa. ⁴⁰ Eyaya ca ca oe eyaye nei miya ba'e tiitii meeje'yo; jamatii miquianaya enijje jjapeequi sa po ajja —Jesosaa Jodio cuana acanaje.

⁴¹ —Eya dejja mimishi jama jjashahuabaqui ajja jama ba'a: “Ojjaña dejja cuaa jamatii eya shajja'ajja caje'yo” po ajja eya —Jesosa poanaje—. ⁴² Chojja, ecuea eba miquianajaya Eyacuiñajji quea jea nee pojjeama. ⁴³ Eyacuiñajjiya, ecue Chiiya eya huoojea canaje. Jamatii miquianaya

e shajja'ajja sa po ajja. Pea dejja Eyacuiñajjija huoojea'yo nishohua huohui cani jama ba'a: "Eya quea pame nee". Ojaya esohui ca ca miquianaaya shajja'ajjaje; siajjepoiji nijje miquianaya jjapeequije. ⁴⁴ Eyacuiñajji oe nei enequi tii tii. Jamatii miquianaaya ojaya esohui jayojja jama a sa po'yo ajja, jama jjashahuabaquime po ajja ba'a: "Eyacuiñajjiya ejo jama cahuohui cahua ba'a: —E'e, miya ecuea epeejji quea pame nee —cahuohui cahua". Chojja. Jamaya miquianaya jjashahuabaqui ajja—Jesosa poanaje —. Miquianaya jjashahuaba tiitiiquiani jama ba'a: "Pea dejja cuana ejo jama camimiquiahua ba'a: —E'e, miya ca ca oe quea pame nee nee —capoahua onaya". Jamajjeya miquianaya enijje jama po ajja ba'a: "Jesosa, miya Quito, Eyacuiñajjija huoojea ojjaña jaahuanajji" enijje po ajja. Jamaya huohui sa po ajja miquianaya —Jesosa poanaje.

⁴⁵ —¡A'a eya ecue Chii ehuohuije poso pojji jama ba'a: "Oya cuana e shajja'ajja sa po'yo ajja; quea mimishi nee nee" a'a eya ehuohuije poso pojji nequiana! —Jesosa poanaje —. Chojja, ecuea miquianaya ehuohuijji pojjeama. Miquianaya Moisesija etehue'yojo jjashahuabaquiani; jamatii ojaya esohui etehue'yo ajjimajo, Eyacuiñajjiya miquianaya jama acaje ba'a: "¿Apiojji acuae quiana Moisesija etehue'yojo shajjama' poani? Miquianaya quea mimishi nee nee" quijje Eyacuiñajjiya nequiana acaje'yo —Jesosa poanaje.

⁴⁶ —E'e, Moisesiya ejo tehue ca poa. Jamajjeya miquianaaya oja tehue e'e jojo nei esha-jja'ajja jojemo enijje jjapeequi'yome. ⁴⁷ Jamatii

miquianaaya Moisesija esohui eshajja'ajja jojjemo, ojaya ehuohui etehue'yo eba pea'ai jojjemo ecuea esohui shajja'ajja'yome pea'ai — Jesosa poanaje.

6

*Jesosaa bobia canaje quea huiso nee nee dejja,
5.000 dejja*

(*Mateo 14.13-21; Macoso 6.30-44; Noca 9.10-17*)

¹ Majoya Jodio dejja cuana nijje mimi majje, quijje Jesosa o shajja'ajjajji nijje, ecuana nijje Jenosanenajo ani poquinaje Janinea bae yasijje, pea bajjani Timenia bae yasijje. Bishe aijo ojje miji yasijje besapoqui o'oyanaje. ²⁻³ Ba'eñaqui majje eyiyo huasijje jaasohuaquinaje. Anioquenaje. Yahuajo Jesosaa quea huiso acanaje ma dejja ajiima acani; quea huiso emano cuana jjaajaqui mee ca'yonaje, jjajeaqui mee ca'yonaje pea'ai. Jamajjeya o ba majje quea huiso nee nee poqui canaje jocuama, Jesosa baa. ⁴ Jamaya poanaje Jodio cuana Jenosanena huasijje poqui o'oyani ojee ijija'ijjia'yohua esohui dojijiya Jodioja ebacua yahuajo cuia'yo jjima shejo. Ma epajea'yojji pojjeama jjachichaquinaje. ⁵⁻⁶ Jamajjeya Jesosaa bajea canaje quea huiso nee nee poeje. Ba majje ohuaya Penipe huohui'ajja canaje: —Penipe, ¿achacua acuae seja che bobi jjesheje so'o dejja cuana quea huiso bobiajji? —Jesosaa acanaje, Penipeya yajja huohui'ajjame acaje ejjabaquijji. Jamatii Jesosaja eba poa Eyacuiñajjiya, oja Chiiya bobi pana caje'yo dejja cuana bobiajji.

⁷ Penipeya saja'a canaje jama ba'a: —¿Yajja yajji? ¿Ajeo ebobiajji? Oya cuana quea huiso nee

nee aña, de. 200 esodojo quea nahue ecuanaja yani jojjemo maya oe pojji bobo jjesheme ojjaña cuanaja ijjiajji —poanaje Penipe.

⁸ Majoya aje oe o shajja'ajjajji Anesi, Simohui Penoja chahua jama poanaje ba'a: ⁹—Oe esho'iya ye canaje me oeje pahui, beca nahuoo sisi pea'ai. Jamatii maya oe pojji nei nei, de; dejja cuana quea huiso nee nee ani jejje jjima poaje —poanaje Anesi.

¹⁰ Majoya Jesosaa jama acanaje ba'a: —¡Ojjaña cuana jama acue ba'a: “¡Ojjaña anioquecue sipone biajje!” acue! —Jesosaa acanaje.

Jamajje quea huiso sipone yanijo, ojjaña cuana anioque mee canaje sipone biajje. Quea huiso nee nee poanaje, 5.000 dejja; epona, esho'i cuana pea'ai sico jjima. ¹¹ Majoya Jesosaa pahui me oeje huiso jjeshe majje Eyacuiñajji bihuia canaje. Eyacuiñajji nijje bobijo mimi majje pahui tepe canaje; ecuana, o shajja'ajjajji cuana quia mee canaje dejja cuana e'anioquiani yasijke. Jamaya acanaje nahuoo sisi pea'ai. Quia ca poquije quea huiso nee nee jjapanaqui poquipoquinaje bobo, de. Jamajjeya ojjaña cuaa ijjiā neinei canaje. ¹² Ojjaña jejjeajo, Jesosaa ecuana huohui canaje: —¡Chichacue bobo ojjañaja ijjiasejja! ¡A'a jeana'yojji!

¹³ Jamajjeya ecuanaa chicha'yonaje pahui ojjañaja ijjiasejja. Jjepai ai yasijke iya'yonaje. Quea huiso poanaje, 12 jjepaime. Jamatii yahuajo me oeje, 5 pahui poanaje. E'e, Eyacuiñajjiya jjapanaqui mee capoquipoquinaje quea huiso bobo, de. ¹⁴ E'e, Jesosaa ma dejjaja ba jjima acanaje; 5.000 dejja cuana bobia canaje. Ma

ba majje dejja quea huioso cuana ojee miminaje jama ba'a: —E'e jojo nei Jesosa Eyacuiñajiji huoo-jea'yo ojjaña jaahuanajji. Yahuajo Eyacuiñajijiya ojo huohui mee ca poa jama ba'a: “Quijje eyaya miquiana huasijje huoojeaje Quito, ojjaña jaahuanajji”. ¡Cua'a, oya esejaya emeshi mese epoji ejjanequi meequi! —dejja cuana poanaje.

¹⁵ Onajaya ejjashahuabaquijji ba majje Jesosaa ojjaña dejja cuana huoojea canaje equi cuana huasijje. Majoya oya quehua poquinaje. Eyiyo huasijje oe nei jaasohuaqui o'oyanaje oja Chii nijje mimiya.

*Jesosa bae ena biajje poquinaje
(Mateo 14.22-27; Macoso 6.45-52)*

¹⁶ E'e, sinecua, eyiyo huasijje poqui jjimahuajo Jesosaa ecuana, o shajja'ajjajji cuana huoojea canaje: —¡Bae ojje miji yasijje bishe aijo besapo-quicue! Quijje eya poquije miquiana que —Jesosa poanaje.

¹⁷ Jamajjeya bishe ai yasijje ani majje ecuaa yonaje. Besapoqui'ajjanaje ojje miji yasijje epo-quijji, Capenaoma huasijje. Mecajje quea apo nee poanaje. Jamatii Jesosa ecuana huasijje poe jjima poanaje. ¹⁸ Beni quea quemo nee nee poeyanaje. Enashajo quea quemo anicuayanaje. ¹⁹ Quea huesha nee yo'ajjanaje enabae yiyesama neijo. Jomajo ecuaaya banaje Jesosa. Eyiyoje ena biajje jeojeojebeje banaje. Jesosa ba majje ecuana quea ajjajja nee nee poanaje, oya eshahua poso anaje.

²⁰ Jamajjeya Jesosa ecuana nijje jama poanaje ba'a: —¡A'a quea mete pojji! Eya ca ca iña iquo, eshahua pojjeama —poanaje.

²¹ Jesosa shajja'ajja majje quea jaji nee po'yonaje ecuana. Bishe ai yasijje ani mee'yonaje. Jesosa ani'yajo, bishe ai bae ojje miji yasijje ba'eñaquinaje, Capenaoma huasijke. Jomajo cahuinaje ecuana.

Ojjaña cuaa Jesosa sa'ajja canaje

²² Mecahuajje ojjaña cuana, ma Jesosaa bobia canaje cuana jjachichaqui o'oyanaje bae sahua huasijke. Jama ojee miminaje ba'a: —¿Achejo shai Jesosa? Oe bishe ejaanaje, de. Jamatii Jesosa o shajja'ajjajji cuana nijje besapoqui jjima, de, yaninaje eyiyojo tii —dejja cuaa acanaje. Ojjaña ba jjima poanaje Jesosa ena biajje jeojeopoquije.

²³ Majoya pea bishe cuana Timenia cuiñajjijo ani poeyanaje. Ba'eñaquinaje bae sahuajo, jomajo yahuajo Jesosaa Eyacuiñajji bihuia majje quea huiso cuana bobia canaje. ²⁴ Jamajjeya ojjaña cuana Jesosa, o shajja'ajjajji cuana pea'ai chama' ba majje bishe cuana huasijke aniso-huaquinaje. Capenaoma huasijke besapoquinaje Jesosa sa'ajja'yohua.

Jesosaa esohui huohui canaje pea cahuijo, eba'e tiitii mee'yoji

²⁵ Ojje miji yasijke ba'eñaqui majje oya cuaa Jesosa ba canaje. Ba majje huohui'ajja canaje: —Esohui huohuijji, ¿ache shono acuae mi jiquiacua poeyanaje so'o ba'a? —poanaje.

²⁶ Jesosaa oya cuana saja'a canaje quea yeno jama ba'a: —Miquianaya ejo jjashahuabaqui ajja jama ba'a: “E'e, Jesosa ma dejjaja ba jjima acanaje; jamajjeya oya e'e jojo nei Eyacuiñajjija huoo-jea'yo ojjaña jaahuanajji”. Chojja, miquianaya

jama ejjashahuaba meequiviji pojjeama. Bobijo ca ca miquianaaya eya sa'ajjaña, bobi quea huiso ijji majje quea jejje poanajeya jjejojo. ²⁷ ¡A'a jjashahuaba tiitiiquiji bobijo, eba'ejjijo! Maya jjeya nei oe poani. Sho caje o'oya. ¡Ecuea esohuijo ca ca jjashahuabaquicue oe! —Jesosa poanaje—. Maya e'e jojo nei shajja'ajjajo, eyaya miya ba'e tiitii meeje'yo enijje eyajo. Ecuea esohui pea bobi jayojja, eba'e tiitii mee'yojji. E'e, eyaya ojjañaja Edoe Meseya ma pea bobi eba'e tiitii mee'yojji quiaje miquianaya, eya Eyacuiñajji huoojea'yohua jjejojo. Eyacuiñajjiya ecue Chiyya eya ma dejjaja ba jjima amee cani; pahui jjapano meequivi canaje miquiana bobiajji. Jamajoya miquea eba eya oja huoojea'yo ojjaña jaahuanajji—Jesosa poanaje.

²⁸ Majoya aje dejja cuaa Jesosa huohui'ajja canaje jama ba'a: —¿Achajja acuae ecuaa Eyacuiñajjiya esohui jayojjaya aje'yo so'o? ¿Jamajjeya oya ecuana nijje quea bihui nee poaje'yo?

²⁹ Jesosaa oya cuana saja'a canaje jama ba'a: —E'e jojo nei jama acue ejo ba'a: “E'e Jesosa, miya Eyacuiñajjiya huoojea'yo ojjaña jaahuanajji” jamaya acue. Jamajjeya Eyacuiñajji quea bihui nee poaje'yo miquianajo—Jesosa poanaje.

³⁰ —E'e pojja'a —Jodio cuaa huohui canaje—. Jamajjeya ¡miyaya Eyacuiñajjiya jayojja jama acue dejja ajjima acani! Jamajjeya ecuanaja eba poaje miya e'e jojo nei Eyacuiñajjiya huoojea'yo ojjaña jaahuanajji. ¿Ae poaje miya? ¡Eyacuiñajji jayojja jama acue, Moisesiya aca poa jama oe acue! ³¹ E'e, yahuajo nei meshi jabojo Eyacuiñajjiya esohui huohuijjiya Moisesiya esejaya etiiquiana

bobi pahui jayojja quia ca poa ojjaña pojjajo. Yahuajo nei Eyacuiñajjiya Moisesi tehue mee ca poa jama ba'a: "Eyacuiñajjiya Moisesija bobi pahui sisi jayojja eyajo oque mee ca poa meshi yasijje etiiquianaja e'ijjiajji" jamaya tehue ca poa—Jodio cuana poanaje.

³² —Eyaya miya e'e nei huohuiaña —Jesosaa acanaje —, Moisesiya pojjeama etiiquiana quia canaje bobi. Ma eyajo aniya tii bobi oque mee canaje ecue Chiiya. Ohuaya jjeya miquianaya quia cani pea bobi ma eyajo ani meshi yasijje poeyanaje. ³³ E'e, jjeya nei Eyacuiñajjiya bobi eyajo aninaje ohuaya huoojea cani ojjaña ba'e tiitii mee'yojji —Jesosa poanaje.

³⁴ —E'e, emeshi mese, ¡che ecuana jiquio bobi quiacue ojjaña pojjajo! —poanaje oya cuana.

³⁵ —Eya ca ca iña jiquio bobi jayojja tiiya Eyacuiñajjiya huoojea'yo —Jesosa poanaje —, Eyacuiñajjiya huoojea'yo ojjaña jaahuanajji, ojjaña ba'e tiitii mee'yojji pea'ai. Jamaya eya poani. Bobi ijja majje miya quea yeno poaje o'oya, quea shoe po o'oya majje. Quea naba taja pea'ai poaje o'oya. Enijje ejjapeequi jjemo, e eshajja'ajja jojjemo pea'ai miquiana quea bihui tii po'yome, quea jeje tii jayojja nequi mee'yome —Jesosa poanaje —. ³⁶ Eyaya miquianaya huohuiaña jama ba'a: Miquiaaya ecuea ma dejjaaa ajjima acani quea huiso cuana banaje, pahui ecue pana ijjianajejo pea'ai. Jamatii jjashahuabaquiani jama ba'a: "Chojja, Jesosa Eyacuiñajjiya huoojea'yo ojjaña jaahuanajji pojjeama, ojjaña ba'e tiitii mee'yojji pojjeama pea'ai" jamaya jjashahuabaquiani

miquianaya, eya Quito pojjeama poso aña — Jesosa poanaje—. ³⁷ Ojjaña joya ecue Chiiya ejo e'e nei jjashahuabaqui meesahua cani e que poeje'yo, enijje jjapeequije'yo tii. E que poeyajo, ecuea miquianaya cajaa yajji pojjeama. ³⁸ E'e, eya eyajo ani ecue Chiiya meshi yasijje huoojea canaje. Jamajjeya eyaya ojaya ejjashahuabaqui'yojji jayojja jama aña, ecuea ejjashahuabaqui'yojji jama pojjeama —Jesosa poanaje—. ³⁹ Ecue Chiiya eya niñeshe'a ca poa jama ba'a: “Ojjaña joya eyaya minijje jjapeequi meesahuaña equiyo'yojji pojjeama. ¡Ojjaña oe ba'e tiitii mee'yocue minijje! Quijje miya poe o'oya majje joya emano'yo cuana oe shequi mee o'oyacue, eba'e tiitii'yojji” jama eya niñeshe'ameya ecue Chiiya aca poa —Jesosa poanaje—. ⁴⁰ E'e, ecue Chii jama sa poani ba'a: Ojjaña joya eya Eyacuiñajjija Bacua ba majje, enijje jjapeequiajo, eyaya oya ba'e tiitii meeje'yo enijje eyajo; joya emano'yo cuana jaa pea'ai shequi meeje o'oya quijje poe o'oya majje —Jesosa poanaje.

⁴¹ Majoya Jodio cuaa Jesosajo niñeba canaje. E'e, Jesosaa yahuajo jama acanaje ba'a: —Eya Eyacuiñajjija huoojea'yo ojjaña jaahuanajji eyajo yahuajo ania poa. Ohuaya eya huoojea canaje meshi yasijje —acanaje yahuajo. ⁴² Jamajjeya Jodio cuaa Jesosa Joseja bacua ejja poso acanaje: —¡De! Oya Joseja bacua ejja pojja'a jja coma. Oja chii, ojaya enaese pea'ai ecuanaja eba. ¿Yajjajje oya jama poani ba'a: “Eya yahuajo eyajo ania poa; eyajo ani meshi yasijje huoojea canaje ecue Chiiya”? ¿Yajjajje shai jama poanaje oya?

Jodio cuana quea sapa ca'a jjejojo, Jesosa Joseja

jeajo poso ojaya esohui shajja'ajja sa po'yo ajja.

⁴³ —¡A'a eya niñebajji! —Jesosa poanaje —.

⁴⁴ Beca cuana jamatii enijje ejjapeequi'yojji pojjeama. Ecue Chiiya eya huoojea canaje. Joya ohuaya beca cuana ejo e'e jojo nei jjashahuabaqui meesahua cani enijje ejjapeequijji; oya cuana ca ca oe eyaya ba'e tiitii meeje'yo enijje poe o'oya majje. ⁴⁵ E'e, Eyacuiñajjija esohui huohuijji cuana yahuajo nei ba'eya jama tehueme aca poa ba'a:

“Eyacuiñajjiya ojjaña dejja cuana, epona cuana pea'ai oja sohui ba meesahua caje'yo”.

Jamaya tehueme aca poa. Jamajjeya ojjaña joya ecue Chii shajja'ajjajji poaniya, oja sohui jama acaje'yo. Jamaya amajje enijje jjapeequije'yo pea'ai —Jesosa poanaje.

⁴⁶ —Jamatii ojjaña cuanaja Eyacuiñajji ba jjima ecojjaja. Eya Eyacuiñajji nijje, ecue Chii nijje ania poa. Jamajjeya eyaya, eyaye nei, oya baña ecojja —Jesosa poanaje—. ⁴⁷ E'e jojo nei ojjaña joya ecue Chiiya enijje jjapeequi meeshahua cani eyaya ba'e tiitii meeje'yo enijje. ⁴⁸ Miquiaaya bobo ijjiña eba'ejji. Jamajjeya eya bobo jayojjaya. Eyaya ecuea epeejji cuana ba'e tiitii meeje'yo. ⁴⁹ ¡Bacue! Yahuajo nei meshi jabojo Moisesiya miquiana-jaya etiiquiana bobo pahui sisi jayojja quia ca poa ojjaña pojjajo; jamatii mano'ya poa ojjaña etiiquiana. ⁵⁰ Eya miquiana nijje mimiani pea bobijo, ma Eyacuiñajji eyajo aniya huoojea canaje meshi yasijje. Maya ijjiña majje ca ca mano'yo ajja tii tii poaje'yo. ⁵¹ Eya ca ca iña pahui jayojjaya, Eyacuiñajjija huoojea'yo. E'e, eya yahuajo eyajo ani meshi yasijje poeyanaje dejja cuana ba'e tiitii

mee'yohua. Jamajjeya jiquio ecua bobi ijija maffe miquianaya ba'yani jayojja jama eyaya dejja cuana ba'e tiitii meeje'yo. Ojjaña joya enijje e'e jojo nei jjapeequiani ba'e tiitiije'yo enijje eyajo. Eyaya ojjaña cuana enijje ba'e tiitii mee'yo sa aña. Jamajjeya eya manoje'yo ojjañaja mimishi cuijea mee'yojji. Jamajoya ecuea eyami ma pea pahui jayojja jama poani—Jesosa poanaje.

⁵²—¡Chojja, de! —Jodio cuana ojee jjamimicuia-jea nobiajequinaje. —¿Yajja yajji ohuaya aje oe oja yami quia caje'yo bobi jayojja ecuanaja e'ijjajji, de? —poanaje.

⁵³—Eyaya miya e'e jojo nei huohuiaña—Jesosa poanaje. —¡Shajja'ajjacue! Miquiaaya ecue sohui mi shajja'ajjajo, enijje mi jjapeequiajo pea'ai, enijje eba'e tiitii mee'yojji pojjeama. Ecue sohui shajja'ajjañajo, ecue yami ijijaña jama jayojja poani; enijje jjapeequianijo, ecuea ena'ishiaña jama jayojja poani pea'ai. —Jamaya pocue, ecuea epeejjji poanijo! ⁵⁴ Jamajjeya ecue sohui shajja'ajjajji cuana, ecuea epeejjji nei nei cuana eyaya ba'e tiitii meeña; poe o'oya majje joya emano'yo cuana jaa pea'ai shequi meeje o'oya. ⁵⁵—¡Bacue! —Jesosa poanaje. —Miquiaaya bobi ijijaña quea bihui nee eba'ejji. Jamaya eya manoje'yo miquiana quea bihui nee eba'e tiitii mee'yojji. Miquiaaya ena oshe ishiaña naba taja'ama epoiji. Jamaya ecuea ena'cuayaquije'yo miquiana quea boejea po meejjji, cu aqui yasijke epoquijji pojjeama, enijje jjapee neineiquianijo—Jesosa poanaje.

⁵⁶—E'e —Jesosa poanaje —, jiquio ecua miquianaya quea jejje po majje quea bei nee poani jama jayojja eya miquiana cuanajo

mano'yajo, miquianaya quea bei nee poaje'yo. Ecuea ecue ena' cuayaquije'yo miquianaja mimishi cuijea'yojji, miquiana quea bei nee po mee'yojji. Jiquio ecua ena' ishi majje quea bei poani jayojja jama quea bei nee poaje enijje jjapeequi majje. Jamajjeya joya e shajja'ajja neineiji poani enijje jjapeequiani; eya onijje jjapeequiani pea'ai. ⁵⁷ E'e, Eyacuiñajji enequi tii eshe, ecue Chii e huoojeajji epo. Eya ecue Chiija ejjashahuabaqui'yojji jayojja jama poanijo, ohuaya eya ba'e tiitii mee cani. Jamajjeya ojjaña joya enijje e'e jojo nei jjapeequiani eyaya ba'e tiitii meeje'yo enijje —Jesosa poanaje —. ⁵⁸⁻⁵⁹ Etiiquiana yahuajo nei nei bobi Moisesija quia ijzia majje jamatii mano'ya poa. Eya ca ca iña jiquio pea pahui jayojja; eya eyajo ania poa, ecue Chiiya meshi yasijje huoojea canaje. Jamajjeya ojjaña joya enijje e'e jojo nei jjapeequiani eyaya ba'e tiitii meeje'yo enijje eyajo —jamaya Jesosaa Jodio cuana sohuihuohui canaje Capenaomajo, Jodioja equi ojee ejjachichaquijjijo.

Jesosaa huohui ca o'oyanaje esohui eba'e titi'i'yojji

⁶⁰ Jesosaja esohui Capenaomajo shajja'ajja majje quea huiso dejja cuana ojee jjaniñebaquinaje jama ba'a: —¡De! Jesosaja esohui quea tai nee nee, de; shajja'ajja maja sa po'yo ajja iña, ohua oja eyami e'ijzia mee ca —poanaje Jodio cuana.

⁶¹ Onajaya ejjashahuabaquijji Jesosaja eba poanaje. Jamajjeya quea huiso cuana oja esohuijo jjaniñebaquinajo, Jesosaa huohui canaje jama ba'a: —Ecuea esohuijo ¿a'a miquiana quea tai

jjashahuabaquiani? ¿A'a mi enijje jjapeequi pajeaje'yo? ⁶² Quijje eya ojjañaja Edoe Mese, ma yahuajo eyajo ania poa, jjequisohua caje o'oya iña eyahuasijje; jiquio meshijo enequi tiiji pojjeama iña. Jamajjeya aje mi oe ¿yajja jjashahuabaqui'yome acuae mi poaje'yo e jjequisohua ca'yajo? —Jesosa poanaje —.

⁶³ Eyacuiñajjija Edojoshahua Pameya pea ejjashahuabaquijji ba mee cani yahuajo jama pojjeama. Miquianaya ca ca jjashahuabaquiani bobijo, jiquio meshijo eba'ejjijo. Jamajjeya miya ba'e tiitii mee ajja enijje. Eyaya ca ca huohuiaña Eyacuiñajjija ejjashahuabaquijji. Maaya miquianaya ba'e tiitii mee caje'yo, Eyacuiñajjija esohuijo jjashajja'ajjaquianijo. ⁶⁴ Jamatii miquianaya quea huiso ejo jama poani ba'a: "Mi shajja'ajja sa po'yo ajja iña; minijje jjapeequi sa po'yo ajja iña" miquianaya poani —Jesosa poanaje.

E'e, yahuajo nei Jesosaja eba poa jama ba'a: "Quijje ecuea epjeeji nishohua pea cuana eya iña meesahua caje'yo onaja equecua'yojjji. Quijje quea huiso cuana enijje jjapeequi ajja poaje". Jamaya Jesosaja eba. ⁶⁵ Jamajjeya Jesosa jama poanaje pea'ai ba'a: —Jamajoya eyaya miquianaya yahuajo huohuinaje jama ba'a: "Beca cuana jamatii enijje ejjapeequi'yojji pojjeama. Beca cuana joya ecue Chiiya ejo e'e jojo nei jjashahuabaqui mee cani ca ca oe enijje jjapeequije'yo" eyaya yahuajo miquianaya anaje —Jesosa poanaje.

⁶⁶ Majoya ma esohui shajja'ajja majje quea huiso dejja cuana Jesosa nijje poqui pajea'yonaje,

o shajja'ajjajji nisho cuana. ⁶⁷ Jamajjeya Jesosaa ecuana, o shajja'ajjajji nei, 12 cuana huohui'ajja canaje: —¿Ae poaje miquianaya? ¿A'a miya pea'ai enijje jjapeequi sa po'yo ajja poaje? —Jesosa poanaje.

⁶⁸ —Ecuea Emeshi Mese —Simohui Penohua Jesosa saja'a canaje —, chama' pea mi jayojja. Miyaya ca ca oe esohui e'e jojo nei huohuaña. Mi shajja'ajjajji caya ca oe ba'e tiitii meeje'yo minijje tii. ⁶⁹ Ecuana minijje e'e jojo nei jjapeequinaje. Ecuana eba miya e'e jojo nei oya Ëyacuiñajji huoojea'yo ojjaña jaahuanajji quea pame nee nee —poanaje Peno.

⁷⁰ —E'e —Jesosa poanaje—. Eyaya miquianaya, 12 cuana babaca'yo majje iyaanaje; jamatii oe dejja minijje nequi ecuea epreejji nisho; oya es-hahuaja epreejji poani —Jesosa poanaje.

⁷¹ Jesosa jjashahuabaquiani Jodasajo, ma Simohui Isicanio teja bacua ejjajo. E'e, Jodasa Jesosa shajja'ajjajji 12 cuana nijje nequinaje. Jamatii qui-jje Jodasaa Jodio etii cuana Jesosa iña meeshahua canaje beijo sosejje, onaja quecua'yojji.

7

Jesosaja echahua mese cuana o shajja'ajjajji po-jjeama poanaje

¹ Majoya Jesosaa esohui huohui canananaje Janinea meshijo, Jodea meshijo pojjeama. Jodea meshijo Jodio etii cuaa equecua ca poaje jjejojoya mi poqui o'oyanaje.

² Quijje pishana ojjaña Jodio dejja cuana Jenosanena huasijje poqui o'oyanaje equi sisi iyaa, ojee quea bihui nee ijjia'ijjiaa bobi cuana chichajji

shejo. ³ Jamajjeya Jesosaja echahua mese cuana onijje jama poanaje ba'a: —¡A'a jja oe jiquiojo Janinea meshijo tii ani tiitijiji! ¡Ecuana nijje Jodea meshi yasijje poqui o'oyacue! ¡Jocuama aje oe miyaya ma dejaa ajjima acani aquicue, ojjaña mi shajja'ajjajji cuanaja ebajji! ⁴ ¡A'a quehuajje ajji cuiñajji sisijo! Jamaya po ajja cuana. ¡Jenosanenajo aquicue oe, ojjaña ebajji! E'e, jjeya jomajo ojjaña dejja cuana jjachichaquiani —poanaje.

⁵ Jamaya huohui canaje oja chahua cuaa, Jesosa ba'yо jjimahuajo, oya Eyacuiñajjija huoo-jea'yo ojjaña jaahuanajji pojjeama poso acanaje.

⁶ Jamajjeya Jesosaa oja chahua cuana huohui canaje jama ba'a: —Chojja, eya Jenosanena huasi-jje poqui o'oya jjima so'o. Eya jjeya miquiana nijje epoqui jojjemo ojjaña cuaa eya shajja'ajja jjima acame. Jamatii, ¡miquianaya poqui'yo sa po majje poqui'yocue! Jomajo dejja cuana mijo jjashahuabaqui ajja. ⁷ Miquianaya ojjaña dejja jayojja jama jjashahuabaquianijo, mi quecua sa po ajja cuana. Eyaya ca ca onaya jama anaje ba'a: “Miquianaya ojjaña quea mimishi poanijo, Eyacuiñajjija esohui jama po ajja” poanaje. Jamajjeya ojjaña ejo quea quene poani; quecua sa acani. ⁸ ¡Jamajjeya miquianaya jjeya Jenosanena huasijje poquicue quea cahui huiso ojee ijjia'ijjiaa! Eya ca ca iña jjeya epoqui'yojji pojjeama. E'e, jjeya nei miquiana nijje poqui'yajo eya shajja'ajja jjima acame cuaa —Jesosa poanaje.

⁹ Jamaya huohui majje Jesosa Janinea meshijo aninaje so'o.

Jesosa Jenosanena huasijje poquinaje bobi

chichajji shejo

¹⁰ Jamatii oja chahua cuana Jenosanena huasijje poqui'yajo, quijje pishana Jesosa pea'ai poquinaje. Ojjaña pea Jodio dejja cuana nijje pojjeama poquinaje; quehuajje Jenosanena huasijje poquinaje oe nei. ¹¹ Ojee ijija'ijjiaa jjachichaqui majje Jodio etii cuana Jesosaja epoe'yojjijo ishoa canaje quea quene. Huohui'ajja huicha'a huicha'a canaje jama ba'a: —¿Aecue Jesosa? ¿A'a cuae oya poeyanaje so'o? —acanaje.

¹² Ojjaña cuana echicha'yo pea echicha'yo cuana nijje jjapashineijje maimai aninaje Jesosajo jama ba'a: —Oya quea pame nee nee Jesosa. Siajjepoiji pojjeama —beca cuana poanaje.

—Chojja —pea poanaje—, ojjaña cuana se ca dasia cani Jesosaa. E'e, oya Jesosa siajje poani jama ba'a: “Eya ca ca iña Eyacuiñajjija huoo-jea'yo ojjaña jaahuanajji” poani —pea Jodio cuaa acanaje, Jesosaja esohui shajja'ajja sa po ajja jje-jojo. ¹³ Jamatii Jodio etii cuanajo quea mete jjejojo joya Jesosa shajja'ajjajji epo mi mimi neineinaje; jjapashineijje ojo maimainaje. ¹⁴ Jenosanenajo Jodio cuana ojee ijija'ijjiani queabihui nee quea huiso cahuime, 7 cahuime. Ojee ijija'ijjianijo quijje pishana beca cahuime po majje Jesosa Eyacuiñajjija equi yasijke poquinaje. Equi shashajo ojjaña cuana sohuihuohui canaje. ¹⁵ Jesosaja esohui shajja'ajja majje Jodio etii cuana jama poanaje ba'a: —¡De! Ojaya eba quea huiso. ¿Achajja shai? Chama' ojaya esohui huohuijji poanaje. Esho'yahua oya dobiqui jjima de, esohui baa.

¹⁶ Jesosaa oya cuana saja'a canaje jama ba'a: —Eyaya huohuiaña miquianaya ecuea esohui

pojjeama. Eyacuiñajjiya eya huoojea canaje. Ohuaya eya huohui meesahua cani ojaya ejashahuabaquijji. ¹⁷ Ojjañaa joya Eyacuiñajjiya ejashahuabaquijji jayojja jama ba'e'yo sa poaniya ba caje e'e jojo nei eyaya huohuaña Eyacuiñajjiya ejjashahuabaquijji, ecuea ejjashahuabaquijji pojjeama. ¹⁸ Joya beca cuaa ojaya ejjashahuabaquijji huohui cani aje oe pea cuana quea bihui po meeji jama ba'a: “Oya esohui huohuijji nei; joya shajja'ajjacue!” Jamaya amee sa acani, pea esohui huohuijji cuaa. Pea jayojja jama pojjeama eya. Eyaya ca ca pea cuana bihuia mee sa aña ca ca, ecue Chii, e huoojea'yojji epo oja sohui e'e nei huohuañajo. Jamajjeya eya edasiajji pojjeama. ¹⁹ ¡Bacue! Yahuajo nei Moisesiya miquianajaya etiiquiana cuana huasijje quia ca'ya poa Eyacuiñajjiya esohui etehue'yo, miquianajaya ebajjji. Jamatii ma esohui etehue'yo jama ba'e ajja miquianaya. Moisesija etehue'yo jayojja jama eba'e'yo jojjemo e quecua'yo sa po ajja pome — Jesosa poanaje.

²⁰ Ojjaña Jodio cuaa echicha'yo nequiya huohui canaje jama ba'a: —¿Aya acuae mi quecua'yo sa acani so'o? ¡Chojja, de, miya niñepoquiani pojja'a jja mi coma! Mi quecua sa po'yo ajja ecuanaya — siajje poanaje cuana.

²¹ Jesosaa oya cuana saja'a canaje jama ba'a: —Yahuajo eyaya ma dejja aijima acani anaje miquea epojja ejomishocajjijo; oe dejja jeo'ajja poa. Eyaya oya jeo mee'yonaje. Jamajjeya miquianaya ejo jama poanaje ba'a: “Ohuaya aje oe epojja ejomishocajjijo acani; equipajaajji dojo mee cani pea'ai. Jamaya quea tai. Jamaya

pojjeama etiiquianaja ehuohui'yo” miquianaya poanaje. ²² ¡Bacue! Yahuajo nei nei ba'e etiiquianaa aca poa jayojja jama Moisesiya huohui ca poa jama ba'a: “¡Mique bacua huo'o nei, eshoi nei cuiishasha biso nei jehuisejjajeacue!” aca poa. Jamajjeya miquiaaya ebacua 8 cahuime poajo cuiishasha biso nei jehuisejjajeaña, jamatii epojja ejomishocajjiyo. ²³ Jamajjeya Moisesija etehue'yo jama poanijojo miquianajaya ebacua cuiishasha biso nei jehuisejjajeaña epojja ejomishocajjiyo. E'e, miquianaaya pea'ai epojja ejomishocajjiyo chacoaña. Jamajoya ¿apiojji acuae quiana enijje quea quene nee nee poani so'o dejja jeo'ajja jeo mee'yonajejo epojja ejomishocajjiyo? ²⁴ ¡A'a nequiaa eya niñepoqui poso ajji! Quea ja'a nee nee jjashahuabaqui majje miquea ehuohui ejo e'e jojo nei poaje, quea pame —Jesosa poanaje Eyacuiñajjija equi pejjejo nequiya sohuihuohui canijo.

Jesosa e'e jojo nei Eyacuiñajjija huoojea'yo ojjaña jaahuanajji

²⁵ Majoya quea huiso dejja cuana Jenosanenajo ba'eca ojee miminaje jama ba'a: —Jodio etii cuaa jiquio dejja quecua sa acani. ¿A'a e'e? ²⁶ ¡Bacue oe! Jjeya ohuaya ojjaña cuana sohuihuohui caqui. Jamatii oya iña jjima, mimi pajea mee jjima pea'ai, de. ¿E'e pojja'a etii cuana jjashahuabaquiani che jama ba'a: “E'e pojja'a oya Jesosa e'e jojo nei Eyacuiñajjija huoojea'yo ojjaña jaahuanajji”. E'e pojja'a, de. ²⁷ ¡De! Ecuanaja eba jiquio dejjaja ba'eiji; Quito poeyajo ca ca ojaya eba'eiji ba jjima

poaje cuanaja —poanaje cuana, Jesosa Nasane-najo cuaya poso aca poa.

²⁸ Majoya Jesosaa Eyacuiñajjija equi pejjejo sohuihuohui huicha'a huicha'a canijo, oya cuana janobajjima nei saja'a canaje: —E'e, eya miquiaaya eba poso aña. Ecuea eba'ejji miquiaaya eba pea'ai poso aña. Eya miquiana que jamatii poe jjima. Chojja, ecue Chiiya eya huoojea canaje. Ojaya esohui e'e nei. Oya miquianajaya ba jjima, de. ²⁹ Eya onijje ania poa; ohuaya eya huoojea canaje. Jamajjeya oya ecuea eba nei —Jesosa poanaje.

³⁰ Ma shajja'ajja majje Jodio etii cuana oya Jesosa Eyacuiñajjija Bacua Ejja pojjeama poso acanijo quea quene nee nee poanaje, iña sa acanaje. Jamatii iña jjima, jjeya iña mee jjima acanaje. ³¹ Quea huiso dejja ejjachichaqui nequi'yo cuana jjashahuabaquiani jama ba'a: —Jesosa e'e jojo nei Eyacuiñajjija huoojea'yo ojjaña jaahuana'yojji.

Jama poanaje pea'ai ba'a: —E'e nei Jesosa Eyacuiñajjija huoojea'yo ojjaña jaahuanajji. Chama' pea dejja Jesosa jayojja epoe o'oyajji; ma dejja aijima acani quea huiso acanaje ohuaye nei — poanaje cuana.

*Paniseo cuaa sohuinano huoojea canaje Jesosa
iñaa nisho*

³² Paniseohua shajja'ajja canaje quea huiso dejja cuana jama poani ba'a: “Jesosa Eyacuiñajjija huoojea'yo ojjaña jaahuanajji”. Ma shajja'ajja majje Paniseo etii cuaa, Eyacuiñajji nijje emimijji etii cuaa pea'ai Jodio sohuinano cuana huoojea

canaje jama ba'a: —¡Jesosa iñaquicue ejeanobiajji! —acanaje. Ma Jodio sohuinano Eyacuiñajjiya equi cuiñajji poani.

³³ Majoya Jesosaa jama sohuihuohuime acanaje ba'a: —Eya minijje nequi tiitii ajja. Ecue Chiiya eya huoojea ca poa. Quijje pishana eya poquije o'oya o que. ³⁴ Majoya eya sa'ajjaje'yo; jamatii eya miquianajaya eba'yojji pojjeama. Poqui meemee ajja enijje e ba'e yasijje —Jesosa poanaje.

³⁵ —¿Achacua shai oya poquije'yo, jocuama ecuana epoqui'yojji pojjeama pojja'a? ¿A'a oya pojja'a poquije Jieno dejja cuana huasijje, Jodio cuana Jieno nijje ba'e cuana jjaba'echejjequiani yasijje poquije pojja'a, ojaya esohui huohuiya? —Jodio cuana ojee mimimiminaje Jesosajo.

³⁶ —¿Ajeo shai Jesosa jama jjashahuab aquiani? —poanaje Jodio cuana —. “Miquiaaya eya sa'ajjaje'yo; jamatii miquianajaya eya eba'yojji pojjeama. Poqui meemee ajja ma e ba'e yasijje enijje” Jesosa poanaje, de —Jodio cuana poanaje.

³⁷ Jenosanenajo Jodio cuana ojee ij{jia}'ij{jianaje quea huiso cahuime, 7 cahuime bobi chichajji shejo. Ma pojja cuanajo quea bihui nee poanaje, yahuajo ij{jia}'ij{jia} jjimahuajo quea bihui pishana poa. Beshahua nei ij{jia}apajea ca'yanijo, quea bihui nee nee poa. Jamajjeya beshahua nei ojee ij{jia}'ij{jia} pajea'yanijo Eyacuiñajjiya equi pejjejo Jesosa que jjachichaqui o'yanaje. Jesosa taaanaje ojjaña huasijje jama ba'a: —¡Ojjaña miquianaya quea naba taja jayojja poanijo, poecue e que, ecuea e'ishijji ishiya! Enijje jjapeequi sa neinei poanijo quea naba taja jayojja jama poani; jamajjeya eyaya miquianaya ba'e tiitii meeje'yo ecuea

esohui e'e jojo nei shajja'ajjañajo. ³⁸ Jiquio ecua ena eteohuejja cuayani tii tii jayojjaya, ojjaña ishi majje naba taja'ama poani jayojja jama ojjaña joya enijje jjapeequiani eyaya ba'e tiitii meeje'yo. Majoya oya cuaa pea cuana enijje jjapeequi meesahua caje'yo pea'ai —Jesosa poanaje.

³⁹ Jesosa jjashahuab aquiani jama ba'a: — Edojjoshahua Pame poeje'yo. Dobiquije'yo ecuea epreejji cuana huasijje. Enijje jjapeequi meesahua caje'yo quea pame nee; jiquio ecua enaa caneco cuatajea cani jama jayojja quea cuata poaje Edojjoshahua Pame dobiquiajo.

Jesosa jamaya poanaje Edojjoshahua Pame ojaya epreejji cuana huasijje dobiqui jjimahuajo. Quijje Jesosa emano'yo jaa shequi o'oya majje eyahuasijje jjequisohua ca'yajo, ohuaya Edojjoshahua Pame huoojea caje ojaya epreejji cuana huasijje.

⁴⁰ Jesosaja esohui shajja'ajja majje quea huiso cuana jama poanaje ba'a: —E'e jojo nei Jesosa Eyacuiñajjija esohui huohuijji nei. Yahuajo nei Moisesiya tehue ca poa jama ba'a: “Oya poeje Eyacuiñajjija huoojea'yo ojjaña jaahuanajji poe jjimahuajo” tehue ca poa —poanaje cuana; Jesosa esohui huohuijji poso acanaje, Eyacuiñajjija huoojea'yo ojjaña jaahuanajji pojjeama poso acanaje beca cuaa.

⁴¹ Pea cuana ca ca jama poanaje ba'a: — Chojja. ¡Oya ca ca oe Eyacuiñajjija huoojea'yo ojjaña jaahuanajji e'e jojo nei, de!

Jamatii pea cuana poanaje: —Chojja, Jesosa Janinea meshijo ba'e. Eyacuiñajjija huoojea'yo ojjaña jaahuanajji ca ca Janinea meshijo pojjeama

cuayaje —acanaje cuaa, Jesosa Janinea meshijo Nasanenajo cuaya poso.

⁴² —Eyacuiñajjija esohui etehue'yo yahuajo jama poani ba'a: “Dabi emeshi mese yahuajo ba'ya poa Eyacuiñajjija huoojea'yo ojjaña jaahuanajji emeshi mese ojaya osecua poaje. Jamajjeya Dabija meshijo cuayaje, Benenajo, Jodea meshijo” —poanaje beca cuana.

⁴³ Jamaya ojjaña Jodio dejja cuaa mimicuia-jeanobia canaje Jesosajo. ⁴⁴ Beca cuaa Jesosa iña mee sa acanaje; jamatii jja'iña meequi jjima poanaje.

⁴⁵ Jamajjeya sohuinano cuana, Eyacuiñajjija equi cuiñajji, ma Paniseohua yahuajo huoojea canaje Jesosa iñaa nisho Jesosa esohui huohui poequi baqui majje huacuaya poqui'yonaje Eyacuiñajji nijje emimijji etii yasijje, Paniseo cuana pea'ai yasijje. Poeyajo, Sohuinano cuana tecuea canaje Jodio cuaa: —¿Apiojji acuae quianaja Jesosa iña jjima so'o? Ye jjima, de —poanaje.

⁴⁶ —Chama' pea dejja Jesosa jayojja jama mimime. Pea dejja o jayojja mimi jjima; ojaya esohui quea pame nee nee, de —sohuinanohua saja'ame acanaje.

⁴⁷ —¡De! Ohuaya aje mi oe dasia canaje pea'ai —sohuinano tecueame acanaje Paniseo cuaa—.

⁴⁸ ¿A'a Jodio etii cuana, ecuana pea'ai onijje jjapeequiani? ¿A'a oya shajja'ajjaña pea'ai ecuaa? Chojja, de —Paniseo cuaa acanaje—. ⁴⁹ Ojjaña jiquio dejja echicha'yo nequi ca ca Moisesija etehue'yo ba jjimajo, oya cuana Eyacuiñajjiya quea nee nee

po mee caje'yo cuaquijo —acanaje Paniseo cuaa, jjashahuaba taiquaniya jjejojo.

⁵⁰ Nicodemo, ma yahuajo Jesosa nijje miminaje mecajje Paniseo cuana nijje pea'ai nequinaje. Jamajjeya ohuaya pea Paniseo cuana jama huohui'ajjame acanaje ba'a: ⁵¹ —¡Bacue! Moisesija esohui etehue'yo yahuajo jiquio jama poanaje ba'a: “¡Oe dejja niñeba jjimahuajo, oya iyaacue! Ohuaya huohui cajje, majoya miquianaaya baje'yo oya quea mimishi pojja'a, oya mimishi'ama pojja'a”. ¿A'a e'e? —poanaje Nicodemo.

⁵² Paniseo cuaa jja oya saja'a canaje. Quea mimi tecue poanaje jama ba'a: —¿A'a miya pea'ai Janinea dejja, Janinea meshijo ba'e pea'ai? ¡Eyacuiñajjija esohui ba neineicue! Chama' poaje Eyacuiñajjija esohui huohuijji Janinea meshijo ba'ecaja, pa —poanaje Paniseo cuana.

⁵³ Majoya, siniajo ijquia'ijquia pajea majje ojjaña cuana poquinaje equi cuana huasijje cahuiya.

8

¹ Jesosa ca ca eyiyo bajjani Onimo eyiyo huasijje poquinaje. Jomajo aninaje jiquio mecajje.

Jodio cuaa epona quea mimishi Jesosa que ye canaje

² Mecajjeahua Jesosa poe o'oyanaje Eyacuiñajjija equi yasijje. Quea huiso nee nee cuana o que jjachichaqui o'oyanaje. Eyacuiñajjija equi pejjejo anioque majje Jesosaa sohuihuohui ca o'oyanaje ojjaña cuana huasijje. ³ Majoya Paniseo cuaa, Moisesija etehue'yo huohuijji cuaa pea'ai epona quea mimishi ye canaje. Pea cuaa oya ba canaje pea

dejja oja yahue pojjeama nijje jaa, pa. Jamajjeya Paniseo cuaa huohui canaje epona jama ba'a: — ¡Jesosa nequi cojja nei nequicue!

⁴ Majoya Paniseo cuaa Jesosa huohui canaje jama ba'a: —Esohui huohuijji, jiquio epona quea mimishi nee poanaje. Pea dejja oja yahue pojjeama nijje jaanaje —acanaje cuaa—. ⁵ Moisesiya yahuajo nei jama tehueme aca poa ba'a: “¡Epona pea dejja oja yahue pojjeama nijje jaajo, jajahuejjajeacue meiya!” tehueme aca poa yahuajo nei. Jamajjeya, Jesosa, ¿yajja acuae miyaya epona aje so'o? —poanaje Paniseo cuana Moisesija etehue'yo jayojja ohua mi saja'a cajje Jesosa e'iña'yojji nisho jjashahuabaquinaje. ⁶ E'e, jjashahuabaquinaje jama ba'a: —E'e pojja'a Jesosa Moisesija etehue'yo jayojja jama pojjeama mimije. Jamajjeya ecuana jama poaje: “Oya Jesosa ca ca oma siajjepoji; Moisesija esohui jayojja jama po ajja”.

Jamatii Jesosaa oya cuana saja'a jjima acanaje. Meshi pohuijo tehue canaje eme sisiya. ⁷ Paniseo cuaa eponajo huohui majamaja'ajja canaje. Jamajjeya Jesosaa Paniseo cuana cojja ba jeyojeyo neinei majje saja'a canaje jama ba'a: — ¡Miquianaaya joya mimishi'ama nei neiya ebionei mei jea coocue, jajahuejjajeacue poná! —poanaje.

⁸ Mimi majje Jesosaa meshi pohuijo tehue ca o'oyanaje. ⁹ Jesosaja esohui shajja'ajja majje Jodio dejja cuana oe cuayaqui, oe cuayaqui'yonaje esecue yasijke. Ebionei edejja tii ehui dojorji cuayaqui'ya poa; o quishishijji joya etii pishana cuayaquinaje pea'ai. Quea bicho ojjaña poanaje

quea mimishi jjejojo. Epona jeana ca'yonaje Jesosa cojja neijo nequi. ¹⁰ Jamajjeya Jesosaa nequisohua majje bajea canaje epona nequi; chama' Jodio etii cuana. Epona nijje jama poanaje ba'a: —Epona, ¿ae acuae ma mi tecueajji epo? ¿A'a mi mique mimishijo jajahuejjajea'ajja ca'yonaje cuaa? —ba majje acanaje Jesosaa.

¹¹ —Esohui huohuijji, jaja'yo jjima mo Jodio etii cuanaja. Poquinaje oya cuana ojjaña —poanaje epona.

—E'e epona, ecuea miya ejajahuejjajea'ajji pojjeama pea'ai. ¡Poquicue miya; mimishi pajea'yocue! —Jesosa poanaje epona nijje.

Majoya epona poquinaje quea bihui nee.

Jesosaa ojjaña cuana Eyacuiñajji ba mee caje

¹² Majoya epona nijje mimi majje Jesosaa sohuihuohui ca o'oyanaje ojjaña ejjachichaqui anica huasijke. Jama poanaje ba'a: —Jamatii quea apo nee neeya, cuaquijijiya jeaja'a cani mecajje. Oya jayojjaya eya poani. Eyaya dejja cuana jamatii quea mimishi nee nee poa quea ja'a nee jjashahuabaqui meeña Eyacuiñajji. Ojjaña joya ejo e'e jojo nei jjashahuabaquiani aje oe quea mimishi, quea apo pea'ai ba'e maja aija. Eyaya oya cuana ba'e tiitii meeje'yo enijje —Jesosa poanaje.

¹³ Jamajjeya pea Paniseo cuana Jesosa nijje mimijajinaje jama ba'a: —¡De! Miyaya neiya huohuaña jama ba'a: “Eyaya dejja cuana ba'e tiitii meeje'yo” poani. Miyaye nei jama huohuañajo, ecuanaja miya eshajja'ajjajji pojjeama. Chojja, de. Moisesiya yahuajo nei jama huohui ca poa ba'a:

“¡A'a oe dejjaja ehuohui shajja'ajjajji! ¡Becanejjiji pea'aiya huohui canijo oe shajja'ajjacue!” poa — poanaje Paniseo cuana.

¹⁴ Jesosaa oya cuana acanaje jama ba'a: — E'e, eya neiya poanaje eyaya ecuea epeejji cuana ba'e tiitii meeña. Jamaya e'e jojo nei eyaya aña. Ecuea eba ecue Chii e huoojeajji epo. ¿Achacua eya poquije o'oya? Ecuea eba, de. Jamatii miquianajaya maya ba jjima. Jamajjeya jecuea ehuohui ejo shajja'ajjacue! ¡Jamatii eyaye nei huohuiañajo shajja'ajjacue! ¹⁵ Dejja mimishi cuanaja ejjashahuabaquijji jama miquianaya ejo jjashahuabaquiani, quea quehua. Eya ca ca mi jayojja jama pojjeama. ¹⁶ Jamatii eyaya dejja cuanaja eba'ejji huohuiañajo, ecuea ehuohui'yo e'e nei poani. E'e, ecue Chiiya eya huoojea canaje. Ojaya ehuohui jayojja jama eyaya aña, ecuea ejjashahuabaquijji jo pojjeama. Eya ecue Chii ni jje beca. Jamajjeya ecuanaja ehuohui'yo dejja cuanajo e'e nei nei poani. ¹⁷ Miquianajaya eti-quianaja Moisesija etehue'yo jama yahuajo poa ba'a: “Becanejjiji pea'aiya oya jayojjaya huohui cajo ¡shajja'ajjacue, miquianaaya!” jamaya tehue ca poa. ¹⁸ Eyaya miya huohuiaña jama ba'a: Eyaya Eyacuiñajjija huoojea'yo ojjaña jaahuana-jjiya ecuea epeejji cuana ba'e tiitii meeje'yo. Ecue Chiiya pea'ai jama miya ba meesahua cani ba'a: “Jesosa ecue huoojea'yo” ecue Chii poani —Jesosa poanaje.

¹⁹ Jamajjeya Paniseo cuaa Jesosa huohui'ajja canaje jama ba'a: —¿Achejo acuae mique Chii ani so'o?

Jesosaa saja'a canaje jama ba'a: —
 Miquianajaya eya ba'yo jjima; ecue Chii
 miquianajaya ba'yo jjima pea'ai. E'e, eya
 miquianajaya eba jojjemo ecue Chii pea'ai bame.

²⁰ Jamaya Jesosaa sohuihuohui canaje
 Eyacuiñajija equi pejjejo nequiya, Jodio etii cuana
 ojee chacochacoani pejjejo. Jamatii Jodio etii
 cuana Jesosaja esohui shajja'ajja majje iña jjima
 poanaje jja'iña meequi ajjajojo.

Jesosaa Jodio shajjama' cuana tecuea canaje

²¹ Majoya Jesosaa ojjaña cuana huohui canaje
 jama ba'a: —Eya minijje nequi tii ajja; quijje pis-
 hana eya poquije o'oya. Quijje miquianaaya eya
 sa'ajja neineije'yo miquea mimishi cuijea'yojjii,
 mi jaahuanajji pea'ai. Jamatii miquianaya quea
 mimishi tii manoje'yojo, quea nee nee poaje'yo
 cuaquijo. Ma e poqui yani yasijje miquianaya
 epoquijji pojjeama —Jesosa poanaje.

²² Jamajjeya Jodio etii cuana ojee huohui'ajja
 canaje jama ba'a: —¿Yajjajje oya poquije? ¿A'a
 oya jjayacuaqui'yo majje mano'yo sa poani po-
 jja'a? ¿A'a jamajoya ohuaya jama acanaje ba'a:
 “Ma e poqui yani yasijje miquianaya epoquijji
 pojjeama?” —acanaje Jodio etii cuaa.

²³ Jesosa jama poanaje ba'a: —Miquianaya
 meshijo ba'e. Jamajjeya Edosiquiana jayojja
 jjashahuabaquime poani, quea tai. Eya ca
 ca iña eyajo ba'e, Eyacuiñajji jayojja jama
 eya jjashahuabaquiani. ²⁴ Jamajoya eyaya
 miya huohuinaje jama ba'a: “Miquianaya
 quea mimishi tii manoje'yojo, quea nee nee
 tii poaje'yo cuaquijo”. Eyaya miquianaya

huohuinaje eya Eyacuiñajjija huoojea'yo ojjaña jaahuanajji. Jamatii miquianaya jjashajja'ajjaqui ajja. Jamajjeya miquianaya e'e jojo nei manoje'yo mimishi cuijea'yo jjima tii. Quea nee nee poaje'yo tii tii cuaquijo —Jesosa poanaje.

²⁵ —E'e pojja'a —Jodio etii cuana poanaje. ¿Aya acuae mi huoojea canaje so'o ecuana que? ¿Ajeo miya poeyanaje jiquiacua? —Jodio cuana poanaje.

—¡De! Aje jja mi huohui huicha'a huicha'a'ajjanaje yahuajo ehuohui coojji — Jesosa poanaje —. ²⁶ Miquianaya ecuea eba quea jjashahuabaqui tai, quea mimishi poani —Jesosaa Jodio cuana acanaje—. Jamajjeya eyaya miquianaya tecueaña. Miquianaaya niñebaña ecuea ehuohui'yojo. Jamatii ecue Chiiya eya huoojea canaje; ojaya eba ojjaña; ojaya esohui e'e nei. Maya eyaya ojjaña cuana huasijke huohuiaña —Jesosa poanaje.

²⁷ Jesosaja esohui oja Chijjo Jodio etii cuana ba sa po ajja. Oya cuana jjashahuabaquiani quea tai jama ba'a: —Chojja, Jesosa Eyacuiñajjija huoojea'yo pojjeama —poso acanaje Jodio etii cuaa.

²⁸ Jamajjeya Jesosaa huohui canaje jama ba'a: —¡Bacue! Quijje eya, ojjañaja Edoe Mese miquianaaya ba'ehuanasohuajeaje'yo acui ecueata'apeejo. Majoya miquianajaya eba poaje jama ba'a: “Jesosa e'e jojo nei Eyacuiñajjija huoojea'yo ojjaña jaahuanajji”. E'e, ojaya esohui eyaya huohuiaña, ecue Chiija. Ecuea ejjashahuabaqui'yojji ca ca eyaya huohui jjima aña. ²⁹ Ecue Chiiya eya huoojea canaje. Eyaya oya quea bihui po mee sa aña tii. Jamajjeya oya enijje

yani tii tii, ohuaya eya jeanana'yo ajja —Jesosa poanaje.

³⁰ Quea huiso Jodio cuana Jesosa shajja'ajja maa-
jje jama poanaje ba'a: —E'e jojo nei nei Jesosa
Eyacuiñajji huoojea'yo ojjaña jaahuanajji. Oja
sohui e'e jojo nei—poanaje.

Eyacuiñajji bacua cuana eshahuua napa ajja

³¹ Jamajjeya quea huiso Jodio cuana Jesosa
nijje jjapeequinaje. Oya cuana Jesosaa jama
acanaje ba'a: —E'e, ecuea esohui jama ba'yani
tiijo miquianaya e shajja'ajjaji e'e jojo nei poani.
³² Jama poanijo ecuea esohui miquianajaya quea
ja'a nee poaje'yo. Ecuea esohui e'e jojo nei
poani, siajje pojjeama. Jamajjeya ecuea esohui
ba neineiyajo, miquianajaya mimishi cuana pa-
jea meeje'yo, Edosiquianaja yajjijo chaco meepa-
jeaje'yo pea'ai —Jesosa poanaje.

³³ Majoya pea Jodio cuana Jesosa nijje jjapeequi
ajjajo quea tecue jama poanaje ba'a: —Chojja.
Amajama ecuanaja etiiquiana, de. Jamajjeya pea
cuana jaya ecuana ehuoojea'yojji pojjeama peaja ya-
jjijo chacochacohua sosema'—siajje poanaje oya
cuana—. ¿Yajjajje miya jama poanaje ba'a: “Eyaya
miquianaya chacochaco pajea meeje'yo peaja ya-
jjijo?” —poanaje Jodio cuana.

³⁴ Jesosaa oya saja'a canaje: —E'e jojo nei ojjaña
joya quea mimishi poani ca ca o huoojea'yojji
Edosiquiana bajjani jayojja jama poani tii, quea
mimishi. Ojaya yajjijo chacopajea meemee ajja
jama jayojjaya aña miquianaya, miquianajaya
mimishi pajea'yo ajjajo. ³⁵ ¡Bacue! Echacojji ba'e
tiitii ajja echacojji meseja equijo. Oja bacua ca ca

oe onijje ba'e tiitije'yo. Miquiana huoojea'yojji Edosiquiana bajjani quea mimishi; ojaya yajjijo miquianaya sosema' chacochacoani. Jamajoya miquianaya ba'e tiitii mee ajja Eyacuiñajji nijje. E shajja'ajjajji poani ca ca Eyacuiñajji nijje ba'e tiitije'yo oja bacua jjejojoya. ³⁶ Jamajoya eyaya, Eyacuiñajji Bacua Ejjaamiquianaya mimishi pa-jea meesahuaje'yo. Jamajjeya miquianaya e'e jojo nei Edosiquianaja huoojea'yo pojjeama poaje'yo. ³⁷ E'e, ecuea eba Amajama miquianajaya eti-iquiana poa. Jamatii miquianaya ecuea esohui shajja'ajja sa po'yo ajja nei nei. Jamajjeya miquiaaya eya quecua sa aña. ³⁸ Miquianaaya mi huoojeajji jayojja jama atiitiiaña quea tai. Oya Edosiquiana huoojeajji poani, Satanasa bajjaniya. Eyaya ca ca huohuiaña ojjaña ecue Chiija ej-jashahuabaquijji quea pame —Jesosa poanaje.

³⁹ —Chojja —Jodio cuana po nishonaje—, Amajama ecuanaja etiiquiana. Ohuaya jayojja jama aña ecuanaa quea pame —poanaje.

—Chojja —Jesosaa Jodio etii cuana saja'ame acanaje—. Amajama quea pame, miquianajaya etiiquiana mese poa; jamatii miquianaya o jayojja quea pame po'yo ajja. ¿Yajjajo acuae miquianaya o jayojja mi po'yani? ⁴⁰ Eyaya Eyacuiñajji esohui e'e nei huohuinajejo, miquianaya shajja'ajja sa po ajja. Jamajjeya eya miquianaaya quecua sa aña. Amajama ca ca jama po'yo ajja; quea pame nee oya. ⁴¹ Miquianaaya aje oe mi huoojeajji ehuhui quea tai jayojja jama atiitiiaña, Edosiquianaja ehuhui jama —Jesosa poanaje.

Jamatii Jodio etii cuana quenequenena. Jama poanaje ba'a: —Chojja, Eyacuiñajji e'e jojo nei

ecuanaja Chii. Ecuana ojaya ebacua cuana quea
pame poani, de —poanaje Jodio etii cuana.

⁴² Jesosaa oya cuana huohui canaje jama ba'a:
—Eya Eyacuiñajji nijje ani poeyanaje jiquiacua,
jiquio meshi yasijke. Eyacuiñajji miquianaja Chii
pojjeamajo eya miquianaaya boti'ama aña. E'e,
Eyacuiñajjiya eya huoojea canaje; eya jamatii
poe'yo jjima. Chojja, ohuaya eya huoojea canaje.

⁴³ ¿Apiojji acuae miquianaya ejo jjabahuejjaqui
jjima? Miya ca mi ca oe e shajja'ajja sa po'yo ajja
tii nequi. ⁴⁴ E'e, Edosiquiana huoojeajji poani mi
huoojeajji poani; ojaya ejjashahuabaquijji jama
atiitii'yо sa poani miquianaya. Yahuajo nei nei
oya ona quecua coo'yojji poa. Eyacuiñajjiya esohui
e'e nei jayojja jama ojaya ajjima pea'ai poa; esohui
ojaya boti'ama nei nei poa. Oya siajje poani tii tii,
siajjepoiji nei nei. Oya ca ca oma siajje po coonaje;
siajjepoiji cuana huoojeajji poani. Ojjaña siaj-
jepoiji cuana ojaya epreejji cuana, Edosiquiana
epreejji. ⁴⁵ Eyaya miquianaya Eyacuiñajjiya esohui
e'e nei huohuaña. Jamatii miquianaaya eya sha-
jja'ajja jjima aña. Edosiquiana jayojja miquianaya
jjashahuabaquiani. ⁴⁶ Miquianaya ejo jama po
ajja ba'a: "Jesosa quea mimishi". Chojja de. Jama-
jjeya eya esohui e'e nei huohuañajo, ¿apiojji acuae
ecue huohui shajja'ajja jjima tii aña so'o? —Jesosa
poanaje—. ⁴⁷ ¡Bacue! Ojjaña Eyacuiñajjiya epreejjiya
oja sohui shajja'ajja cani tii. Miquianaya ca ca
Eyacuiñajjiya epreejji pojjeama jjejojo ojaya esohui
shajja'ajja sa po'yo ajja tii —Jesosa poanaje.

⁴⁸ Majoya Jodio etii cuaa quenequene majje
jama acanaje ba'a: —¡Miya ca mi ca oe Samania
dejja tai, niñepoqui!

49 —Chojja —Jesosaa acanaje—, eya niñepoqui pojjeama. Ecue huohui ecue Chijo e'e nei. Eyaya oya bihuiña quea ja'a nee. Miquianaaya ca ca eya niñebaña —Jesosaa Jodio etii cuana acanaje—.

50 Eya onaya ejo mimi mee sa po'yo ajja jama ba'a: “Jesosa quea pame nee, ¡oya bihuiacuel!” Chojja, eyaya dejja jamaya epo mee'yojji pojjeama ejo. Ecue Chii ca ca ejo jjashahuabiquiani quea pame nee; e'e jojo nei ejo huohui cani ohuaya —Jesosa poanaje—. **51** Eyaya miquianaya e'e jojo nei huohuiña jama ba'a: Ojjaña joya e shajja'ajja neineijji poani ba'e tiitii meeje'yo, oya cuana ca ca emano'yojji jo mete'ama poaje'yo pea'ai —Jesosa poanaje.

52 Maya shajja'ajja majje Jodio cuaa Jesosa jama acanaje ba'a: —Miquea ehuohui emano'yojji jo ecuanaja eba miya e'e jojo nei niñepoqui poani eshahuaa napa canijo. ¡Bacue! Yahuajo ecuanaja etiiquiana Amajama mano'ya poa. Eyacuiñajjija esohui huohuijji cuana yahuajo ba'e mano'ya poa pea'ai. Jamatii jjeya miyaya huohuiña jama ba'a: “Ecuea esohui jayojja jama ba'yanijo emano'yojji pojjeama miquianaya cuana poaje”. ¡Dee! **53** Ecuanaja etiiquiana Amajama quea pame nee, quea ca'a nee poa; jamatii oya mano'ya poa. ¿A'a miyaya ma Amajamaja ajjima aje'yo? Jesosa, ¿a'a miyaya emano'yo cuana shequi meeje'yo? Eyacuiñajjija esohui huohuijji cuana yahuajo nei ba'e poquijeyo'ya poa pea'ai, de. ¿A'a miya pea dejja jayojja jama pojjeama? ¿A'a miyaya ojjaña baña quea ja'a nee? Chojja, siajje miya poani —Jodio cuana mimijaji majamajanaje Jesosa nijje.

54 Jamajjeyaya Jesosaa ojjaña cuana huohui

canaje jama ba'a: —Eya onaya ejo mimi mee sa po'yo ajja jama ba'a: "Jesosa quea tame nee, joya bihuiacue!" Chojja de, Eyacuiñajjiya, ecue Chiiya ca ca oe eya quea jea acani. Jamaya eyaya saña. E'e, ecue Chiiya ejo jama huohui cani ba'a: "Jiquio ecuea Ebacua Ejja quea tame nee nee, quea ca'a nee nee; joya shajja'ajjacue!" poani ecue Chii. Ecue Chiijo miquianaya jama siajje poani ba'a: "Ecuana Eyacuiñajji, oya ecuanaja eba".⁵⁵ Chojja de. Oya miquianajaya ba jjima, de. Miquianaya siajje poani. Eya ca ca siajje po ajja. Oya ecuea eba nei nei; eya siajjepoiji pojjeama. Eyaya oya baña; ojaya esohui shajja'ajjaña; ojaya esohui jayojja jama poani tii tii.⁵⁶ Yahuajo nei miquianajaya etiiquiana Amajama quea bihui nee nee jjashahuabaquinaje ecuea epoe'yojjijo quijje nei. E'e, Eyacuiñajjiya yahuajo Amajama ba mee ca poa jama ba'a: Eya, Eyacuiñajjiya huoojea'yo ojjaña jaahuanajji quijje meshi yasijje poeje'yo. Ma ba majje quea bihui nee nee Amajama poa —Jesosa poanaje.

⁵⁷ Majoya Jodio cuaa Jesosa jama acanaje ba'a: —Chojja de, miya siajje poani, de. Miya esho'i,⁵⁰ cui'ao sheme po jjima miya de. Amajama ca ca yahuajo nei nei ba'ya poa. Oya miquea ba jjima, de —poanaje Jodio cuana.

⁵⁸ —¡Shajja'ajjacue! —Jesosaa saja'a canaje —. Eyaya miya e'e jojo nei huohuaña: Amajama cuaya jjimahuajo tii eya yaña tiia poa. Eya ca iña Eyacuiñajji nei —Jesosa poanaje.

⁵⁹ Ma shajja'ajja majje Jesosa siajje poani poso Jodio cuaa mei iña canaje o jajahuejjajeajji nisho. Jamatii Jesosa chama' poanaje. Jesosa quea huiso

dejja tejjee nequijje quehua cuayaquinaje Eyacuiñajjija equi esecue jjani yasijke. Poquinaje.

9

Cojjama' cuaya jjabapoijaqui mee canaje Jesosaa

¹ Quijje pea pojajo, ejomishocajji pojajo Jesosa ecuana nijje, o shajja'ajjajji cuana nijje ejiojjije poquijeya ohuaya ba canaje oe dejja cojjama' cuaya. ² Ba majje ecuanaa Jesosa huohui'ajjanaje jama ba'a: —Esohui huohuijji, ¿yajjaje acuae jiquio cojjama' cuayanaje so'o? ¿A'a ojaya mimishijo pojja'a? ¿A'a oja chiija, oja naeja mimishijo pojja'a? —poanaje.

³ —Chojja —Jesosaa ecuana saja'a canaje—, oya cojjama' cuaya poa ojaya mimishijo pojjeama, oja chii, oja nae cuanaja mimishijo pojjeama pea'ai. Oya jamatii cojjama' cuaya mee ca poa. Jamajjeya eyaya oya jjabapoijaqui meeje'yo. Ba majje ojjaña cuaa bihuia caje: “E'e, Eyacuiñajjija Jesosa jjabapoijaqui mee canaje cojjama'; quea ca'a nee oya, quea pame nee nee” acaje —Jesosa poanaje—. ⁴ Eyacuiñajjija eya huoojea canaje o chacojjii. Jamajjeya jjeya eya miquiana nijje nequianijo Eyacuiñajjijo chacoña. Quijje eya miquiana nijje nequi ajja jiquiojo. Eyacuiñajjijo chaco majamaja majje eya manoje'yo. ⁵ Meshijo nequiya eyaya ojjaña cuana Eyacuiñajjija esohui ba meeña. Eya cuaquijiji jayojja jama poani. Jiquio ecua cuaquijijiya jeaja'a canijo dejja cuana poquiquehua ajja mecajje quea apojo jama jayojja eyaya ojjaña cuana Eyacuiñajjijo quea ja'a jjashahuabaqui meeña.

6 Jamaya mimi majje Jesosaa cuichojea canaje meshi pohui yasijje. Cojjamaja ecojja iñapepa canaje meshi choeya. **7** Majoya cojjama' huohui canaje: —¡Poquicue miya; ecojja shacuaquicue ena eteohuejja huasijje, Sinoe' bajjani yasijje! — poanaje. (Ma ena eteohuejja Ese Ejjaja esohuijo: Eyacuiñajija huoojea'yo ena bajjani.)

Jamajjeya cojjama' poquinaje ena eteohuejja huasijje ecojja shacuaa. Ecojja shacua majje jjabapojaquinaje. Equi yasijje poe o'oyanaje cojjajji. **8** Jamajjeya dejja cuaa o pejjejo ba'ecaa, pea cuaa yahuajo oya meme ani ba canajeya pea'ai oya cojjajji ba ca'yonaje. Ba'yo majje ojee mimimiminaje jama ba'a: —Jiquio dejja yahuajo cojjama' e'anioque ani meme ani eseyaya banaje. ¿A'a e'e? —poanaje.

—E'e, oyaya jja coma —beca cuana poanaje.

—Chojja, pea coma; cojjama' jayojja coma —pea cuana poanaje.

9 Oya yahuajo cojjama' jama poanaje ba'a: — E'e, eya iquio ma yahuajo cojjama' cuaya poaya. Jjeya eya cojjajji —cojjama' poanaje.

10 —E'e nei. ¿Yajjajje acuae mi cojjajji'yo? ¿Yajjajje acuae mi po'yonaje? Jjeya miya cojjajji'yo —jama huohui'ajja neineimeya acanaje cuaa.

11 Ohuaya saja'a canaje: —Jesosa bajjaniya mo cuichojea canaje meshi pohui tejjee. Ecuea ecojja iñapepa canaje meshi choeya. Majoya eya huoojea canaje Sinoe' ena eteohuejja huasijje ecojja shacuaa. Jamajjeya eya poquinaje. Ecojja shacuaqui majje eya jjabapojaquinaje —acanaje.

¹² —¿A'a e'e? —ojjaña cuana poanaje —.
¿Achacua acuae ani oya Jesosa jjeya so'o? —
poanaje.

—Cua'a de, ecuea oya ba jjima ecojjaja —
poanaje.

Paniseo cuaa dejja yahuajo cojjama' cuaya ba canaje

¹³ Jamajjeya pea mecahuajje o pejjejo ba'e
cuaa ma dejja yahuajo cojjama' cuaya poa jje-
qui canaje Paniseo cuanaja ebajji. ¹⁴ Jesosaa
meshi pohui ecuichojea ecojja huasijje iñapepa
cajje jjabapojaqui mee canaje epojja ejomishoca-
jjijo. ¹⁵ Jamajjeya Paniseo cuaa ma ba majje huo-
hui'ajja ca o'oyanaje jama ba'a: —¿Yajjajje acuae
mi cojjajji'yo? ¿Yajja acuae mi poanaje so'o? —
poanaje Paniseo cuana.

—Jesosaa ecuea ecojja iñapepa canaje meshi
choeya. Majoya ecojja shaculaqui majje eya
jjabapojaquinaje —poanaje ma dejja.

¹⁶ Jamatii beca Paniseo cuaa huohui canaje
jama ba'a: —Ma dejja Jesosa bajjaniya ca ca oe
epojja ejomishocajjijo chaco cani, de —poanaje
Paneseo cuana. Jamajjeya Jesosa Eyacuiñajjija
huoojea'yo pojjeama poso jjashahuabaquime
poanaje.

Pea Paniseohua jama acanaje ba'a: —Chojja de,
ohuaya cojjama' cuaya jjabapojaqui mee canaje,
pa. Jamaya pea cuana poanaje. Jamajjeya
oya mimishi'ama. Dejja mimishiya jamaya po
meemee'yo ajja —poanaje.

Jamajjeya Jesosajo ojee jjamimicuiajea nobia-
jeaquinaje Paniseo cuana. ¹⁷ Jamajjeya oya cuaa

ma dejja yahuajo cojjama' cuaya huohui'ajja ca o'oyanaje: —¿Yajja acuae mijo poanaje Jesosa so'o? Jesosaa miya jjabapoijaqui mee canaje, pa cuana poani. Jamajjeya ¿yajja acuae miya poani Jesosajo so'o? ¿A'ya cuae oya? —poanaje Paniseo cuana.

—Jesosa Eyacuiñajjija esohui huohuijji e'e jojo nei —saja'ame acanaje cojjama' cuayaa.

¹⁸ Jamatii Jodio etii cuana jjashahuabaqui sa po'yo ajja jama ba'a: —Oya cojjama' cuaya poa, jjabapoijaqui mee canaje Jesosaa.

¹⁹ Jamajjeya oja chii, ojaya enaese pea'ai iyaa canaje. Poeyajo, huohui'ajja canaje: —¿A'a jiquio miquea ebacua ejja cojjama' cuaya poa? ¿Yajjajje acuae oya jjeya cojjajji? ¡Huohuicue ecuana! — poanaje.

²⁰ Echii mese jama poanaje ba'a: —E'e, jiquio ecuanaja ebacua ejja. Yahuajo oya cuaya poa cojjama' nei. ²¹ ¿Yajjajje shai oya cojjajji'yo jjeya? Ecuanajaya ba jjima. ¿Aya acuae oya jjabapoijaqui mee canaje so'o? Ecuanaja ba jjima. ¿Apiojji acuae iñaya nequiaa huohui'ajjaña? Oya oe huohui'ajja socue; oya etii, esho'i pojjeama. ¡Ohuaya oe huohui cacue! —poanaje echii mese, enaese pea'ai.

²² Jamaya poanaje oya cuana, Jodio etii cuanajo quea mete jjejojoya. E'e, Jodio etii yahuajo jama poanaje ba'a: “Jesosa Eyacuiñajjija huoo-jea'yo ojjaña jaahuanajji, ja'a jama huohuime ajji! Jama mimime poajo jja oe ecuaaya miquianaya Jodioja equi ojee ejjachichaquijjiyo esecue yasijje huoojeacuayaje'yo” poanaje Jodio etii cuana. ²³ Quea mete poanaje oja chii, ojaya enaese cuana pea'ai. Jamajoya oja chiyya, ojaya enaeseya Jodio

etii cuana huohui canaje jama ba'a: —¡Oya oe huohui'ajjacue! Oya esho'i pojjeama, etii nojinoji.

²⁴ Jamajjeya Jodio etii cuaa ma dejja cojjama' cuaya poa iyaa ca o'oyanaje ehuohuijji jama ba'a: —¡Bacue! Ecuana jama eba jiquio dejja Jesosa quea mimishi. Jamajjeya Eyacuiñajji oe nei bihuiacue jama ba'a: “Eyacuiñajji quea pame nee nee; jama-jjeya eya ohuaya jjabapojaqui mee canaje ohuaye nei” —Jodio etii cuaa acanaje.

²⁵ Cojjama' cuayaa saja'a canaje jama ba'a: —Miquianaya: “Jesosa quea mimishi” poani. Oya quea mimishi poani jojjemo eya jjabaqui aija tii pome. Ecua eba nei nei eya cojjama' cuaya poa; eya jjeya cojjajji'yo, oja jjabapojaqui mee'yo —poanaje cojjama'!

²⁶ Majoya oya huohui'ajja ca o'oyanaje Jodio etii cuaa jama ba'a: —¿Yajja acuae mijo poanaje Jesosa? ¿Yajja acuae mi cojja aca'yonaje so'o? —poanaje cuana.

²⁷ —E'e, eyaya miquianaya yahuajo huohuinaje Jesosa. Jamatii miquianaya jjashajja'ajjaqui aija —oya poanaje—. ¿Apiojji acuae eya shajja'ajja o'oya sa aña so'o? ¿E'e pojja'a miquianaya o shajja'ajjajji poaje'yo? —poanaje cojjama' cuaya etii cuana nijje.

²⁸ Majoya Jodio etii cuana onijje mimijajinaje jama ba'a: —Miya ca mi ca oe Jesosaja epeejji. Ecuana ca ca oe Moisesija esohui shajja'ajjajji poani. ²⁹ Ecuana jama eba e'e jojo nei Eyacuiñajji yahuajo nei Moisesi nijje mimia poa. ¿Jesosa shai ajea huoojea jiquiacua? Cua'a de. Ba jjima ecuana —mimitecuetecueame poanaje Jodio etii.

30—E'e pojja'a, de,—cojjama' cuayaa oya cuana acanaje; ¿apiojji shai oya miquianajaya eba pojjeama so'o de? ¿A'a miquianajaya ba jjima Jesosa huoojeajji epo? ¡Bacue oe! Eya ohuaya jjabapojaqui mee canaje. **31** Eyacuiñajjiya ca ca dejja quea mimishija esohui eshajja'ajjajji pojjeama onijje mimianijo. Ohuaya dejja quea pameja esohui shajja'ajja cani, oja sohui jayojja jama poanijo. **32** Yahuajo nei, jjeya nei pea'ai chama' pea dejja Jesosa jayojja. E'e, eya yahuajo cojjama' cuaya poa. Jjeya eya ohuaya cojjajji po mee canaje. Yahuajo nei nei meshi pana cajeahuajo chama' dejja poa Jesosa jayojja. Jjeya nei pea'ai chama' pea dejja Jesosa jama. Pea cuaa ohuaya jayojja jama a'ajja. **33** Jesosa Eyacuiñajjiya huoojea jjima poa jojjemo ohuaya ma dejja ajjima acani ajjima aca quiaye, eya jamatii anijea quiaye —poanaje cojjama' Jodio etii cuana nijje.

34 Oja sohui quea pame shajja'ajja sa po ajjajojo Jodio etii cuana quea quene nee nee poanaje. Tecuea canaje jama ba'a: —¡De! Miya quea mimishi nee nee jjejojo cojjama' cuaya poa; miya Eyacuiñajjiya cajaa. ¿A'a ecuaaya miya shajja'ajjaje? Chojja. ¡Poquicue miya! ¡A'a jiquicua poe o'oyajjl! ¡Ecuanaaja ojee ejjachichaquijji equi yasijje a'a poe o'oya tiitijji! —jamaya Jodio etii cuaa oya huoojeacuayajea canaje.

Joya Eyacuiñajji ba po jjima cuana cojjama' jayojja

35 Majoya pea cuaa Jesosa huohuiqui canaje jama ba'a: —Jodio etii cuaa cojjama' cajaa

acanaje; Jodioja equi ojee ejjachichaquijji esecue yasijke huoojeacuayajea canaje, pa —poanaje.

Jamajjeya Jesosaa oya sa'ajja canaje. Ba'yo ma-jje huohui'ajja canaje jama ba'a: —¿A'a miquea eba Eyacuiñajjija Bacua Ejja, Eyacuiñajjija huoo-jea'yo ojjaña jaahuanajji? —acanaje.

36 —Esohui huohuijji, oya ecuea ba jjima. ¡Oya mo ba meecue! Onijje iña jjapeequi'yo sa poani —poanaje.

37 —Eya jja iña iquo, de —Jesosa poanaje—, ma Eyacuiñajjija huoojea'yo ojjaña jaahuanajji poani. Miya jjeyahua nei Eyacuiñajjija Bacua Ejja nijje mimiani. Eya jja iña iquo, de —Jesosaa acanaje.

38 Majoya ohuaya Jesosa bihuia canaje ecui'oshajjajo nequi majje. Jama poanaje ba'a: —Ecuea Emeshi Mese, ¡eya miquea epeeiji nei nei! —poanaje dejja cojjama' oja jjabapojaqui mee'yo.

39 —E'e nei —Jesosa poanaje—, ecue Chiiya eya meshi yasijke huoojea canaje; huohui canaje jama ba'a: “¡Baqicue! ¿Achajja shai ojjaña cuana jjashahuabaquiani mijo? ¡Ba'ajjaqui socue!” Ey-acuiñajjija aca poa eya. Jiquio ecua cojjama' jjabapojaqui mee'yaña jayojjaya eyaya ojjaña joya yahuajo Eyacuiñajjija esohui ba po jjima ba meesahuaje'yo. Ojjaña joya Eyacuiñajjija esohui ba nisho epo ecuea Eyacuiñajjija esohui eba meeiji pojjeama. Jamajjeya oya cuana cojjama' jayojja tii poaje —Jesosa poanaje.

40 Paniseo cuana jomajo nequi Jesosaja esohui shajja'ajja majje jama onijje poanaje ba'a: —¿A'a miya jjashahuabaquiani ecuanajo; Eyacuiñajjija

esohui eba pojjeama ecuanajaya, jamajjeya coj-jama' jayojja poani? —poanaje Jodio etii cuana.

⁴¹—E'e—Jesosaa saja'a canaje—, miquianajaya Eyacuiñajji esohui ba jjima nei nei jojjemo eyaya miquianaya ba mee'yome. Cojjama' jjabapoijjaqui meenaje jama eyaya miquianaya amee'yome. E'e, eyaya miquianaya Eyacuiñajji esohui ba mee'yome quea ja'a nee. Jamatii miquianaaya Eyacuiñajji esohui ba neinei nishoañajo, Eyacuiñajjiya miquianaya tecuea caje'yo; quea nee nee po mee caje'yo cuaquijo —Jesosa poanaje.

10

Ñajjajja cuiñajji jayojja jama Jesosa ojaya epiejji jaahuanajji

¹ Majoya Jesosa ojjaña nijje jama poanaje pe'a'i ba'a: —Ecuea esohui ejjashahuabaqui meeiji ñajjajja cuiñajji jama ba'a: Ñajjajja jaahuanajjiya ñajjajja cuana jijojo cahui mee cani, ijjiacajji mase cuaa e'ijjia ca poajejje. Ejaahuanajji jiyo esecue jjanijo jaani, esecue jjani queya cani. Siipojji cuana ca ca ñajjajja jiyoyje nequisohua majje quehua dobiquiani. Oya cuana siipojji jjejojo esecuejje dobiqui ajja. ² Ñajjajja jaahuanajji ca ca esecuejje dobiquiani, de. ³ Jiyo esecue cuiñajjiya esecue ca'apejo cani ñajjajja cuiñajji dobiquiji. Dobiqui majje ejaahuanajjiya ojaya ñajjajja iyaa cani. Iyaa cajje o que poeyani. Ñajjajja jaahuanajji ehui dojorji poquiani esecue yasijke. ⁴ Cuayaqui majje ñajjajja cuana o quiquisijji poquiani. E'e, ejaahuanajjiya esohui ojaya ñajjajjaja

eba, eshajja'ajjajji. Jamajjeya o quiquisijji poquiani. ⁵ Peaa iyaa cajje ñajjajja shajja'ajja jjima acani; poe ajja. Jamajjeya oya ñajjajja poqui ajja pea nijje; ba jjimajo cuajicuajiquehuajejananani —Jesosa poanaje.

⁶ Jesosaja sohui ejjashahuabaqui meeiji ohuaya huohui canaje Jodio cuana huasijje. Jamatii ojaya, Jodio cuanaja quea quehua; jama acanaje ba'a: —¿Ajeo acuae ca oya mimiani ecuana nijje? —poanaje.

⁷ Jamajjeya Jesosaa oya cuana huohui ca o'oyanaje: —¡Bacue, oe! Eya, Jesosa esecue jjani jayojja jama poani. Ecuea epeejji dobiqui meesahuaña. ⁸ Ojjaña ejaahuanajji nisho cuana ca ca sii sa poani. Jiquio ecua ñajjajja peaja esohui ba jjimajo pea nijje poquiquehua ajja jama jayojja ecuea epeejji nei nei esohui huohuiji nishojo jjashajja'ajjaqui ajja —Jesosa poanaje—.

⁹ E'e, eya esecue jjani jayojja poani; ojjañaa eya shajja'ajja canijo, enijke jjapeequianijo pea'ai, eyaya oya cuana ba'e tiitii meeje'yo enijke. Jiquio ecua ñajjajja jaahuanajjiya ojaya ñajjajja esecuejje dojocuayaqui cani bobi ijjiaa, jiyo huasijje jaahuanana cani pea'ai jayojja jama eyaya ecuea epeejji ba'e meesahuaña quea pame nee, Eyacuiñajjiya esohui jama —Jesosa poanaje —.

¹⁰ Siipojji poeyani ñajjajja siiya, cuaquisho meeya pea'ai, quecuaa pea'ai. Jamaya esohui huohuiji nisho cuana siajje poani, sii cani, ecuea epeejji cuana poquiquehua mee cani eshahua nijje, de. Eya ca ca poeyanaje quea ja'a nee nee ba'e meeya, pea ejjashahuabaquijjijo ba'e meeya.

¹¹ —E'e, eya ñajjajja cuiñajji quea pame nee jayojja jama poani. Ñajjajja cuiñajjiya ojaya ñajjajja nahue neinei cani ijjiacajji maseya e'ijjia ca poaje jjejojo. Oya jayojja eya manoje'yo ecuea epeeiji cuana ba'e tiitii mee'yojji. ¹² Echacojji ca ca eñajjajja mese pojjeama jjejojo ijjiacajji mase ba majje cuajicuajinanani; ñajjajja jeajea cananani. Jamajje ijjiacajji maseya ñajjajja cuana ijjia cani; poquiquehuajeanana mee cani pea'ai. ¹³ Ñajjajja cuana ojaya nahue'ama. Echacojji cuajicuajijeananani, ojaya pojteamajojo mi nahue cani — Jesosa poanaje.

¹⁴ —Eya ca ca ñajjajja cuiñajji quea pame nee jayojja jama poani. Ecue Chiiya eya quea jea nee acani; oya ecuea quea jea nee pea'ai. Oya jayojjaya eyaya ecuea epeeiji cuana quea jea nee nee aña; eya ecuea epeeijiya quea jea nee pea'ai. ¹⁵ Jamajjeya eyaya oya cuana nahue neineiaña, ecuea epeeiji cuana. Jamajjeya ojaya mimishi cuijea'yojji eya manoje'yo ona ba'e tiitii mee'yojji —Jesosa poanaje—. ¹⁶ Pea cuana yani pea'ai, Jodio cuana pojjeama. Ohuaya pea'ai ecuea esohui shajja'ajja caje'yo. Ecuea epeeiji poaje'yo pea'ai. Eyaya oya cuana jjapeequi meesahuaje'yo pea'ai. Jamajjeya ojjaña cuana ojee cajjapeequiahua; eya ca ca oe o jaahuanajji poaje'yo —Jesosa poanaje.

¹⁷ —Ecue Chiiya eya huoojea canaje ojjaña jaahuanaa. Jamajjeya ecuea epeeiji ba'e tiitii mee'yojji eya manoje'yo, ona nahuejo. E'e, e quecua'yojji yani. Jamatii eya quecua ca'yajje shequije o'oya mo. Jamajjeya eya ecue Chiiya quea jea nee nee. ¹⁸ Eya quea ca'a nee nee poani. Jamajjeya

ecuea epeejjijo mano'yo sa po'yo ajja jojjemo pea cuaa eya equecua'yojji pojjeama pome. Jamatii eya manoje'yo jama poani ba'a: “E'e, ecuea epeejjija mimishi cuijea'yojji mano'yo sa poanijo eya manoje'yo”. Mano'yo majje eya shequije o'oya. Ecue Chiiya eya jamaya huoojeame aca poa — Jesosa poanaje Jodio cuana nijje.

¹⁹ Jesosaja esohui shajja'ajja majje Jodio cuana ojee jjamimicuiajea nobiajequinaje jama ba'a: ²⁰ —¡Oya Jesosa niñepoqui, de! ¡Oya quea jjashahuabaqui tai mimime poani! ¡A'a oya shajja'ajjaji! —poanaje beca cuana.

²¹ —Chojja, de oya niñepoqui pojjeama. Esohui quea pame nee nee huohui cani. Ohuaya ca ca oe cojjama' cuaya jjabapojaqui mee ca'yonaje. Jamaya po ajja niñepoqui cuana —poanaje pea cuanā.

Jodio cuana ojee jjachichaqui'yajo, Jesosaa huohui ca o'oyanaje jama ba'a: —Eya Eyacuiñajjija Bacua Ejja e'e jojo nei

²² Quijje eeno shejo ojjaña Jodio cuana Jenosanena huasijje ojee jjachichaqui o'oyanaje. Quea bihui nee poanaje ma shejo. E'e, ma shejo yahuajo nei Eyacuiñajjija equi pea iya ca o'oya poa quea bame nee. Jamajjeya ma shejoya ma shahuaba tiitii capoquiani Eyacuiñajji bihuia capoqui tiitiiani. Cuaquijiji sisi dedo cani quea cahui huiso.

²³ Ma shejo Jesosa Eyacuiñajjija equi yasijje poqui o'oyanaje. ²⁴ Equi quibojo jeojeonequinaje. Jodio dejja cuana o que jjachichaquinaje. Jama huohui'ajjame acanaje ba'a: —Jesosa, ¿apiojji miyaya ecuana huohui jjima? ¡A'a miya Eyacuiñajjija

huoojea'yo ojjaña jaahuanajji? ¡Ecuana e'e nei huohuicue quea ja'a nee! —poanaje Jodio cuana.

²⁵ Jesosaa oya cuana jama acanaje ba'a: —E'e, eyaya miquianaya huohui huicha'a huicha'anaje yahuajo. Jamatii jjashajja'ajjaqui ajja. Ecue Chiiya eya ma dejjaajjima acani ameesahua cani miquianajaya ebajji nisho eya oja huoojea'yo ojjaña jaahuanajji. ²⁶ Jamatii miquianaya jjashajja'ajjaqui sa po ajja ecuea epeejji pojjeama jjejjojya. Jamaya eyaya miquianaya huohuinaje ba'a: “Ejaahuanajji emimi ojaya ñajjajjaja eba; jamajjeya onijje poquiani”. ²⁷ Jama jayojjaya ecuea epeejji cuaa ecue sohui shajja'ajja cani, enijje poquiani tii pea'aiya. E'e, ecuea epeejji cuana ecuea eba. ²⁸ Eyaya oya cuana ba'e titii meeña. Jamajjeya oya cuana quea nee nee epo mee'yojji pojjeama cuaquijo, Eyacuiñajjiya. Eyaya ecuea epeejji cuana jaahuanajjo pea cuaa oya ecuaquisho meeiji pojjeama eshahua nijje. ²⁹ Ecue Chiiya, Eyacuiñajjiya ecuea epeejji cuana enijje jjapee meequi cani. Oya oe nei quea ca'a nee nee; pea cuana ca'a'ama. Ohuaya oya cuana jaahuanajjo cuaquisho meemee ajja eshahua nijje. ³⁰ E'e jojo nei eya ecue Chii jayojjaya poani tii —Jesosa poanaje.

³¹ Ma shajja'ajja majje Jodio etii cuaa mei ña ca o'oyanaje Jesosa jajahuejjajeajji nisho. ³² Jamajjeya Jesosaa oya cuana acanaje: —Ecue Chiiya eya quea pame nee ma dejjaajjima acani amee cani. Jamajjeya ¿apiojji acuae iña jajahuejjajea sa aña so'o meiya? —huohui'ajjame acanaje Jesosaa.

³³ —Chojja, mi jajahuejjajea sa po ajja ca ca ecuana miyaya ma dejjaajjima acani quea pame añajo. Miya siajje poanijo ca mi ca oe jajahuejjajeame. Miya aje mi dejja; jamajjeya ¿apiojji acuae oe miyaya jama huohuime aña ba'a: “Eya Eyacuiñajji jayojja tiiya” poani? —Jodio etii cuaa Jesosa Eyacuiñajji Bacua pojjeama poso tii acanaje.

³⁴ Majoya Jesosaa oya cuana jama acanaje ba'a: —Miquianajaya eba Eyacuiñajji yahuajo nei nei tehue mee ca poa Jodio jaahuanajji cuanajo jama ba'a: “Miquianaya Eyacuiñajji jayojja poani”. Jama tehuemeya aca poa yahuajo.

³⁵ Jamajjeya ¡Eyacuiñajji etehue'yo e'e nei shajja'ajja tiitiicue! Ma etehue'yo ohuaya huohui ca poa Jodio esohui huohuijji Eyacuiñajji jayojjaya poa. ³⁶ Jamajjeya eya ca ca oe ecue Chiiya babaca ca poa ojjaña jaahuanajji; eya eyajo ani huoojea ca poa meshi yasijje. Jamatii: “Eya Eyacuiñajji Bacua Ejja” anajejo, miquianaaya eya tecueaña. Jama poani ba'a: “Miya siajje poani Eyacuiñajji jayojja miame” poani miquianaaya. ¿Apiojji jamaya poani? — Jesosa poanaje—.

³⁷ ¡Bacue! Eyaya ecue Chiiya acani jayojja a'ajja jojjemo ¡a'a eya shajja'ajjame so'o! ³⁸ Miquianaya ecue esohui shajja'ajja sa po ajja; jamatii ecue Chiiya acani jayojja quea pame nee eya añajo, jjashahuabaquicue jama ba'a: “Jesosa Eyacuiñajji huoojea'yo poani”. ¡Jamajoya jjabahuejjaquicue e'e jojo nei eya ecue Chii jayojjaya, de; oya e jayojjaya pea'ai poani! —Jesosa poanaje.

³⁹ Jamatii Jodio cuaa Jesosa siajje poani poso acanaje. Jamajjeya ojee jama poanaje ba'a: —

¡Cua'a, oya ejja'iñaquiqui ejeanobiajji! —taaame poanaje.

Jamatii Jesosa quea huiso nee nee dejja nequi tejjee quehuajje poquinaje, jja'iñña meequi jjima.

⁴⁰ Majoya Jesosa poqui o'oyanaje cuei Jodana ojje miji yasijje, ma yahuajo Huaniya ona besa mee ca poa huasijje.

⁴¹ Jomajo o anijo quea huiso dejja cuana o baa poeyanaje. Jjachichaqui majje jama ojee miminaje ba'a: —E'e, yahuajo Huaniya ajjima aca poa ma dejjaajjima acani; jamatii ojjaña ojaya ehuhui'yo Jesosajo e'e nei poanaje —acanaje cuaa.

⁴² Jamajjeya ojjaña jomajo Jesosajo jama poanaje ba'a: —E'e jojo nei Jesosa Eyacuiñajjija huoojea'yo ojjaña jaahuanajji.

11

Nasano mano'yonaje

¹⁻² Pea cuiñajjijo Betania bajjanijo

Jesosaja epeejji cuana ba'enaje: Nasano, oja jjo'i cuana Manta, Mania pea'ai. Maniaa Jesosa ojaya quea jea neejo quijje oya jiojji sha canaje shiyeshiyeya. Sha majje ejiojji cui ca'yonaje ojaya esaohua, Maniaa. Jesosa Jodana cuei ojje mijijje anijo, Maniaja eno mese Nasano quea mano nee nee poanaje. ³ Jamajjeya ejjo'i mese cuaa pea huoojea canaje Jesosa que: —Nasano quea mano jaa. Jesosa ba majje jama huohuime acue ba'a: “Emeshi Mese Jesosa, miquea epeejji Nasano quea mano nee nee jaa, poquijeyoje pojja'a” acue.

⁴ Jamajjeya ma dejja poquinaje Jesosa que. Huohui cañaquinaje. Nasanojo shajja'ajja majje Jesosa

jama poanaje ba'a: —E'e, oya mano'yo majje jamatii emano'yo tii tii pojjeama poaje. E'e, qui-jje ojo ojjaña cuaa Eyacuiñajji bihuia caje'yo; ejo pea'ai jama huohuime acaje cuaa ba'a: "E'e, miya Eyacuiñajji Bacua Ejja quea pame nee nee, quea ca'a nee pea'ai; ojjaña miyaya aña" acaje cuaa — Jesosa poanaje.

⁵ Jesosaja quea jea nee nee Manta, Mania pea'ai, oja jjoi'j jayojja, oja o'i jayojja Nasano poani pea'ai.

⁶ Jamatii Nasano quea mano nee nee jaa ba majje Jesosa jomajo tii aninaje becanejjiji pea'ai cahuime, poqui jjima poanaje.

⁷ Majoya ecuana huohui canaje Jesosaa: — Cua'a, ¡Jodea meshi yasijje epoqui o'oya! — poanaje.

⁸ —Chojja, Jesosa —saja'ame anaje ecuaaya—, yahuajo pishana Jodio cuaa jomajo ba'eya miya jajahuejjajea sa acanaje meiya. ¿A'a jamatii miya poqui o'oya sa poani jocuama? —anaje.

⁹ —E'e —Jesosa poanaje—, eya poquije. ¡Bacue! ¿A'a eshequi jaasohua jjimahuajo ejiojjiji poquije? Quea apo. Eshequiya jeaja'a canijo ejjaque-cuasajaquijji pojjeama ejiojjijo. E'e, eshequiya jeaja'a canijo, ejiojji baje quea ja'a nee. ¹⁰ Mecajje quea misi poanijo ca ca dejja oque chana' ejiojjiji poquianijo. Oya jayojja eyaya ecue Chii nijje chacoañajo, ohuaya eya jaahuana cani, onaya eya quecuayyo jjima amee cani. Ojaya eba nei epojja e mano'yojjijo.

¹¹ Jamaya ecuana huohui majje Jesosaa jama acanaje ba'a: —Eseja epeejji Nasano cahui'yonaje. Jamatii eya poquije o ishe'a'yohua.

¹² Jesosa jamaya poanijo, Nasano mano'yo jjima poso ecuaa jama anaje ba'a: —Jesosa, Nasano cacahuiquiahua. Cahui majje oya jjaajaquije'yo.

¹³ Jesosaja eba Nasano emano'yo, epoquijeyo'yo jaa. Ecuana ca ca jjashahuabaquiani jama ba'a: “Nasano jamatii cahuijaa” poso anaje ecuaaya. E'e, Jesosaja esohui ecuanaja quea quehua poanaje.

¹⁴ Jamajjeya Jesosaa huohui ca o'oyanaje jama ba'a: —Epeeiji cuana, Nasano epoquijeyo. Chama'yo tii jaa. ¹⁵ Eya Nasano nijje ani jjima poanajejojo oya mano'yonaje. Jamatii jamaya miquianajo quea pame nee poaje'yo. E'e, eyaya Nasano shequi meeje o'oya ba majje miquianaya jjabahuejjaquije'yo eya e'e jojo nei Eyacuiñajji huoojea'yo ojjaña jaahuanajji. ¡Cua'a, Nasano ejjaba'ajjaquiqui! —Jesosa poanaje.

¹⁶ Jesosa shajja'ajjajji Tomasi, ma Becajaa bajjani miminaje pea shajja'ajjajji cuana nijje, ecuana nijje jama ba'a: —¡Cua'a, Jesosa nijje epoqui! Jodio etii cuaa o cuia ca'yajo ecuana ojee Jesosa nijje tii manoje'yo pea'ai.

*Jesosaa Manta, Mania pea'ai yeno'ama po mee
sa acani*

¹⁷ Quijje Jesosa poeyanaje Nasanoja equi yasijke. Ba caña'yonaje Nasano epoquijeyo'yo poanaje. E'e, ebeca pee pea'ai cahuime yahuajo oya ehuanobia jaanaje mei jjani yasijke, enaba capa jaanaje.

¹⁸ Betania cuiñajji Jenosanena chipi nei ani.

¹⁹ Jamajjeya quea huiso Jodio cuana poeyanaje

Manta, oja shehue Mania pa sahuua, oja noo Nasano emano'yojo.

²⁰ Jamajjeya Jesosa ejiojjije poeyani shajja'ajja majje Manta cuayaquinaje Jesosa baa. Mania ca ca equijo aninaje, poqui jjima ca oma poanaje. ²¹ Jamajjeya Mantaa Jesosa ba majje huohui cañaquinaje jama ba'a: —Jesosa, ecue noo mano'yo jjimahuajo, miya jiquiacua epoe jojjemo oya mano'yo jjima poquiate. ²² Jamatii ecuea eba jjeya nei pea'ai miya Eyacuiñajji nijje mimianijo, ohuaya miquea esohui jama acaje'yo —poanaje Manta.

²³ —Manta, mique noo shequije o'oya, she — poanaje Jesosa.

²⁴ —E'e —Manta poanaje—, jamaya ecuea eba oya shequije o'oya quijje nei, Eyacuiñajjiya ojjaña emano'yo cuana shequi mee ca o'oyajo, meshi oe poajo.

²⁵ Jesosa poanaje: —Manta, eya ca ca iña ojjaña shequimee'yojji nei. Eyaya oya shequi meeje o'oya Eyacuiñajji nijje eba'e tiitii'yojji. Jamajjeya ojjaña joya e'e jojo nei enijje jjapeequiani ba'e tiitii'yo eyajo. Eyaya oya cuana ba'e tiitii meeje'yo jamatii yahuajo emano'yo cuana. ²⁶ Ojjaña ecuea epjeeji jjeya nei eshe nequi pea'ai eyaya ba'e tiitii meeje'yo, mete'ama poaje'yo emano'yojji. ¿A'a jamaya miyaya baña? —Jesosa poanaje.

²⁷ —E'e Jesosa, ecuea eba miya Eyacuiñajjiya huoojea'yo ojjaña jaahuanajji, Eyacuiñajjiya Bacua Ejja. Miquea epoe'yojjiyo yahuajo nei Eyacuiñajjiya esohui huohuijjiya tehue ca poa —Manta poanaje.

²⁸ Majoya Manta poqui o'oyanaje Mania que. Ba majje oya quehuajje huohui canaje jama ba'a: — Mania, Jesosa poeyanaje. Ohuaya miya iyaa cani —poanaje.

²⁹ Mantaja esohui shajja'ajja majje Mania nequisohuanaje. Poquicuajinaje Jesosa baa. ³⁰ Jesosa Betania huasijje dobiqui jjima; ohuaya Mania ishoa ca aninaje jomajo, ma o Manta nijje mimimimi aninajejo tiiya. ³¹ Jodio cuaa Mania nijje equijo pa aniya oya ba canaje poquicuajije. Jamajje onijje poquinaje; jama poanaje ba'a: —Mania papoquinaje oja noo ehuananobiajaa huasijje quea yeno nee nee jjejojo.

³² Maniaa poe majje Jesosa ba cañanaje. Ecui'oshajjajo nequiya huohui canaje: —Jesosa, miya jiquiacua epoe jojjemo ecue noo mano'yo jjima poquiaye —Mania poanaje.

³³ Jesosaa Mania pa'ani ba majje, Jodio cuana Mania nijje pani ba majje pea'ai quea yeno poanaje. Quea yeno jjashahuabaquinaje Jesosa onajo. Jamajjeya huohui'ajja canaje jama ba'a: ³⁴ —¿Achacua acuae nequiaa Nasano huananobianaje so'o, she? —Jesosaa acanaje.

—Eshui huohuijji, ipoecue; bahuacue! — poanaje cuana.

³⁵ Jesosa cojjana cuayaquinaje onajo quea yeno po majje. Poquinaje onijje.

³⁶ Jamajjeya Jodio cuana jama poanaje ba'a: — ¡Bacue! Jesosa pea'ai pani. Nasano ojaya quea yeno nee nee ojaya epeejjijojo, de —poanaje Jodio cuana.

³⁷ —E'e pojja'a —beca cuana poanaje —. Yahuajo Jesosa dejja cojjama' cuaya jjabapojjaqui

mee ca poa. ¿Apiojji shai oya yahuajo poecuaji jjima Nasano jjaajaqui mee'yohua? Jamajjeya oya mano'yo jjima poquiaye.

³⁸ Onajaya esohuijo Jesosa quea yeno nee nee poquinaje jjani ai yasijje. Mei copo enequi jjani secue capajji. ³⁹ Jamajjeya Jesosaa jama acanaje ba'a: —¡Esecue jjani capajji'ya mei jeacajjajaja'yocue! —poanaje.

—Chojja, ecuea Emeshi Mese —Nasanoja jjo'i Manta poanaje —. Oya yahuajo huananobia canaje, ebeca pee pea'ai cahuime. Jjeya quea ihui nee nee —Manta poanaje.

⁴⁰ —Manta, eyaya miya huohuinaje: Eya Eyacuiñajija huoojea'yo ojjaña jaahuanajji ba majje miya jjabahuejjaquiye'yo Eyacuiñajji quea ca'a nee nee, quea pame nee nee; ohuaya eya ojjaña amee cani ma dejjaajjima nei nei acani pea'ai — Jesosa poanaje.

⁴¹ Majoya secue jjani capajji'ya mei jeacajjajaja'ya canaje cuaa. Jesosa eyahuasijje jjabajeaso-huaquinaje Eyacuiñajji nijje emimijji. Nasanojo jama miminaje ba'a: —Ecue Chii, eyaya miya bihuiaña. Ecuea esohui miyaya shajja'ajjaña Nasano shequi mee'yoji. ⁴² Ecuea eba miyaya eya shajja'ajja neineiaña minijje mimianijo. Jamaya eya poani, ojjaña jiquiojo nequi jjabahuejjaquijji miyaya e'e jojo nei eya huoojeanaje. E'e ecue Chii, apoa —Jesosa poanaje.

⁴³ Eyacuiñajji nijje mimi majje Jesosa taaanaje jama ba'a: —Nasano, ¡shequi'yocue, oe; cuaya'yocue! —poanaje.

⁴⁴ Jamajjeya Nasano shequi'yo majje cuaya'yonaje. Oya daqui osheja bebo tii, oja

ejiojji, oja eme cuana pea'ai. Oja sapa ebebo pea'ai poanaje pea daqui osheja.

Jamajjeya Jesosaa huohui canaje jama ba'a: —E'e, ¡oya ebebojji'ya pichojeajea'yocue! ¡Daqui oshe huijjiajea'yocue! Oya capoqui'yahua equi yasijje —poanaje.

Jamajjeya Nasano poqui'yonaje.

⁴⁵ Jamajjeya quea huiso Jodio cuaa Mania baa poeya ba canaje Jesosaa Nasano emano'yojaa shequi mee ca'yonaje. Ba majje Jesosajo jama poanaje ba'a: —E'e jojo nei oya Eyacuiñajji huoo-jea'yo ojjaña jaahuanajji; ¡onije ejjapeequi'yojji!

⁴⁶ Beca cuana ca ca Jenosanena huasijje poqui o'oyanaje Paniseo cuana huohuiya: —Jesosaa Nasano emano'yojaa shequi mee ca'yonaje, de —poanaje cuana.

⁴⁷⁻⁴⁸ Jamajjeya Eyacuiñajji nijje emimijji etii cuaa, Paniseo cuaa pea'aiya ojjaña Jodio etii ojee iyaa canaje Jesosajo emimimimijji.

—¿Yajja acuae seja Jesosa aje so'o, de? Ohuaya ma dejja ba jjima acani quea huiso. ¡Cua'a ejja'iñaquequi oya! ¡Oya esohui ejjahuohui pa-jea meequi! Ojjaña aje oe onije jjapeequiye'yo, de. Majoya Shomano meshi mese cuana ojo quea mete poaje, ejjajjequiquiye poso. Jamajjeya ese nijje jjacuiaqui majje jeabichajea caje'yo. Jiquio Eyacuiñajji equi jajacajjajea caje'yo pea'ai, Shomano cuaa —poanaje Jodio etii cuana.

⁴⁹ Ma shequiajajo dejja Caipa bajjani Eyacuiñajji nijje emimijji etii poanaje Jodioja. Ohuaya pea cuana huohui canaje jama ba'a: —Ae po cajji Jesosajo ecuea ohuejaya eba. ¿A'a miquea ba jjima? ⁵⁰ ¡Eya shajja'ajjacue! E'e, Shomano cuaa

Jesosajo quea mete po majje eseya quecua jeyojoyo ca'yo chana'. Jamajjeya oe dejja, Jesosa camanoqui'yahua ojjaña cuanajo. Jamaya esejaya quea pame poaje'yo. Jamajjeya ojjaña cuana mano jeyojeyo'yo ajja poaje —poanaje Caipa.

Jamatii ohuaya ojaya ejjashahuabaquijiji pojjeama huohui canaje. ⁵¹ Oya, Caipa Eyacuiñajji nijje emimijji etii ma shequiajajo. Jamajjeya Eyacuiñajjiya oya huohui meesahua canaje Jesosajo jama ba'a: —Jesosa quijke pishana ojjaña Jodio cuanajo manoje'yo.

⁵² E'e, ojjaña quea huesha ba'e cuanajo pea'ai, joya Eyacuiñajji epeejji quijke poaje ojjaña meshijo ba'e cuanajo pea'ai manoje'yo Jesosa. Jamajjeya ojjaña meshijo ba'eca cuana ojee jjapeequi mee caje'yo, Eyacuiñajji bihuiajji cuana.

⁵³ Jamajjeya Caipaja esohui shajja'ajja majje Jodio etii cuana ojee jjashahuabaquinaje Jesosa quecuajji: —¡Jesosa ejjaquecuaqui'yo! —poanaje.

⁵⁴ Jamajjeya majoya Jesosa po'ayequi jjima poanaje Jodioja meshijo Jodio cuana nijje. Oya quehuajje poquinaje Epaini cuiñajji sisi yasijke, quima' meshi pejjejo. Jomajo ba'enaje o shajja'ajjajji cuana nijje.

⁵⁵ Quijje pishana ojjaña Jodio dejja cuana ojjaña meshijo ba'e poqui o'oyanaje Jenosanena huasijke. Jamajjeya ma shejo ba'a: Esohuidojojji cuaa yahuajo nei nei Ejito meshijo Jodioja bacua cuana cuia'yo jjima shejo Jenosanena huasijke jjachichaqui canaje. Majoya Jodio etiiquianaja ehuohui'yo jayojja jama quea huiso besa maja-maja cuana ojee quea bihui nee ijjal'ijjia

jjimahuajo. ⁵⁶ Jenosanena huasijje poe majje ojjaña Jodio cuaa Jesosa sa'ajja canaje. Eyacuiñajjija equijo jjachichaqui majje ojee mimimiminaje Jesosajo: —¿Ae jjashahuabaquiani miquianaya? ¿A'a Jesosa poeje jiquiacua Jenosanena huasijje ojee ijija'ijjiaa? ¿A'a poe ajja pojja'a? —poanaje.

⁵⁷ Jamaya miminaje Jodio etiija esohuijo. Paniseo cuaa, Eyacuiñajji nijje emimijji etii cuaa pea'aiya jama huoojea canaje ba'a: —Jesosa ba majje jecuana huohuicuajihuacue e'iña meejji! — acanaje etii cuaa—. Miquiaa mi huohuiajje quea quene nee nee poaje ecuan a.

12

*Maniaa Jesosaja ejiojji shacula canaje
shiyeshiyeya*

(Mateo 26.6-13; Macoso 14.3-9; Noca 7.36-50)

¹ Majoya Jesosa Epainijo nequi Betania huasijje poeyanaje me oejjje oe cahuime Jodio cuana ojee ijija'ijjia jjimahuajo. Jomajo ba'enaje Nasano, ma ohua emano'yojaa shequi mee ca'yonaje. ² Jomajo Mantaa Jesosajo quea bihui poanijo bobi quea huiso cuacula mee canaje. Quea huiso iyaa canaje Jesosa nijje e'ijjia'ijjiajji. Nasano pea'ai onijje ijija'ijjianaje. ³ Majoya Jesosa ojaya quea jea neejo Maniaa shiyeshiyeya quea nahue nee neeya Jesosaja ejiojji sha canaje. Quea huiso sha canaje, oe tahuoo shiyeshiyeye oe acanaje. Sha majje Jesosaja ejiojji cui ca'yonaje oja esao aohua, Maniaa. Equi quea shiye nee nee poanaje shiyeshiyeya sha ca-jje.

⁴ Jamajjeya Jesosa shajja'ajjajji Jodasa Isican-ioteya, ma quijje Jesosa iña meesahua'yojji epo-jjiya Mania ba canaje. Ba majje Jodasa quea tecue jama poanaje ba'a: ⁵ —¡Dee! ¿Apiojji acuaeya shiyeshiyeya shanaje so'o? Ma shiyeshiyeye quea nahue nee nee baña cuaa, shequiaja oe chaco majje sose huiisoajja jiquio shiyeshiyeye, de. Quea huiiso bejjo sosejje oya equia jojjemo bejjo quea huiiso iña caquiaye, majoya bejjo sosejje cuana jja oe aema' cuana bobia quiayeya —poanaje Jodasa.

⁶ Jamatii oya Jodasa aemajo pojjeama jjashahuabaquinaje. Chojja, oya ca ca oma siipojji. Ojjaña Jesosa shajja'ajjajji cuanaja ejjeshejji cuiña nisho cani bashosoco sisijo. Ma sii poquiambe beca cuana bejjo, Jodasaa acanaje.

⁷ Jesosaa Jodasa tecuea canaje jama ba'a: — Jodasa, ¡a'a jiquio epona tecueajji! Ojaya eba eya quijje pishana manoje'yo. Jamajjeya eya sha canaje shiyeshiyeya, e mano'yojji jojoya. ⁸ E'e, eya miquiana nijje e'ani tiitijji pojjeama. Aema' cuana ca ca miquiana nijje yani tii tii, de.

⁹ Quea huiiso Jodio cuaa shajja'ajja canaje Jesosa Betania huasijje poe'yonaje. Quea huiiso cuana poeyanaje Jesosa baa, Nasano pea'ai baa. Onajaya eba Jesosaa Nasano shequi mee ca'yonaje. Jamajjeya Nasano ba sa poanaje pea'ai. ¹⁰⁻¹¹ Nasano shequi mee ca'yonajejo quea huiiso nee nee huohui canaje jama ba'a: —¡E'e jojo nei Jesosa Eyacuiñajji huoojea'yo ojjaña jaahuanajji!

E'e, Nasano shequi mee ca'yonajejo Jodio etii cuanaja esohui shajja'ajja pajea canaje cuaa.

Jamajoya Eyacuiñaggi nijje emimijji etii cuana jjashahuabaquinaje jama ba'a: —¡De, Nasano pea'ai caquecuajea'yahua Jesosa nijje tii!

Jesosa Jenosanena huasije dobiquinaje mapichi sisija edaasa biajje

(*Mateo 21.1-11; Macoso 11.1-11; Noca 19.28-40*)

¹² Jamajjeya mecajjeahua ojjaña Jodio cuaa ma ojee ijja'iijjaaa poe'ya shajja'ajja canaje jama ba'a: —Jesosa ejiojjijje poeyani Jenosanena huasijke.

¹³ Jamajjeya ojjaña cuana jememe iña jaja majje poquinaje Jesosa baa. Poquijeya jememe iña cuana jeasohua canaje. Jamaya Jodio cuaa acanaje pea bihuiajji, emeshi mese ja'ajjequijji cuiñajji yasijke. Jesosa bihuia canaje pea'ai. Taaanaje jama ba'a: —Jesosa, ¡miya ojjaña jaahuanajji poeyanaje! ¡Eyacuiñajjiya miya huoojea canaje! ¡Ohuaya miya cajaahuana cahua! E'e de, miya ecuanajaya, Isaeni cuanajaya Emeshi Mese oe nei —taaame poanaje ojjaña cuana.

¹⁴ Jesosa mapichi sisi ba majje o daasa biajje anisohuaquinaje. E'e, Jesosajo Eyacuiñajjiya esohui yahuajo nei etehue'yo jayojja jama poanaje jama ba'a:

¹⁵ “Ojjaña Jenosanenajo ba'e cuana huohuicue jama ba'a: —¡Quea bei pocue! ¡Bacue oe! Mi quiana huoojea'yojji nei poeyani. Oya quea bei nee. Jamajjeya mapichi sisija edaasa biajje poeyani —huohuicue cuana”. aya yahuajo tehue ca poa Jesosajo.

¹⁶ Ma etehue'yojo jjashahuabaqui jjimahuaa ecuaaya jama anaje ba'a: —¿Yajjajje shai quea

huiso nee nee jjachichaquiani Jesosa que, o bi-huiaa so'o?

Quijje ca ca Eyacuiñajjiya Jesosa emano'yojaa shequi mee caje o'oya; majoya ecuanaa niñebaje'yo jama ba'a: —E'e de, esohui huohuijji cuana yahuajo ba'eja etehue'yo jama acanaje Jesosajo —quijje jamaya niñebaje'yo ecuanaa Jesosa shequi o'oyajo.

¹⁷ Yahuajo Jesosaa Nasano shequi mee ca'yajo, quea huiso dejja cuaa ba ca poa Jesosa. Ma dejja cuaa ojjaña huasijje huohui huicha'a huicha'a ca poquia poa jama ba'a: —Nasano mano'yo majje jjanijo ehuananobia jaanaje. Jesosaa iyaa cajje oya shequi o'oyanaje, de —acanaje cuaa Jesosajo.

¹⁸ Jamajoya Jesosaa acani ma dejjaaj ajjima acanijo quea huiso cuana poquinaje o baa, ejiojjije poeje baa. ¹⁹ Jamajjeya Jesosa poeyanaje Jenosanena huasijje. Majoya Paniseo cuana quea quene ojee mimimiminaje jama ba'a: —¡Bacue! Ecuanaaya pea dejja cuana Jesosa nijje jjapeequi pajea mee ajja. Chojja, de. ¡Bacue oe! Ojjaña tii Jesosa nijje jjapeequiani. Ecuanaaja esohui shajja'ajja sa po'yo ajja. Jesosa iña meesahua ajja pea'ai, de —poanaje Paniseo cuana.

*Jesosaa huohui canaje ojaya epoqui'yojji
eyahuasijje e'ani'yojji*

²⁰ Beca Jodio cuana quea huesha Jieno meshijo ba'e pea'ai ma shejo poeyanaje Jenosanena huasijje ojjaña nijje ijjiā'ijjiāa, Eyacuiñajji bihuiaa.

²¹ Oya cuana poeyanaje Penipe que, ma Bete-saidajo ba'e que. Onijje jama poanaje ba'a: —Penipe, ecuanaya Jesosa ba sa neinei poani —poanaje.

²² Jamajjeya Penipe ojaya epeejji Anesi que poi qui majje pea cuanaja esohui huohui canaje. Majoja ojee poquinaje Jesosa huohuiya.

²³ Shajja'ajja majje Jesosaa oya cuana jama acanaje ojjañaja eshajja'ajjajji ba'a: —E'e, eyaya Eyacuiñajjiya esohui oe a'yonaje. Apoa a'yonaje. Jjeya nei eya, ojjañaja Edoe Mese manoje'yo. Eyacuiñajjiya eya mano'yajo dojosohuaqui caje'yo eyahuasijke. Onijje quea ca'a nee nee ani mee caje'yo. ²⁴ Eyaya e'e jojo nei huohuiaña jama ba'a: Eso' quecua majje pohuani. Jamajjeya jjajja majje quea huiso eso' poaje'yo. Eso' quecua jjima ani jjapapaqui ajja. Jiquio ecua eso' quecua cajje quijje jjajjani jayojja jama poaje ejo. Onaa quecua cajje eya manoje'yo ojjañaja mimishi cuijea'yojji sosejje. Jamajjeya eyaya quea huiso ba'e tiitii meeje'yo enijje eyajo. ²⁵ Jamaya pea'ai joya enijje jjapeequiani dejja mimishi cuaa quecua caje'yo pojja'a. Jamatii enijje jjapeequianijo, mano'yo majje eyajo ba'eje'yo tii tii quea pame nee. Quea mete nee nee jjejojo enijje jjapeequi'yo ajjajo ca ca mano'yo majje cuaquí yasijke dobiquije'yo tii tii, quea nee nee poaje'yo. ²⁶ Ojjañaa joya enijje chaco sa poaniya jeya cashajja'ajja cahua! Ecuea echacojji cuana quijje enijje ba'e tiitiji'e'yo. Ecue Chiiya oya cuana jama huohuime acaje ba'a: "E'e, jamaya. Miya Jesosaja echacojji quea pame nee" acaje Eyacuiñajjiya —Jesosa poanaje—. ²⁷ Jjeya eya quea yeno. ¿Ajeo mimi cajji ecue Chii nijje

so'o? ¿A'a jama mimi cajji pojja'a ba'a: "Ecue Chii, ja'a dejja cuana eya napa meejji! ¡A'a eya quea nee nee po meejji!"? Chojja. Jamaya eya mimi ajja ecue Chii nijje. Ohuaya eya huoojea canaje ojjaña cuanaja mimishijo mano'yohua. ²⁸ Jamajjeya eya jama poaje ba'a: "Ecue Chii, ¡ojjaña cuana mijo quea bihui po meecue!" —Jesosaa acanaje.

Majoya Eyacuiñajji eyajo ani miminaje jama ba'a: —Eyaya miya amee'yonaje ma dejjaajjima acani. Jamajjeya quea huisohua eya bihuia ca'yonaje. Jjeya ojjaña eya jjabihuia meequivije o'oya —poanaje Eyacuiñajji eyajo ani.

²⁹ Ojjaña Jesosa que ejjachichaqui'yo nequi cuaa shajja'ajja canaje Eyacuiñajji eyajo janobajjima nei mimiani. Jamajjeya oya cuana miminaje jama ba'a: —¡De! Cueji pojja'a poanaje.

Beca cuaa jama acanaje ba'a: —¡Chojja! Eshuidojojji eyajo Jesosa nijje miminaje —poanaje cuana.

³⁰ Jesosa ojjaña nijje miminaje jama ba'a: —Ecue Chii eyajo miminaje miquiana jjabahuejja meequiviji jama ba'a: Ohuaya eya shajja'ajja canaje onijje mimianijo —Jesosa poanaje —.

³¹ Jjeya Eyacuiñajjiya ojjaña joya enijje jjapeequi ajja quea nee nee po mee caje'yo. Eyaya ojjaña jeabichajeaje'yo; Edosiquiana nei Satanasa bajjani, ma ojjaña dejja mimishi huoojeajji poani jeabichajeaje'yo. Quijje oya cuaqi yasijje dobiquije'yo tii tii. ³² Cuanaya eya ojjañaja Edoe Mese acui ecueata'apeejo ba'ehuanasohuajea cajo, quea huiso nee nee ojjaña meshijo ba'e enijje jjapeequi meeje'yo —Jesosaa acanaje.

³³ Jamaya Jesosaa ojjaña ba mee canaje oya acui ecueata'apeejo manoje'yo. ³⁴ Jodio cuana jomajo ejjachichaqui nequiya huohui canaje jama ba'a: —Ecuana esohui huohuiji cuana jama poani ba'a: “Eyacuiñajija huoojea'yo ojjaña jaahuana-jji Quito bajjani ba'e titiije'yo. Mano'yo ajja poaje”. Jamajjeya ¿apiojji miyaya huohuinaje oj-jañaja Edoe Mese manoje'yo acui ecueata'apeejo ba'ehuanasohuajea cajje? ¿A'a miya Eyacuiñajija huoojea'yo? ¿A'a miya ojjañaja Edoe Mese ma Quito bajjaniya? —onaaya huohui'ajja canaje.

³⁵ Jesosaa oya cuana saja'a canaje jama ba'a: —Eyaya miquiana huasijje esohui huohuije oe pojji cahuime. Ecuea esohui cuaquijiji sisi jayojja. jjeya nei ecuea esohui jayojja jama acue! Jamajjeya miya poquiquehua ajja. Pea cuana ecuea esohui shajja'ajja sa po ajjajo poquiquehua tiitiije'yo. Jiquio ecua mecajje quea misijo cuaquisho chana' epoquijji jayojja jama ojjaña joya ecue sohui jayojja jama a'ajja, quea mimishi ba'yani. ³⁶ E'e, ecue sohui cuaquijiji quea ja'a jayojja jama. Jamajjeya eya minijje nequijo, jecuea esohui jayojja jama acue! Jamaya miquianaya ecuea epeejji quea ja'a nee poaje'yo. Poquiquehua ajja dejja mimishi jayojja jama epojji pojjeama —poanaje Jesosa.

Majoya esohui huohui majje Jesosa poquinaje. Jja'aniquehuaquinaje.

Jodio cuana Jesosa nijje jjapeequi ajja tii

³⁷ E'e, Jesosaa quea huiso ma dejjaajjima acani acanaje. Ojjaña ba canaje. Jamatii Jodio cuaa

huohui canaje jama ba'a: —Chojja, Jesosa Eyacuiñajjija huoojea'yo ojjaña jaahuanajji pojjeama —poanaje jjashajja'ajjaqui ajja jjejojo.

³⁸ Yahuajo nei Eyacuiñajjija esohui huohuijji Isaia bajjaniya tehue ca poa Jodio cuanajo jama ba'a:

“Eyacuiñajji, Jodio cuana ecuanaja esohui sha jja'ajja sa po'yo ajja. Miyaya ma dejjaja ba jjima aña. Ba huicha'a huicha'a majje jamatii oya cuana jjashahuabaqui sa po ajja”.

³⁹ Jamajoya Isaiaa yahuajo nei nei oya cuanajo tehue ca poa jama pea'ai ba'a:

⁴⁰ “Jodio cuana cojjama' jayojja jama poanijo, miyaya ma dejjaja ba jjima aña ba majje jjabahuejjaqui mee jjima mijo. Quea sapa ca'a jjejojo miquea ejjashahuabaquijjijo jjabahuejjaqui mee jjima. Jamajjeya minijje jjapeequi ajjajo Jodio cuanaja mimishi cuana ecuijea'yojji pojjeama”.

Jamaya Isaiaa yahuajo tehue ca poa Jodio cuanajo.

⁴¹ E'e, Eyacuiñajjija yahuajo nei nei Isaia Jesosa ba mee majje ojo tehue mee ca poa jama ba'a: “Oya quea ca'a nee nee poani. Oya Eyacuiñajjija huoojea'yo ojjaña jaahuanajji”.

⁴² Jamatii quea huiso Jodio etii cuaa quehuajje Jesosajo jama acanaje ba'a: —E'e jojo nei oya Jesosa Eyacuiñajjija huoojea'yo ojjaña jaahuanajji— quehuajje poanaje Jodio etii cuana, Paniseo cuana yajjajo.

E'e, Paniseo cuana yahuajo jama poanaje ba'a: —Jesosa nijje jjapeequiajo aje oe ecuanaja equi ojee ejjachichachaquijji yasijje edobiQUI meejjji

pojjeama; ¡huoojeacuayajeaje'yo mi! —poanaje Paniseo cuana.

Jamajjeya beca Jodio etii cuana quea ajjajja poanaje ehuoojeacuayajea ca poanijje. ⁴³ E'e, Jodio cuana jjashahuabaqui aija Eyacuiñajji quea bei epo mee'yojji. Chojja, oya cuana aje oe jjashahuabaquinaje pea Jodio cuana quea bei epo mee'yojji onijje.

Jesosaa ojjaña huohui caje'yo joya ojaya epeejji nei

⁴⁴ Jamajjeya Jesosaa ojjaña ejjachichaqui nequi janobajjima nei, quea ja'a nee huohui canaje jama pe'a'i ba'a: —Ecue Chiiya, Eyacuiñajjiya eya huoojea canaje. Jamajjeya ojjaña joya enijje e'e jojo nei jjapeequiani ecue Chii nijje pe'a'i jjapeequiani. ⁴⁵ Beca cuana mimiani jama ba'a: “E'e, Jesosa Eyacuiñajjiya huoojea'yo ojjaña jaahuanjji”. Joya e bajji poaniya Eyacuiñajji ba cani pe'a'i, eya ecue Chii jayojjaya poani tii. ⁴⁶ ¡Bacue! Cuaquijijiya jeaja'a canijo, dejja cuana poquique-hua aija mecajje quea apojo. Eyaya cuaquijiji jayojja jamaa ojjaña quea ja'a jjashahuabaqui meesahuaña. Jamajjeya ojjaña joya enijje jjapeequiani mimishi cuana pajea meeje'yo. Jamajoya Eyacuiñajjiya eya huoojea canaje ojjaña cuana mimishi pajea mee'yohua. ⁴⁷ Ecuea esohui shajja'ajja majje beca cuana jamaya ba'e sa po'yo aija. Jamatii eyaya oya cuana tecuea jjima aña. Eya ca iña poeyanaje ojjaña meshijo ba'eca cuanaja mimishi cuijea'yohua, enijje ba'e tiitii mee'yohua; quea mimishi nee poanijo, quea nee nee po mee sa po'yo aija. Ecuea ejjashahuabaqui'yojji jama

pojjeama ba'a: "Ojjaña quea mimishi nee poani quea nee po meeje'yo". Chojja, eya ca iñā poeyanaje ojjaña meshijo ba'eca cuanaja mimishi cuijea'yohua, enijje eba'e tiitii'yojji. ⁴⁸ Ojjañaa joya e cajaa ajji epo quijje quea nee poaje'yo cuaquijo ecue huohui jayojja jama ajjimajojo. Jjeya nei eyaya esohui huohuiaña. Quijje eya poe o'oya majje ojjaña shajjama' cuana nijje mim-ije jama ba'a: "Ecuea esohui shajja'ajja jjimajo miquianaya cajaa aje'yo". ⁴⁹ E'e, ecue Chiiya, e huoojea'yojji poaniya eya huohui meesahua cani ojaya ejjashahuabaqui'yojji. ⁵⁰ Ecuea eba ojjaña joya ojaya esohui jama poani Eyacuiñajjiya pea jjashahuabaquime po mee caje'yo. Ba'e tiitii mee caje'yo onijje pea'ai. Jamajjeya, e'e nei ojjaña Eyacuiñajjiya huohui canajeya eyaya huohuiaña —Jesosa poanaj e.

13

Jesosaja epeejji cuanaa ojaya pea epeejji cuana cajaahuana cahua, caba'e meesahua cahua

¹ E'e, Jodio cuana ojee jjachichaqui o'oyanaje Jenosanena huasijje ojee ijija'iijja quea bihui nee epojji, eniñeba'yojji esohuidojojiya yahuajo nei Ejito meshijo Jodioja bacua cuana cuia'yo jjima epajea'yojji pojjeama. Jamajjeya oe cahuime ojee ijija'iijja jjimahuajo, Jesosa jjashahuabaquinaje jama ba'a: —E'e, jiquio shejo eya poquije o'oya eyahuasijje ecue Chii que. Eya ca iñā nequi ajja jiquio meshijo.

Jesosaa ojaya epeejji cuana jiquio meshijo ba'e quea jea nee nee acanaje. ¡Quea jea nee nee

Jesosaja ojaya epeejji cuana! Poqui jjimahuaa ohuaya oya cuana jjabahuejjaqui mee canaje.

²⁻⁴ Edosiquiana neiya Jodasa Isicanio, Simonija bacua ejja quea tai jjashahuabaqui mee canaje. Jamajjeya Jodasa jjashahuabaquinaje Jesosa iña meesahuajji, onajaya equecua'yojji. Jamatii Jesosaja eba poanaje jama ba'a: Eyacuiñajjiya, oja Chiiya oya eyajo ani huoojea ca poa meshi yasijje. Jamajjeya oya oja Chii que poquije o'oya. Oja Chiiya oya ojjaña huoojea'yojji po mee ca poa pea'ai. Jamajjeya sinecua ecuana nijje, o shajja'ajjajji cuana nijje ojee ijja'ijjianijo Jesosa nequisohuanaje. Oja daqui ao huijjiajea majje pea daqui ejjacomayijjiquijji ai jayojjajo jjajeyoca'aquinaje. Ma daqui jjajeyoca'aqui majje ohuaya ena sho canaje tepe ai jayojja huasijje.

⁵ Majoya ecuana jiojji topo canaje. Topo majje jiojji cui ca'yonaje ma daquia, ejjacomayijjiquijji ai jayojjaa, Jesosaa. Jamaya poanaje ecuana jjabahuejja meequiviji jama ba'a: Pea cuana quea jea nee aña, ¡ba'e meesahuacue! Jama jjashahuabaquime epo meeiji jiojji topo canaje.

⁶ Jamajoya quijje Jesosaa Peno jiojji topo'ajja ca poa.

—Jesosa, miya ecuea Emeshi Mese nei. ¿A'a jjaya iña jiojji topoje pea'ai? —Peno poanaje.

⁷ Jamajjeya Jesosaa oya saja'a canaje jama ba'a: —E'e, Peno, jjeya miya jjashahuabaquiani: “¿Yajjajo shai Jesosaa ecuana jiojji topo cani so'o?” miquea ba jjima; yajjajo eya jama aña poso jjabaquiani. Jamatii quijje pishana miquea eba poaje —Jesosa poanaje.

⁸ —Chojja, Jesosa, miquea eya ejiojji topoiji pojjeama, de, miya ecuea Emeshi Mese nei poanijo —Peno poanaje.

Jamajjeya Jesosaa oya acanaje: —Peno, miya ecuea epeejji nei pojjeama poaje, ca eyaya miquea ejiojji mi topoajo —Jesosaa oya acanaje.

⁹ —¿A'a e'e? Jamajjeya ¡ecuea ejiojji topocue, ecuea eme' cuana, ecuea ecojja pea'ai, ojjaña topocue! —poanaje Peno, Jesosa nijje jjapee neineiqui sa poanijo.

¹⁰ —Peno, miquianaya besanaje. Jamajjeya miya quea boejea. Jamatii jjeya ejiojji nei catopoahua. Jamajjeya miquianajaya mimishi cuijea'yo majje quea boejea a'yonaje. Oe nei nei yani quea boejea pojjeama —Jesosa poanaje.

¹¹ Oya jjashahuab aquiani Jodasajo. Ojaya eba Jodasa o iña meeiji epoji. Jamajjeya: “Oe nei yani quea boejea pojjeama” Jesosa poanaje.

¹² Majoya ecuana jiojji topo majje Jesosaa oja daqui ao huosho ca o'oyanaje. Anioque o'oyanaje ecuana nijje. Jama poanaje ba'a: —¿A'a miquea eba yajjajo miquianaya eyaya jiojji toponaje? ¿A'a jjabahuejjaqui jjima pojja'a? ¹³ ¡Bacue! Miquianaaaya eya jama aña ba'a: “Miya ecuea esohui huohuijji”, “Ecuea Emeshi Mese” aña. E'e, jamaya miquianaaaya quea pame aña. Eya ca ca iña jiquio, miquianajaya esohui huohuijji, miquianajaya Emeshi Mese pea'ai. ¹⁴ E'e, ¡bacue! Eyaya miquea esohui huohuijjiya, miquea Emeshi Meseya miquianaya jiojji toponaje. Jamajjeya ¡e jayojja jama pocue! ¡Pea cuana jiojji topoiji jayojja jama pocue! ¹⁵ E'e, eyaya miquianaya jjabahuejjaqui meeaña: ¡Eyaya miquianaya anaje

jayojjaya pea cuana acue! ¹⁶ Eyaya e'e jojo nei miquianaya ba meeña jama ba'a: ¿A'a echacojiyi ojaya echacomeejji huoojea cani? Chojja. Emeshi meseya ca ca oe echacoji huoojea cani. Eya quea ca'a nee nee; miya ecuea echacoji quea ca'a pishana. Jamajjeya jecue sohui jayojja jama acue! E'e, ¡pea cuana ba'e meesahuacue oe! ¹⁷ Jjeya ecuea esohuijo jjabahuejjaquinaje. Jamajoya miya quea bihui nee poaje'yo ca ecue sohui jayojja jama ba'yajo —Jesosa poanaje.

Jesosaa huohui canaje Jodasa o iña meeiji epoiji

¹⁸ Majoya Jesosaa jama acanaje ba'a: — Jamatii eya ojjaña miquianajo pojjeama mimiani. Miquianaya ecuea ebabaca; ecuea eba ojjaña. Oe dejja ese nijje nequi ecuea epeeiji nisho; Eyacuiñajji esohui etehue'yo ojo yahuajo nei jama poa ba'a:

“Oya enijke ijija'ijija anije. Jamatii aje oe ecuea epeeiji nisho oya poaje, e quecua mee'yojji epoiji”.

Ecuea eba jiquio etehue'yo jamaya poaje e'e jojo nei. ¹⁹ E'e, eyaya miquianaya jjeyahua nei huohuaña jama po jjimahuajo. Jamajjeya quijje pea cuaa eya quecua cajo miquianaya jama ejo jjashahuabaquije ba'a: “E'e jojo nei oya Jesosa Eyacuiñajji huoojea'yo ojjaña jaahuanajji. Jamajjeya ohuaya eseya huohui canaje yahuajo” jamaya poaje miquianaya quijje. ²⁰ E'e jojo nei —Jesosa poanaje pea'ai—, ojjaña joya ecuea echacoji nijje jjapeequiani ecuea esohui huohuijji poanijo, enijke jjapeequiani pea'ai. Eyacuiñajji e huoojea'yojji poanijo, ojjaña joya enijke

jjapeequiani Eyacuiñajjija epeejji poani pea'ai oya cuana.

Jesosa miminaje Jodasajo
(Mateo 26.20-25; Macoso 14.17-21; Noca 22.21-23)

²¹ Majoya Jesosa quea yeno nee nee poanaje Jodasaja ejjashahuabaquijji quea tai ba majje. O shajja'ajjajji cuana jama huohuime acanaje ba'a: —Eyaya miquianaya e'e jojo nei huohuaña. Oe dejja jiquiojo enijke ij{jia} ijjia ani e iña meesahuajji epojji onajaya equecua'yoji —Jesosa poanaje.

²² Jamajjeya o shajja'ajjajji cuana quea metejo pea nijje ecapashe nei jama poanaje ba'a: — De, ¿ache shai o iña meesahuajji poaje so'o? — jjashahuabaquime poanaje.

²³ Eya jiquio esohui tehuejji, Huani bajjani Jesosa pejjejo aninaje, eya ojaya quea jea nee nee.
²⁴ Jamajjeya Penohua eya Jesosa huohui'ajja mee canaje: —¿Ache shai o iña meesahuajji poaje?

²⁵ Majoya eyaya ecapashe nei Jesosa huohui'ajjanaje jama ba'a: —Jesosa, ¿aya acuae mi quecua mee'yo sa acani so'o?

²⁶ Jesosaa acanaje: —Pahui noe najo peshepeshe mee majje quia canaje Jodasa, Simonija bacua ejja: — Ma'aje, Jodasa —poanaje.

Majoya Jesosaa pahui noe najo peshepeshe mee majje quia canaje Jodasa, Simonija bacua ejja: — Ma'aje, Jodasa —poanaje.

—Ocuee, Jesosa —acanaje Jodasaa.
²⁷ Pahui ij{jia} anijo Edosiquiana neiya Jodasa quea tai jjashahuabaqui mee canaje jama ba'a: “¡Onaya eyaya Jesosa iña meesahuaje!”

Majoya aje Jesosaa jama acanaje ba'a: — ¡Poquicue, Jodasa! ¡Miquea ejjashahuabaqui'yojji jayojja jama acuajicue jjeyahua nei! —Jesosa poanaje.

²⁸ Pea shajja'ajjajji cuana jama poanaje ba'a: — ¿Yajja poanaje Jesosa? ¿Ajeo Jesosaa Jodasa huoojea canaje so'o? ²⁹ Jodasaa bashosoco sisi esejaya ejjeshejji biojji dojo canaje. E'e pojja'a huoojea canaje bobo jjequiya, quijje ojee e'ijjiajji pojja'a — poanaje.

Beca eshajja'ajjajji cuana jama poanaje ba'a: — E'e pojja'a Jesosaa Jodasa huoojea canaje beijo quiaa aema' cuana huasijke —poso acanaje cuaa.

³⁰ E'e, Jesosaa huoojea cajje Jodasa pahui ijija majje poquinaje esecue yasijke. Jjasinecuaquiajpoquinaje.

Jesosaja esohui eyacua

³¹ Majoya Jodasa poqui'yajo, Jesosa ecuana nijje jama poanaje ba'a: —Eya ojjañaja Edoe Mese. Eyacuiñajjiya jjeyahua nei ojjaña ba mee caje eya quea ca'a nee nee poani. Ma ba cajo, eyaya ojjaña jjabahuejjaqui meeje Eyacuiñajji quea ca'a nee nee, quea pame nee nee. ³² E'e, Eyacuiñajjiya eya ma dejjaajjima acani amee canajejo ojjaña jjabahuejjaqui meenaje oya quea ca'a nee nee. Jamajjeya Êyacuiñajjiya jjeyahua nei ojjaña jjabahuejjaqui mee caje eya quea pame nee nee poani. E'e, Eyacuiñajjiya eya shequi mee'yo majje jjequisohua caje'yo eyahuasijke —Jesosa poanaje.

³³ Majoya Jesosaa ecuana huohui canaje jama ba'a: —¡Miquianaya ecue bacua cuana jayojja,

shajja'ajjacue mo! Eya minijje nequije oe pojjji cahuime. E poqui'yajo, miquianaaya eya sa'ajjaje'yo. Jamatii jjeya nei poqui meemee ajja e poquiani yasijje. Jamaya yahuajo eyaya pea Jodio cuana huohuinaje pea'ai. ³⁴ Jamajjeya esohui eyacua eyaya huohuiaña jama ba'a: ¡Pea cuana quea jea nee nee atiitiicue! ¡Eyaya miquianaya quea jea nee nee aña jayojja jamaya pea cuana quea jea nee nee acue! ³⁵ Pea cuana quea jea nee nee añajo, onaya miquianajo jama poaje ba'a: “E'e jojo nei miquianaya Jesosaja epeejji poani” —Jesosa poanaje.

³⁶ Peno Simohuiya Jesosa huohui'ajja canaje jama ba'a: —Emeshi Mese Jesosa, ¿achacua acuae shai mi poquije'yo? —acanaje.

—Peno, jjeyahua nei miya epoquijji pojjeama e nequi yasijje. Quijje poe meeje e ani yasijje —Jesosa poanaje.

³⁷ Penohua huohui'ajja canaje: —¿Yajjajo acuae jjeya eya minijje mi poqui meeña? Miya ecuea quea jea nee neejo eyaya jaahuanaje'yo. Manoje'yo mi jaahuanajji.

³⁸ Jesosaa quea yenohua Peno jama acanaje ba'a: —¿A'a miya manoje'yo e jaahuanajji? Chojja Peno, e'e jojo nei jiquio mecajje cachina yahue taaa jjimahuajo, miya ejo jama po huicha'a huicha'aje ba'a: “¡Chojja, Jesosa ecuea ba jjima nei nei!” miya quea mete po majje pea beca peejjima huohuimeya aje —Jesosa po anaj e.

14

Jesosaa ojaya epeejji quea bihui nee po mee

canaje

¹ Jesosaja esohui shajja'ajja majje ecuana quea yeno, quea mete poanaje. Jamajje Jesosa ecuana nijje miminaje jama ba'a: —¡A'a quea mete pojjil! ¡Jiquio jama jjashahuabaquicue ba'a: “Eyacuīñajjiya eya jaahuana caje'yo tii” pocue! ¡Ejo jama jjashahuabaquicue pea'ai ba'a: “Jesosaa eya jaahuana cani tii” pocue! ² Ecue Chii Eyacuīñajji eyajo ani. Jocuama ojaya eba'ejji quea huiso nee yani. Ecuea esohui e'e jojo nei, siajje pojjeama. Eya poquije ecue Chii que miquianajaya eba'ejji iyaa, apoa yajji. ³ E'e, eyaya miquianajaya eba'ejji iyaje. Jamajjeya e'e jojo nei eya poeje o'oya. Poe o'oya majje eyaya miquianaya dojoje enijje eba'e tiitii'yojji. ⁴ Miquianajaya eya eba ecue Chii que poquije. Miquianajaya eba pea'ai ecue Chii que epoquijji —Jesosa poanaje.

⁵ Majoya Tomasi Jesosa nijje jama poanaje ba'a: —Jesosa, ¿achacua miya poquije'yo? Joya mi poquije yasijke ecuanajaya ejiojji ba jjima, de. Jamajjeya ecuanaja eba pojjeama ejiojji ma mi poquiani yasijke epoquijji —acanaje Tomasiya.

⁶ —Tomasi, ojjaña ecue sohui e'e jojo nei. Eya ejiojji eyahuasijke epoquijji jayojja. E'e, ecuea esohui jayojja jama poanijo, miya ecue Chii ba'yani yasijke poqui meeje'yo. Ojjaña enijje jjapeequiani eyaya ba'e tiitii meeje'yo ecue Chii nijje tii. Ojjaña joya enijje jjapeequi ajja ca ca ecue Chii nijje eba'e tiitii'yojji pojjeama. ⁷ Eya miquianajaya eba jojemo miquianaaya ecue Chii bame pea'ai poaje. Jjeyea nei oya miquianajaya eba poaje. Jamajjeya eya ecue Chii yasijke poqui'yajo, oya quea ca'a nee nee ani miquianaaya baje —Jesosa poanaje.

⁸ Majoya Penipe jama poanaje ba'a: —Jesosa, ¡eseja Chii ai ecuanaya ba meecue! Jamajjeya ecuana quea bihui nee nee poaje'yo —poanaje Penipe.

⁹ Jesosaa Penipe acanaje: —Penipe, ¿a'a miquianaya jjabahuejjaqui jjima? Eya miquiana nijje ba'enaje quea shequiaja huiso. ¿A'a jjeya miquianajaya eya ba jjima? ¡Bacue oe! E ba majje esejaya Chii eyajo miquianajaya eba pea'ai. Jamajjeya ¿apiojji acuae miya jama poani so'o ba'a: “¡Esejaya Chii ai ecuanaya ba mee socue!” poani miya? —Jesosa poanaje —. ¹⁰ E'e jojo nei eya ecue Chii jayojjaya, de. Oya e jayojjaya pea'ai. ¿A'a miquianaya jamaya jjashahuabaqui jjima? Ecue Chii nijjeya eyaya ohuaya jayojja aña, ma dejjaajjima acani aña. Ecue Chija ejjashahuabqui'yojji eyaya huohuiaña pea'ai, ecuea ejjashahuabaqui'yojji pojjeama. ¹¹ E'e jojo nei eya ecue Chii jayojjaya, de. Oya e jayojjaya pea'ai. ¡Jamaya jjashahuabaquicue, oe! Ecuea esohuijo miquianaya jjabahuejjaqui jjima, ¡jamajjeya jjashahuabaquicue eyaya ma dejjaajjima añajo! ¡Jama acue ba'a: “E'e, Jesosa Eyacuiñajji jayojjaya” acue miyaya! —Jesosa poanaje—. ¹² Eyaya huohuiaña e'e jojo nei jama ba'a: Ojjaña enijje e'e jojo nei jjapeequianiya eyaya aña jayojja jama acaje'yo. Eyaya quea huiso pishana jjapeequi mee'yonaje Eyacuiñajji nijje. Eya ecue Chii que poqui'yojjo, ecuea epjeejji cuaa quea huiso nee nee pea cuana jjapeequi meesahua caje'yo onijje, Eyacuiñajji nijje. ¹³ Jiquio ecua miquianaya enijje mimijea jamaya eyaya aje'yo, ca ejo jama jjashahuabaquianijo ba'a:

“E'e jojo nei Jesosaa ma ecua eya onijje mimiani jamaya acaje'yo”. Jamajoya ba majje ojjañaa ecue Chii bihuia caje jama ba'a: “Eyacuiñajji, ecuanaja Chii ai, miya quea ca'a nee nee eyajo ani”. ¹⁴ Enijje mimicue jama ba'a: “¡Jesosa, jiquio ecua eya mimiani minijje jamaya miyaya acuel!” Jamajjeya miya enijje poanijo eyaya joya ecua miya enijje mimiani jamaya aje'yo —Jesosaa ecuana huohui canaje.

Jesosaa huohui canaje Edojjoshahua Pameja epoejjijo

¹⁵ Majoya Jesosaa ecuana, o shajja'ajjajji cuana huohui canaje jama ba'a: —Eya miquianajaya quea jea nee poanijo, ¡ecuea esohui jayojja jama acue! ¹⁶ Jamajjeya eya eseja Chii nijje mimije jama ba'a: “Ecue Chii, ¡Edojjoshahua Pame huoojeacue ecuea epeeiji cuana jjabahuejjaqui mee'yohua! Oya ecuea epeeiji cuana nijje ani tiitiije'yo”. ¹⁷ E'e, Edojjoshahua Pameya miquianaya esohui e'e neijo jjashahuabaqui mee caje'yo. Ecuea epeeiji pojjeama ca ca Edojjoshahua Pame nijje ej-japeequi meeiji pojjeama. Oya miquianajaya eba. Pea cuanaja oya ba jjima. Oya miquiana nijje enequi tii tii. Miquiana que dobiquije'yo, Edojjoshahua Pame —Jesosa poanaje.

¹⁸ —Ecuea epeeiji, eya poquije'yo, miquianaya jeanaje'yo jiquiojo tii. Jamatii ecuea miquianaya jaahuana jjima jayojja jeana'yome ajjima. Chojja. Eya miquiana huasijje huoojeaje'yo Edojjoshahua Pame miquiana nijje jjapeequi tiitiiya, miquiana jaahuana tiitii'yojji. ¹⁹ Quijje pishana ecuea epeeiji pojjeama cuaa eya ba maja

ajja. Miquianaaya ca ca eya baje o'oya. Eya ba'e tiitiije'yo, miquianaya pea'ai ba'e tiitiije'yo — Jesosa poanaje—. ²⁰ Edojjoshahua Pame poeyajo, miquianaya jjabahuejjaquije jama ba'a: Eya ecue Chii jayojjaya tii poani. Eya miquiana nijje nequi, miquianaya enijje nequi pea'ai —Jesosa poanaje —. ²¹ Ojjaña joya quea e jea nee nee poani ecuea esohui shajja'ajja majje jamaya poani. Eya ojaya quea jea nee nee poanijo, oya ecue Chiija quea jea nee nee pea'ai, ecuea quea jea nee nee pea'ai. Eyaya oya ba meeje jama ba'a: Eya e'e jojo nei onijje ani tii tii —Jesosa poanaje.

²² Majoya pea Jodasa, ma Jodasa Isicanioye pojjeama, Jesosa nijje jama poanaje ba'a: —¿Yajjajo acuae miquea epeeji pojjeama mi jjaba meema-jaquije so'o? Ecuanaa ca ca miya baje o'oya — huohui'ajja canaje pea Jodasaa.

²³ Jesosaa oya jama acanaje ba'a: —Ojjaña joya quea e jea nee poaniya ecuea esohui jayojja jama acaje'yo tii. Jamajjeya ecue Chiiya oya cuana quea jea nee acaje'yo. Eya, ecue Chii pea'ai onijje jjapeequije'yo. ²⁴ Pea cuana ca ca ecuea esohui shajja'ajja sa po ajja, e boti'ama jje-jojo. Miquianaaya shajja'ajjaña. Ecue Chiiya eya huoojea canaje. Ojaya ejjashahuubaquijji eyaya miquianaya huohuiaña, ecuea ejjashahuubaquijji pojjeama. ²⁵ Jamaya eyaya huohuiaña, miquiana nijje nequiya. ²⁶ Ecue Chiija eba miquianaya ecuea epeeji poani. Jamajjeya ohuaya Edojjoshahua Pame huoojea caje miquiana huasi-jje, miquiana jaahuanaa, miquiana enijje ejjapeequijji pea'ai. Poe majje ohuaya miquianaya ba meesahua caje'yo Eyacuiñajjija ejjashahuubaquijji

cuana. Ojjaña ecuea esohuijo ohuaya miquianaya jjashahuabaqui mee caje'yo tii tii pea'ai —Jesosa poanaje.

²⁷—Eya quea bei nee nee. Eyaya miquianaya quea bei po meeaña —Jesosa poanaje—. ¡Jamajoya quea bei pocue, e jayojja! ¡Mete'ama, yeno'ama pea'ai pocue! Ecuea epeejji pojjeama cuanaja aje oe miquianaya quea bei nee epo mee'yoiji pojjeama, de. ²⁸ Eyaya huohuinaje jama ba'a: Eya ecue Chii que poquije'yo. Poqui majje quijje eya poeje o'oya miquiana que. E'e, eyaya miquianaya huohuinaje jama ba'a: Eya poquije'yo ecue Chii que. Ecue Chiiya eyajo aniya ma dejjaja ba jjima quea huiiso nee nee acani. Eyaya jiquojo ma dejjaajjima acani oe pojji aña —Jesosa poanaje—. Jamajjeya miquianaya quea e jea nee poanijo, ¡quea bihui nee pocue ejo, eya ecue Chii que poquianijo pea'ai! ²⁹ E'e, eyaya miquianaya jjeyahua nei huohuiaña, eya ecue Chii que poqui jjimahuajo. Jamajjeya e poqui'yajo miquianaya jama poaje ba'a: “E'e jojo nei Jesosaa poqui jjimahuaa eseaya huohui canaje. Oya Eyacuiñajija Bacua Ejja poeje o'oya” aje quiana oe poaje —Jesosa poanaje—. ³⁰ Eya miquiana nijje jjeya nei mimi majamaja ajja. Edosiquiana nei poeyani e napaa. E'e, Edosiquiana nei, ma ojjaña meshijo dejja mimishi huoojea'yoiji poani e napaa poeje. Ojaya eya ejeabichajeajji pojjeama. ³¹ Jamatii eya quea nee nee poaje. Quea nee nee poaniya ojjaña ba meeje jama ba'a: “Jesosaja oja Chii quea jea nee nee. Oja Chiija ehuohui jayojja jama poani pea'ai” acaje cuaa. Mahuiso —Jesosa poanaje—. E'e. ¡Jjeya nequisohuacue! ¡Cua'a, esecue yasijje

cuayaquicue! —Jesosa poanaje.

Jamajjeya equi quecuayiji eyajo ani ij{jia}'ij{jia
ani cuayaquinaje esecue yasijje acui yiye yasijje
epoquijji.

15

*Esohui eba meesahuaggi uvajo bashococo ai jay-
ojjayajo*

¹ Majoya ejiojjije poquijeya Jesosaa ecuana huohui canaje: —Eyaya esohui mi ba meesahua-
jji huohuije uvajo, bashococo ai jayojjajo. Eya bashococo ai emaijje quea pame jayojja jama poani. Ecue Chii bashococo ai cuiñajji jayojja jama. ² Bashococo ai cuiñajjiya yaa sisi nojinoji'yajo tetojea ca'yani jjajja ajjajojo. Eña ba chii tetojea ca'yani pea'ai, jjono quea jjajja huiso epoji. Jiquio ecua jjono bashococo ai cuiñajjiya yaa enojinoji tetojea ca'yani jayojja jama ecue Chiiya ecuea epeeji nisho cuana cajaa acani. Jiquio ecua eña ba chii tetojea ca'yani jayojja jama epeeji e'e jojo nei cuana mimishi pajea mee cani, quea pame nee nee epoji. ³ Ecuea esohui shajja'ajjanajejo miquianaya quea ja'a poanaje. Jamajjeya miquianaya bashococo ai jjono quea pame jayojja jama poanaje. ⁴ ¡Enijje jjapee tiiti-
iquicue! Jamajjeya eya miquiana nijje jjapee tiiti-
iquije'yo. Jamajjeya miquianaya ma dejjaajjima acani ameeje'yo. ¿A'a jjono emaijje jjasejjaqui majje jjajjaje so'o? Choja. Jamaya miquianaya enijje jjapee pajeaqui'yo majje quea pame po aaja. Emajje jjasejjaqui'yo jjima jjono jjajjani —Jesosa poanaje.

⁵⁻⁶ Eya jjono emaijje quea pame nee jayojja. Miquianaya jjono emaijo pohuani jayojja. Jjono emaijje jjasejjjaqui'yo majje nojinojije. Joca'yajo chicha'yo majje dahuajea ca'yani cuaa. Oya jayoj-jaya oijaña enijje jjapee pajeaqui'yani cajaa acani. Joya enijje jjapee tiitiiquiani ca ca eya jjapee tiiti-iquije'yo onijje pea'ai. Jamajjeya oya cuana ma dejjaajjima acani quea huiso ameeje'yo. ⁷ E'e, miquianaya enijje jjapee tiitiiquianijo, ecue sohui jayojja jama atiitiiañajo pea'ai, Eyacuiñajjiya joya ecua miquianaaya huohuinaje jamaya acaje oni-jje mimiyajo. ⁸ Miquianaya ma dejjaajjima amee cani ba majje pea cuaa huohui caje jama ba'a: "E'e, Eyacuiñajji quea ca'a nee. Jiquio dejja cuana e'e jojo nei Jesosa shajja'ajjajji cuana" acaje cuaa.

⁹ —Ecue Chiiya eya quea jea nee nee acani jay-ojja jama miya ecuea quea jea nee nee. Jama-jjeya iyea miquianaaya quea jea nee nee pea'ai acue! ¹⁰ E'e, eya ecue Chiija quea jea nee nee poani, eyaya ojaya esohui jayojja jama atiiti-iañajo. Jamaya ecuea esohui jayojja jama poani-jojo, miquianaya ecuea quea jea nee nee poani pea'ai —Jesosa poanaje.

¹¹ —Eyaya jiquio esohui huohuiaña miquiana quea bihui po meeiji. E'e, eyaya miquianaya quea bihui nee nee po mee sa aña. ¹² Eyaya miquianaya huohuina'yaña jama ba'a: ¡Pea cuana quea jea nee nee acue! ¡Jiquio ecua eyaya miquianaya quea jea nee nee aña jamaya acue cuana! ¹³ Ojaya epreejji quea jea nee nee acani oe dejja manoje'yo ojaya epreejji nahuejo. Jamajjeya iojaya oja epreejji quea jea nee nee poanijo nahue cani! ¹⁴ Miquianaya ecuea quea jea nee nee; ecuea

esohui jayojja jama poanijo ecuea epeejji e'e jojo nei poani. Jamajjeya eya miquiana nahuejo manoje'yo. ¹⁵ Echacojjija ba jjima ojaya echacomiejji ja ejjashahuabaqui'yojji. Ojaya epeejji ca ca ba mee cani. Jamajjeya jjeya eya jama po ajja ba'a: "Miquianaya ecuea echacojji poani". Chojja. Jjeya eya jama poani ba'a: "Miquianaya ecuea epeejji poani". E'e, ojjaña joya ecue Chiiya huohui canaje eyaya miquianaya ba meenaje ecuea epeejji poanijojo —Jesosa poanaje—. ¹⁶ ¡Bacue, oe! Eya miquianajaya ebabaca pojjeama. Eyaya ca ca miquianaya babaca'yonaje ecuea epeejji epojji. Eyaya miquianaya huoojeaña ecue Chii nijje quea pame nee chacohua. Jamajjeya ¡pea cuana enijke jjapeequi meesahuacue! Jamajjeya enijke jjapeequianijo miquianaya cojjacahuijanijo. Eyacuiñaggi nijje emimijji ohuaya miquianaya saja'a acaje —Jesosa poanaje—. ¹⁷ Jamajjeya eyaya miquianaya huohuina'yaña jama ba'a: ¡Pea cuana quea jea nee nee acue! —Jesosa poanaje.

Eshahuaja epeejji cuanaja boti'ama nei nei poaje miquianaya

¹⁸ —¡A'a quea yeno pojji dejja mimishi cuana miquiana nijje quea quene poanijo! Dejja mimishi cuana miquiana nijje quea quene nee nee po jjimahuajo enijke quea quene nee nee poanaje. ¹⁹ Miquianaya dejja mimishi jayojja ba'e jojjemo ojaya quea jea pome miya ojaya pea epeejji quea jea jayojja. Jjeyahua nei miquianaya ona jayojja pojjeama, eyaya miquianaya babaca'yonajejo. Jamajjeya miquiana nijje quea quene nee nee poani dejja mimishi cuana.

20 ¿A'a ecuea ehuohui'yo baña? Jama ba'a: Echacomeejji quea sohui ca'a; echacojji ca ca ca'a'ama. Jamajjeya eya napa caje cuaa jayojja jama miquiana napa caje pea'ai. Ecuea esohui shajja'ajja canajejo, miquianajaya esohui shajja'ajja caje'yo pea'ai, onaaya. 21 E'e, e acaje'yo jayojja jama miquianaya acaje'yo cuaa enijje jjapeequianijo. E'e, oya cuaa jamaya acaje'yo, Eyacuiñaggi, e huoojea'yoiji epo ba jjimajojo. 22 E meshi yasijje, dejja mimishi cuana huasijje poe jjima jojjemo, esohui huohui jjima jojjemo pea'ai Eyacuiñaggiya shajjama' cuana quea nee nee po mee'yo ajja acame. Jamatii jjeya eyaya ojjaña huasijje esohui e'e nei huohuinajejo, jama po mee ajja ba'a: "Ecuea mimishi chama". Ecuea shajja'ajja jjima". Chojja. Oya cuana quea mimishi tii —Jesosa poanaje—. 23 Joya e boti'ama ajji poaniya ecue Chii boti'ama pea'ai acani. 24 Eyaya dejja mimishi nijje nequiya ma dejjaajjima acani a'yonaje. Ma dejjaajjima acani ecuea ajjima jojjemo Eyacuiñaggiya oya cuana tecuea jjima acame. E'e, onaaya ba canaje eyaya ma dejjaajjima acani añña. Jamatii eya ecue Chii pea'ai boti'ama nei nei onajaya. 25 Yahuajo nei nei Eyacuiñaggiya esohui huohuijjiya esohui tehue ca poa ejo jama ba'a: "Eya quea pame nee poani. Jamatii dejja mimishi cuanaja eya boti'ama nei nei" —Jesosa poanaje—. Jjeya jamaya dejja mimishi cuana poanaje enijje, esohui huohuijjiya etehue'yo jama —Jesosa poanaje.

26-27 —Miquianaya enijje aninaje ma eya dejja cuana huasijje esohui huohui coonajejo. Jamajjeya jmiquianaaya esohui e'e jojo nei ejo huohuicue

ojjaña cuana huasijke! —Jesosa poanaje—. E poqui'yajo Edojjoshahua Pame poeje miquiana quea bihui nee po mee'yohua. Jjeya oya ecue Chii nijje yani. Eyaya oya huoojeaje miquiana que miquiana jaahuanaa. Ohuaya Eyacuiñajjija esohui e'e jojo nei ejo miquianaya ba meesahua caje'yo. Jamajjeya miquianaya jjashahuubaquije ejo —Jesosa poanaje.

16

¹ —Eyaya miquianaya jamaya huohuiaña jjeya. Jamajjeya ecuea esohuijo quijje miquianaya enijje ejjapee pajeaqui'yoiji pojjeama onaa napa cajje. ² Jodio cuana miquiana nijje quea quene poaje. Jamajjeya quijje, Jodioja equi ojee ejjachichaquijji yasijke dobiquiyajo miquianaya huoojeacuaya caje'yo esecue yasijke Jodio cuaa. E'e, quijje miquianaya quecua'yo majje oya cuana jjashahuaba quehuaquije jama ba'a: “Ecuaaya oya cuana quecua'yonaje. Jamaya Eyacuiñajjija quea boti” jama posoya acaje cuaa.

³ —Jamaya acaje cuaa Eyacuiñajji ba jjimajojo, eya pea'ai ba jjimajojo. ⁴ Jjeya eyaya miquianaya huohuiaña. Jamajjeya quijje onaa napa cajje miquianaya jama poaje ba'a: “Jesosaja esohui yahuajo jayojja jama jjeyahua nei acani cuaa. Ecuana napa cani, onaaya” jamaya poaje —Jesosa poanaje—. Yahuajo miquiana nijje mimi coo majje eyaya miquianaya huohui jjima. Miquiana nijje enequiya jjejojo mi huohuinaje —Jesosa poanaje.

Edojjoshahua Pame poeje

⁵ —Yahuajo eya eyajo ani ecue Chiiya huoojea ca poa jiquiacua. Jjeyahua nei eya o que poquije o'oya. Jamatii eya miquianajaya huohui'ajja jjima jama ba'a: “¿Achacua miya poquije'yo?” ajjima.

⁶ Eyaya miquianaya huohuinaje jama ba'a: “Eya poquije'yo”. Jamajjeya miquianaya quea yeno nee poani. ⁷ Jamatii eyaya miquianaya e'e jojo nei huohuiña: Poqui'yo majje eyaya miquianaya quea bihui nee po meeje'yo. E'e, ecue Chii que poqui'yo majje eyaya Edojjoshahua Pame huoojeaje miquiana que. E poqui'yo ajja jojjemo ca ca oya poe jjima pome. ⁸ Ecuea epeejji pojjeamaja ejjashahuabaquijji quea quehua. Jamajjeya poe majje Edojjoshahua Pameya oya cuana jjabahuejjaqui mee caje. Oya cuana quea mimishi poani, quea mimijjequijea poani. Edojjoshahua Pameya oya cuana quea ja'a nee ba mee caje'yo pea'ai. Eyacuiñajjiya ojjaña joya quea mimishi poani tii quea nee po mee caje'yo tii tii pea'ai. Jamaya ojjaña ba mee caje'yo, Edojjoshahua Pameya. ⁹ E'e, Edojjoshahua Pameya ojjaña jjabahuejjaqui mee caje jama ba'a: Enijje jjapeequi sa po'yo ajja jojoya aje oe ojjaña quea mimishi poani. ¹⁰ Ecue Chiiya eya shequi o'oya mee majje o que jjequisohua ca'yajo, Edojjoshahua Pameya ojjaña ba mee caje eya quea pame nee nee. Jamajjeya eyaya ojjaña quea ja'a nee ba'e meeje'yo. Jjeyahua nei ojjaña ecuea epeejji pojjeamaja eba majajji pojjeama tii.

¹¹ Dejja mimishi huoojeajjijo, Edosiquianajo Eyacuiñajji miminaje jama ba'a: “Eyaya Edosiquiana nei quea nee nee po meeje'yo tii tii. Jamajjeya ojjaña quea mimishi poani quea nee nee po meeje'yo pea'ai”. Jamaya Edojjoshahua Pameya

oijaña jjashahuabaqui mee caje, poe majje — Jesosa poanaje.

¹² —Ecuea pea ejjashahuabaquijji yani quea huiso, miquianaya huohui jjima ecuea. Jamatii jjeya miquianajo quea quehua poaje; jamajjeya jjeyahua eba meejjji pojjeama. ¹³ Jamajjeya Edojjoshahua Pameya poe majje miquianaya oijaña esohui e'e nei ba meesahua caje'yo ejo. Ojaya ejjashahuabaquijji pojjeama ohuaya miquianaya ba meesahua caje'yo. Chojja, ecue Chiija esohui ba meesahua caje'yo. Edojjoshahua Pameya miquianaya ba meesahua caje'yo oijaña ma Eyacuiñajjiya quijje acaje. ¹⁴ Jamajjeya ecuea esohui ba meesahua cajo, miquianaaya eya bihuiae'yo jama ba'a: “E'e de, Jesosa quea pame nee nee, quea ca'a nee nee poani” miquianaya poaje. ¹⁵ Ecuea ejjashahuabaquijji ecue Chiija ejjashahuabaquijji jayojjaya tii tii poani. Majoya eyaya huohuiaña jama ba'a: Ecuea esohui ba meesahua caje'yo Edojjoshahua Pameya —Jesosa poanaje.

Jesosa mano'yo majje shequije o'oya

¹⁶ —E'e, jjeya nei eya miquianajaya ba jjima poaje. Majoya quijje pishana baje o'oya. Majoya ecue Chiiya eya jjequisohua caje'yo o que —Jesosa poanaje.

¹⁷ Jamajjeya ecuana, Jesosa shajja'ajjajji cuana ojee mimimiminaje jama ba'a: —¿Yajjajje shai Jesosa jama poani ba'a: “Jjeya nei miquianajaya eya ba jjima poaje. Majoya quijje pishana baje o'oya. Majoya ecue Chiiya eya jjequisohua caje'yo o que” poani? —poanaje ecuana. ¹⁸ Ojee mimi

majamajanaje jama ba'a: —¿Ajeo oya mimiani jama ba'a: "Jjeya nei?" Ecuanaaja quea quehua ojaya esohui—poanaje ecuana.

¹⁹ Ecuanaaja ejjashahuubaquijji Jesosaja eba poanaje. Jamajjeya ohuaya ecuana huohui'ajja canaje: —Eya jama poanaje ba'a: "Jjeya nei miquianajaya eya ba jjima poaje. Majoya quijje pishana baje o'oya" poanaje. Jamajjeya: "¿Ajeo shai oya Jesosa mimiani so'o?" miquianaaya huohui'ajjaña. ¿A'a e'e? ²⁰ E'e jojo nei jjeya nei miquianaya quea yeno nee nee poaje. Ecuea epeejji pojjeama ca ca quea bihui nee nee poaje. E'e, miquianaya pa neineije. Jamatii quijje pishana quea bihui nee nee poaje o'oya, miquianaya. ²¹ E'e, epona bacua nee majje quea yeno poani, quea bacua nee nee jjejojo. Jamatii bacua cuaya majje quea bihui nee poani. Ebacua ba majje enaese jjashahuubaqui maja ajja ebacua neejo. ²² Jiquio ecua bacua nee majje epona quea yeno nee poani jayojja jama miya jjeya quea yeno nee nee poaje'yo. Jamatii eya ba o'oya majje quea bihui nee nee poaje'yo. Quea bihui nee nee epo pajea mee'yojjii pojjeama cuanaja mi —Jesosa poanaje.

²³ —Jamajjeya eya ecue Chii que poqui'yajo, miquianajaya e ehuohui'ajja majajji pojjeama; enijje mimi ajja aquiana sa poanijo pea'ai. E'e jojo nei, ecue Chii nijje mimianijo, jaquiana sa poanijo oya huohuicue! Ohuaya miya shajja'ajja caje. Miquianaya enijje jjapeequianijo quia caje joya miquiaa saña—Jesosa poanaje.

²⁴ —Yahuajo miquianajaya jamaya ajjima. Ma miquiaa saña ecue Chii huohui jjima enijje jjapee-

quianijo. Jamajjeya ¡Eyacuiñajji nijje mimicue! Joya ecua miquianaaya oya huohuiaña jamaya ohuaya acaje, ecuea epeejjii poanijo. Ohuaya joya miquiaa huohui'ajjajeya quia caje. Jamajjeya miquianaya quea bihui nee po tiitiji'e'yo, e'e jojo nei —Jesosa poanaje.

²⁵ —Jjeya eyaya miquianaya ecuea ejjashahuabaquijji jo sohuihuohuinaje, esohui ebamee sahuajjijo ca ca oe huohuinaje. Quijje ca ca eyaya miquianaya ecue Chiijo huohui neineije esohui quea ja'a neejo, esohui eba meesahuajjijo pojjeama —Jesosa poanaje —.

²⁶ E'e, quijje pishana eya ecue Chii que poqui o'oyajo, miquianaya ecue Chii nijje mimije, enijje pojjeama. ¡Aquiana sa poanijo ca oe oya huohuicue! Ecuea epeejjii poanijojo ohuaya miquianaya shajja'ajja caje —Jesosa poanaje —.

²⁷ E'e, miquianaya ecue Chiija quea jea nee nee, eya miquianaja quea jea nee poanijojo, miquiana ejo quea ja'a jjashahuabaquianijo pea'ai. E'e, miquianajaya ejjashahuabaquijji ejo jama ba'a: "Eyacuiñajjiya Jesosa huoojea canaje e'e jojo nei".

²⁸ E'e jojo nei eya eyajo ani ecue Chiiya huoojea canaje meshi yasijje. Jjeyahua nei eya meshijo nequi jjima poaje. O que poquije o'oya —Jesosa poanaje.

²⁹ Jamajjeya ecuana jama poanaje ba'a: —E'e Jesosa, jjeya miyaya quea ja'a nee huohuiaña, esohui eba meesahuajjijo pojjeama. Maya ecuanaja quea quehua poanaje. ³⁰ Ecuanaja eba miyaya ojjaña baña e'e jojo nei. Minijje mimi jjimahuajo, ecuanaja ejjashahuabi'yojji miquea eba. Jamajoya jjeya ecuana jama poani ba'a: E'e jojo

nei oya Jesosa Eyacuiñajjija huoojea'yo —poanaje ecuana.

³¹ Majoya Jesosaa ecuana jama acanaje ba'a: —E'e, Eyacuiñajjiya, ecue Chiiya eya huoojea canaje. ¿A'a jjeya jamaya miquianajaya eba e'e jojo nei? —Jesosa poanaje —. ³² ¡Bacue! Jjeya nei miquianaaya eya quea mete po majje jeananaaje'yo. Poquicuajije miquianajaya equi yasijje. Jamatii eya ee nei enequijji pojjeama. Chojo, ecue Chii enijke enequi tii —Jesosa poanaje —. ³³ Eyaya jamaya huohuaña. Jamajjeya miquianaya ecuea epreejji nei poanijo quea bei poaje'yo, mete'ama. Jiquiacua ba'yaniyo, onaa napa cajje quea nee poaje. ¡Jamatii yeno'ama pocue! E'e, Edosiquiana nei, ojjaña joya ecuea epreejji pojjeama pea'ai eyaya jeabichajea'yonaje. Oya cuana quea nee nee po meeje'yo tii —Jesosa poanaje.

17

Jesosa miminaje oja Chii nijje ojaya epreejji cuanajo

¹ Majoya ecuana nijje, o shajja'ajjajji nijje mimi majje Jesosa oja Chii nijje miminaje. Eyahuasi-jje jjabajeasohuaqui majje jama poanaje ba'a: —Ecue Chii, jjeya nei eya manoje'yo. ¡Miquea ej-jashahuabaqui'yojji ejo yahuajo, e huoojeanajejo jama acue jjeya, miyaya! ¡Ojjaña ba meecue eya miquea Ebacua Ejja quea ca'a nee nee! Jamajjeya ba majje ojjañaa miya bihuia caje. ² E'e, miyaya eya ojjañaja Emeshi Mese nei po mee'yonaje, ojjaña huoojeajji. Jamajjeya ojjaña joya miya enijke jjapeequi meesahuaña ba'e tiitii meeje'yo, eyaya.

³ Ecue Chii, miya ca ca oe Eyacuiñajji nei e'e jojo nei. Pea chama'. Eya mique huoojea'yo ojjaña jaahuanajji, Jesosa Quito bajjani. Ojjaña minijje jjapeequianijo, enijje jjapeequianijo pea'ai, ba'e tiitije'yo eyajo. ⁴ Eyaya ojjaña cuana ba meenaje miya quea ca'a nee nee poani. E'e ecue Chii, miyaya eya huoojeanaje miquea echacojji. Ojjaña miquea ehuohui eyaya ajeyojeyo'yonaje. Apoa anaje. ⁵ Ecue Chii, yahuajo nei nei meshi pana jjimahuajo, eya minijje quea ca'a nee nequia poa. Jamajjeya jjeya eya mi que poquije'yo; ¡quea ca'a nee nee nequi mee'yocue mo, minijje ojjaña huoojeajji! —jamaya Jesosa miminaje oja Chii nijje.

⁶ —Ecue Chii, eya minijje mimiani e shajja'ajjajji cuanajo. Oya cuana yahuajo miquea epreejji pojjeama poa. Miyaya oya cuana enijje jjapeequi meesahuanaje. Jamajjeya eyaya oya cuana mijo jjabahuejjaqui meenaje. Miquea esohui jayojja jama acanaje. Jjashajja'ajjaquinaje. ⁷ Jamajjeya jjeya ojjañaja eba ojjaña joya miya e ameesahuanaje eyaya aña. ⁸ Ecue Chii, miyaya eya huoojeanaje miquea esohui huohuiya esejaya epreejji cuana huasijke. Miquea esohuiyo oya cuana jjashahuabaquinaje. Shajja'ajja majje jama acani ba'a: “E'e, Jesosa yahuajo Eyacuiñajji nijje nequi titia poa. Eyacuiñajjiya oya huoojea canaje” poani —Jesosa poanaje.

⁹ —Ecue Chii, eya minijje mimiani esejaya epreejji jaahuanajji. Ecuea epreejji pojjeamajo, es-hahuaja epreejjiyo eya mimi ajja. Miyaya esejaya epreejji cuana enijje jjapeequi meesahuanaje. Jamajjeya eya minijje mimiani esejaya epreejji cuanajo, ecuea epreejji miquea epreejji pea'ai poani jo-

joya. ¹⁰ E'e, ojjaña joya enijje jjapeequiani miquea epeejji poani pea'ai. Ojjaña joya minijje jjapeequiani ecuea epeejji poani pea'ai. Ojjañaa eya bihuia cani jama ba'a: "E'e, Jesosa Eyacuiñajija huoojea'yo". ¹¹ Ecue Chii, miya quea pame nee nee, quea ca'a nee nee. Jjeya eya mi que poquije'yo, meshijo enequi majajji pojjeama. Esejaya epeejji cuana ca ca jiquiojo nequije. ¡Oya cuana mimishi'ama po meesahuacue! ¡Miquea esohui jayojja jama atiitii meecue! Jamajjeya ¡ojjaña ojee jjashahuabaqui meecue quea ja'a nee! ¡Eya mi jayojjaya jama ojee jjashahuabaquian! ¡Jamaya oya cuana ojee jjashahuabaqui meecue! ¹² Onijje nequiya eyaya ojjaña joya miya enijje jjapeequi meesahuanaje jaahuananaje mijo. Jamajjeya Edosiquiana nei oya cuana dasia mee jjima anaje, mi quea ca'a nee nee poanijojo. Ojjaña eshahua nijje poquiquehua mee jjima anaje pea'ai. Oe nei enijje jjapee pajeaqui'yonaje, poquiquehuana. E'e, yahuajo nei esohui huohuijjiya ojo tehue ca poa jama ba'a: "Oya epeejji nisho po majje quea nee nee poaje'yo cuaquijo" ojo tehue ca poa yahuajo nei nei —jamaya Jesosa miminaje Jodasajo.

¹³ —Ecue Chii, jjeya eya mi que poquije o'oya. Jiquiojo aniya eyaya ecuea epeejji cuana huohuaña jama ba'a: "Ecue Chii que eya poquije o'oya". Ma esohuijo oya cuana quea bihui nee nee poaje. E'e, ¡eya quea bihui nee nee poani jayojja jama capoahua oya cuana! ¹⁴ Eyaya ecuea epeejji miquea esohui huohuañajo, onaaya shajja'ajja canaje. Ecuea epeejji pojjeama cuanaja ecuea epeejji cuana boti'ama. Eya oya cuanaja boti'ama

pea'ai, o jayojja po ajjajojo. ¹⁵ Ecue Chii, ecuea emimi minijje ecuea epeeiji cuanajo jama ba'a: ¡A'a jjeya nei oya cuana dojosohuaquijji mi que! Chojja, oya cuana ca ca jiquiojo ba'yanijo ijaahuanacue quea pame nee! ¡A'a Edosiquiana neiya oya cuana dasia meeiji! ¹⁶ Eyaya miquea epeeiji pojjeama cuanaja ejjashahuabaquijji jayojja jama jjashahuubaqui ajja. Ecuea epeeiji cuana e jayojja jama poani, pea cuanaja ejjashahuabaquijji jayojja jama pojjeama pea'ai. ¹⁷ Jamajjeya miquea esohui e'e nei. ¡Esohui jayojja jama poanijo, esejaya epeeiji cuana quea ja'a nee nee ba'e meesahuacue, miquea ejjashahuabaquijji jayojjaya! ¹⁸ Ecue Chii, miyaya eya huoojeanaje ojjaña cuana huasijke miquea esohui huohuiya. Jamaya eyaya ecuea epeeiji huoojeaña pea'ai esohui e'e nei huohuiya ojjaña huasijke. ¹⁹ Miquea ejjashahuabaquijji ejo jayojja jama aña eyaya, oya cuana ecuea quea jea nee nee poanijo. E'e, jamaya eyaya aña oya cuana miquea ejjashahuabaquijji jayojja jama epo meesahuajji. Jamaya onaaya acaje'yo miquea esohui bajji poaniya jjejojo — Jesosa poanaje.

*Jesosa ojjaña joya ojaya epeeiji quijke poajejo
miminaje oja Chii nije*

²⁰—Ecue Chii, eya minijje mimiani jiquio epeeiji cuanajo —Jesosa poanaje—. Oya cuaa miquea esohui huohui caje pea cuana huasijke. Shajja'ajja majje pea cuana esejaya epeeiji poaje'yo pea'ai. Ojjañajo eya minijje mimiani, ojjaña jaahuana-jji. ²¹ ¡Ojjaña ecuea epeeiji cuana jjashahuubaqui meecue miquea ejjashahuabaquijji jayojja, ecuea

epeejji pojjeamaja ejjashahuabiquiji jama pojjeama! Ecue Chii, eya mi jayojjaya poani. Miya e jayojjaya poani. ¡Esejaya epeejji cuana ese jayojjaya ameecue pea'ai! Jamajjeya ojjañaa ba caje miya e huoojeajji epo. ²² E'e, miyaya eya huoojeanaje miyaya jayojja yajji. Jamaya eyaya oya cuana huoojeaña ese jayojja epoji pe'a'i. Jamajjeya oya cuana ese jayojjaya jama ameeaña, ojjaña. ²³ E'e ecue Chii, eya ona nijje jjapeequiani. Miya enijke jjapeequiani pea'ai. Jamajjeya oya cuana cajjashahuabquiahua ese jayojja, ojjaña. Jamajjeya esejaya epeejji pojjeama cajjabahuejjaquiahua esejo jama ba'a: Miyaya eya huoojea'yonaje. Miyaya eya quea jea nee nee aña jayojjaya esejaya epeejji cuana quea jea nee nee aña pea'ai —Jesosa poanaje.

²⁴ —Ecue Chii, yahuajo nei nei, meshi pana jjimahuajo tii, eya miquea quea jea nee nee poa; minijke ojjaña huoojea'yoji poa. Jamajjeya ojjaña ecuea epeejji, ma miyaya enijke jjapeequi mee'yonaje ¡enijke ba'e tiitii mee'yocue eyajo! Jomajo oya cuaa ba caje'yo tii tii miyaya eya ojjaña huoojeajji po mee tiitiiaña —Jesosa poanaje.

²⁵ —Ecue Chii, miya quea pame nee nee, quea ja'a nee nee nequi. Esejaya epeejji pojjeama cuanaja aje oe miya ba jjima. Eyaya ca ca miya baña. Esejaya epeejji cuanaja eba eya mique huoojea'yo. ²⁶ Eyaya oya cuana miya ba meesahua'yonaje. Jamaya po tiitiije'yo. Jamajjeya miyaya eya quea jea nee nee aña jayojjaya jama pea cuana onaaya quea jea nee nee acaje. Eyaya oya cuana esejaya esohui jayojja jama atiitii

meesahuaje'yo pea'ai —Jesosa poanaje oja Chii nijje. Mahuiso ojaya emimi oja Chii ni jje.

18

*Pea cuaa Jesosa iñ a ca'yonaje
(Mateo 26.47-56; Macoso 14.43-50; Noca 22.47-53)*

¹ Majoya oja Chii nijje mimi majje Jesosa ecuana nijje poquinaje. Eta'a nama' Senono bajjani ojje miji yasijje poqui majje onimo acui yiye yasi-jje poquinaje. ² Yahuajo Jesosa ma acui yiye yasijje poqui majamajanaje ecuana nijje. Jamaj-jeya jiquio acui yiye Jodasaja eba neinei poanaje, ma Jesosa iña meesahuajji epojjija eba neinei poanaje. ³ Jamajjeya mecajje onimo yiye yasijje Jodasa poeyanaje Jesosa que, sohuinano cuana nijje. Jodio etii cuaa, Paniseo cuaa pea'ai so-huinano cuana, Eyacuiñajjija equi cuiñajji cuana pea'ai huoojea canaje Jodasa nijje, Jesosa iñaa. Ojjaña poeyanaje baajji, cuaquijiji pea'ai.

⁴ Jesosaja ojjañaja ejjashahuabaquijji cuana ojaya eba poanaje. Jamatii oya cuana que poqui majje huohui'ajja canaje jama ba'a: —¿Ajeo a nequiana ca poeyanaje? ¿Ae sa'ajja'yohua?

⁵ —Jesosa ma Nasanenajo ba'enaje sa'ajjaña ecuaaya —poanaje cuana.

—E'e, eya jiquio Jesosa bajjani —Jesosa poanaje.

Jodasa aje oe sohuinano cuana nijje nequinaje, Jesosa iña meeya poe. ⁶ Jesosaja esohui shajja'ajja majje sohuinano cuana, Eyacuiñajjija equi cuiñajji cuana pea'ai edaasajje tii jaabichaquinaje, oque-quinaje meshi yasijje mete majje. ⁷ Jamajjeya

Jesosaa oya cuana huohui'ajja ca o'oyanaje: —¿Ae sa'ajjaña?

—Ecuaaya Jesosa sa'ajjaña, ma Nasanenajo ba'enaje—poanaje.

⁸ —E'e, eya jiquio Jesosa bajjani —Jesosa poanaje—. Miquianaaya eya oe nei sa'ajjañajo, jecuea epeejji enijje nequi capoquiahu! —Jesosa jamaya poanaje ojaya epeejji cuana nahuejji.

⁹ E'e, yahuajo Jesosa oja Chii nijje jama poanaje ba'a: “Oijaña joya miya enijje jjapeequi meesahuanaje eyaya jaahuananaje” jamaya poanaje Jesosa oja Chii nijje yahuajo.

¹⁰ Eyacuiñajji nijje emimijji etiija echacojji Manico bajjani sohuinano nijje nequinaje. Majoya Simohui Penohua baa iñā majje Manico shajja jajasejjajea ca'yonaje; esapa jajapojojeajji nisho acanaje. Eshajja ebianei mijijje jajasejjajea ca'yonaje, Manicoja.

¹¹ —Peno, ¡miquea baa jja oe ejee yasijje nequia'yocue! ¡Ecue Chija ejjashahuabaquijji ejo jayojja jama capoahua eya, jamatii quea nee nee poaje! —Jesosa poanaje.

*Jesosa iñā majje dojo canaje Anasi que
(Mateo 26.57-58; Macoso 14.53-54; Noca 22.54)*

¹² Majoya esohuinano huoojeajjiya ojaya sohuinano cuana nijjeya, Jodio etii cuanaja huoojea'yo sohuinano cuana nijjeya pea'aiya Jesosa iñā ca'yonaje. Me jeyo majje dojo canaje. ¹³ Anasiya equi yasijje ebionei dojo canaje, ma Caipaja babaja equi yasijje. ¹⁴ Caipa aje oe ma shequiajajo Eyacuiñajji nijje emimijji etii poanaje. Ohuaya yahuajo pishana Jodio etii cuana huohui canaje

jama ba'a: —¡Oe dejja camanoqui'yahua ojjaña cuanajo! Jamaya quea pame nee poaje'yo esejo — poanaje.

Peno siajje poanaje Jesosajo

(*Mateo 26.69-70; Macoso 14.66-68; Noca 22.55-57*)

¹⁵ Jesosa dojo canaje cuaa, Peno enijje quea hue-sha pishana ocuenaje achajja Jesosa onaa acaje baa. Eya jiquio esohui tehuejji Huani bajjani. Eya Anasiya eba. Jamajjeya eya dobiqui mee canaje ojaya equi yasijje, ma ojjaña Eyacuiñajji nijje emimijji cuana ojee mimiani yasijje. ¹⁶ Peno ca ca esecuejo nequinaje, dobiqui mee jjima jje-jojo. Jamajjeya eya Anasiya eba neineijo cuayaqui o'oyanaje. Esecue jaahuanajji nijje epona nijje e mimiajo, ohuaya Peno dobiqui mee canaje. ¹⁷ Ma eponaa esecue jaahuanajjiya Peno huohui'ajja canaje: —¿A'a miya pea'ai Jesosa nijje poani, o shajja'ajjajji?

—Chojja. Jesosa shajja'ajjajji pojjeama ca ca iña —siajje poanaje Peno quea mete jjejojo.

¹⁸ Quea huoejo echacojji cuana, esohuinano mese cuana pea'ai cuaqui pejje nei yasijje poeyanaje. Cuaqui pejjejo jjayoqui nequinaje. Jamajjeya Peno jjanequichipiqui majje cuaquijo ejjayoquijji nequinaje ona nijje.

Anasiya Jesosa huohui'ajja canaje ojaya esohuijo

(*Mateo 26.59-66; Macoso 14.55-64; Noca 22.66-71*)

¹⁹ Majoya Anasiya Jesosa huohui'ajja canaje ojaya esohuijo, o shajja'ajjajji cuana pea'aijo.

²⁰ Jesosaa saja'a canaje: —Eyaya esohui huohuinaje ojjaña cuana huasijje. Esohui huohuinaje Eyacuiñajji equijo, equi ojee ejjachichaquijji jo pe'a'i ojjaña Jodio cuanaja eshajja'ajjajji. Quehuajje esohui huohui jjima. ²¹ Jamajjeya ¿apiojji acuae jja oe miyaya eya huohui'ajjaña ecuea ehuohui cuanajo so'o? Oijañaa eya shajja'ajja canaje. ¡Jamajjeya oya cuana huohui'ajja socue! —Jesosa poanaje.

²² Jesosa shajja'ajja majje sohuinanohua oya shemo cuiasejjajea canaje emeya. Huohui canaje: —¡A'a jamaya mimijji Eyacuiñajji nijje emimijji etii nijje! —tecuea canaje.

²³ —¿A'a jjaya eya esohui quea tai aña? ¡Eyaya esohui quea tai aña joya jja ca iña oe huohuicue! Ecuea siajje ajiima cuana. Jamajjeya ¿apiojji acuae iña emeya cuiaña? —Jesosa poanaje.

²⁴ Majoya Anasiya Jesosa huoojea canaje Caipaja equi yasijje. Eme jeyo tii, pichojea jjima. Ma Caipa ca ca oe Eyacuiñajji nijje emimijji etii ma shequiajajo poa.

Peno siajje po o'oyanaje

(Mateo 26.71-75; Macoso 14.69-72; Noca 22.58-62)

²⁵ Peno aje oe cuaqui pejjejo tii nequinaje ejjay-oquijji. Jamajjeya pea cuaa oya huohui canaje: —E'e, miya e'e jojo nei Jesosa shajja'ajjajji poani pe'a'i —poanaje.

—Chojja. Eya ojaya epeejji pojjeama —Peno siajje poanaje.

²⁶ Jamajjeya Peno nijje nequinaje Eyacuiñajji nijje emimijji ja echacojji Manicoja huapa pojjeama,

ma Penohua shajja jajasejjajea canajeja huapa pojjeama. Ohuaya Peno jama acanaje ba'a: — Eyaya miya banaje Jesosa nijje Onimo yiyejo, de —poanaje.

²⁷ —Chojja, de, Jesosa ecuea ba jjima —nisho po o'oyanaje quea mete jjejojo. Peno mimianijo tii cachina yahue taaanaje. E'e, ma ecua Jesosaa oya huohui canaje jamaya Penohua acanaje.

Shomano emeshi mese Pinato bajjani yasijke Jesosa dojo canaje cuaa

(*Mateo 27.1-2, 11-14; Macoso 15.1-5; Noca 23.1-5*)

²⁸ Majoya mecajjeahua nei onaaya Caipaja equijo nequi Jesosa huoojea canaje Shomano emeshi mese Pinato bajjani yasijke. Jomajo Pinatohua ojjaña huoojea cani equi yasijke Jesosa dojodobiaqui canaje sohuinano cuaa. Pinato ca ca Jodio pojjeama, Shomano dejja. Jamajjeya Jodio etii cuana ojaya equi yasijke dobiqui sa po ajja. E'e, Jodioja etiiquianaja etehue'yo jama poani ba'a: “Jodio pojjeamaja equi yasijke dobiquiajo, esohuidojojiya Jodioja bacua cuana cuia aija shejo ojee ijja meemee aija pea Jodio cuana nijje Eyacuiñaggi bihuiajji”. ²⁹ Jamajjeya Pinato Jesosa ba majje esecue yasijke cuayaquinaje Jodio etii nijje mimiya. Cuayaqui majje huohui'ajja canaje Pinatohua: —¿Ajeo shai miquianaaya jiquio dejja tecueaña so'o? ¿Yajja acuae oya poanaje? ¡Huohuicue mo!

³⁰ —Oya aje oe quea tai pojjeama jojjemo ye jjima pome mi que —Jodio etii cuana Jesosajo siajje poanaje.

31 —¡Miquianaaya jja oe oya dojo'yocue! ¡Miquea etiquianaja etehue'yo jayojja jama oya acue! — Pinato poanaje.

—Chojja Pinato, Shomano emeshi mese neiya Sesaa ecuana dejja mimishi caca mee'yo jjima acani acui ecueata'apeejo. ¡Miquea esohuijo oe mano mee'yocue! —poanaje Jodio etii cuana.

32 E'e, jamaya Jodio etii cuaa acanaje ma ecua Jesosaa huohui canaje jayojjaya yajji. E'e, yahuajo Jesosa jama poanaje ba'a: “Quijje eya ba'ehuanasohuajea caje'yo cuaa acui ecueata'apeejo” poanaje.

33 Majoya Pinato equi yasijje dobiqui o'oyanaje Jesosa nijje mimiya. Sohuinano huohui canaje: — ¡Jesosa e que jjequicue!

Sohuinano cuaa Jesosa jjequi cajo, Pinatohua huohui'ajja canaje: —Jesosa, ¿a'a miya e'e jojo nei Jodioja Emeshi Mese? ¡Huohuicue mo oe! — poanaje.

34 —Pinato, ¿a'a miya jamatii jjashahuabaquiani eya Emeshi Mese poani? ¿A'a pea cuaa miya ejo jamaya huohui canaje pojja'a? —Jesosa poanaje.

35 —Eya ca ca iña Jodio pojjeama. Jamajjeya miya ecuea eba pojjeama, de. Miya Jodio. Jodio etii cuaa, Jodio Eyacuiñajji nijje emimijji etii cuuaya miya iña majje jjequi canaje e que. Jamajjeya ¡huohuicue mo! ¿Ae poanaje miya? ¿Yajjajje acuae minijje quea quene nee nee poani cuana? —Pinatohua huohui'ajja canaje.

36 Jesosaa oya saja'a canaje jama ba'a: —E'e, eya Emeshi Mese. Jamatii pea emeshi mese jama pojjeama eya. Jiquio meshi cuanajo dejja cuana

huoojea'yojji pojjeama. Eya jiquiojo emeshi mese poani jojjemo ecuea echacojjiya Jodio etii nijje jjaquecuacuime, Jodio etii cuaa e iña mee cajo — Jesosa poanaje.

³⁷ —Jamajjeya miya emeshi mese poani, Jesosa. ¡A'a e'e? —Pinato poanaje.

—E'e, eya Emeshi Mese poani, miyaya eya e'e jojo nei aña —Jesosa poanaje—. Eya eyajo ani meshi yasijje poeyanaje. Cuayanaje ojjaña cuana Eyacuiñajjiya esohui e'e nei ba meeaya. Ojjaña joya esohui e'e nei jayojja jama a sa poaniya ecuea esohui shajja'ajja cani —Jesosa poanaje.

³⁸ —¡Dee! Esohui e'e nei chama' pojja'a —Pinato poanaje. Majoya oya esecue yasijje cuayaqui o'oyanaje Jodio etii cuana nijje mimi o'oyaa. Jama poanaje ba'a: —Eyaya Jesosaja esohui shajja'ajjanaje. Oya ca ca quea tai pojjeama, mimishi'ama, de —Pinato poanaje—. ³⁹ Jamajjeya jjeya miquianaya ojee ijija'ijjiaje esohuidojijiya yahuajo nei etiiquianaja ebacua cuana cuia'yo jjima aca'ya poa shejo. Ojjaña shequiaja jiquio shejo eyaya oe Jodio dejja ejeanobiajaa huoojeacuayaja'yaña miquianaya quea bihui nee epoji. Jamajjeya ¿e'e pojja'a eyaya Jodio cuanaja Emeshi Mese Jesosa bajjani pichojea'yajo, Jodio cuana quea bihui nee nee poaje? —Pinato poanaje.

⁴⁰ Jodio etii cuaa Pinato saja'a canaje quea tecueya: —¡Chojja! ¡A'a jja oe Jesosa pichojea'yojji! ¡Mashama' jja oe pichojea'yocue! —janobajjima nei taaaanje Jodio etii cuana. Mashama' aje oe siipojji quea mas e poan aje.

19

*Jesosa mano'yo sa poanaje acui ecueata'apeejo
(Mateo 27.15-31; Macoso 15.6-20; Noca 23.13-25)*

¹ Jamajoya Pinatohua sohuinano cuana huoojea canaje Jesosa cuiasejjajea, jjonohua. ² Majoya Jesosa cuiasejjajea majje sohuinano cuaa sapahuahuo nisho acuishsha sipi majje oja sapajo iñape'ejea canaje. E'e, Jesosa emeshi mese nisho poso acanijo ojo soa neineinaje. Oja daqui huijjajea mee majje daqui huo'o quea ao, emeshi meseja daqui jayojja huosho mee canaje. ³ Majoya aje oe oya bihuia nisho canaje: —Miya Jodio cuanaja emeshi mese quea pame nee —nisho amajje oya shemo cuiasejjajea canaje emeya. Jamaya ahuicha'a huicha'a canaje sohuinano cuaa.

⁴ Majoya Pinatohua Jesosa pichojea sa acanaje; esecue yasijje cuayaqui o'oyanaje Jodio etii cuana nijje mimiya. Jama poanaje ba'a: —¡Bacue! Jesosa nijje mimi majje eyaya baña oya mimishi'ama nei nei. Eyaya oya ejeanobia meeiji pojjeama. Jamajjeya jjeya eyaya miquianaya ba meeaña oya Jesosa mimishi'ama nei nei —Pinato poanaje.

Jamajjeya Jesosa esecue yasijje cuayanaje. ⁵ Ojjaña oya ba canaje sapahuahuo nisho acuishsha e'iñape'ejea, daqui huo'o quea ao ehuosho ba'e pea'ai.

—Jiquio aje ca Jesosa ba'a. ¿Apiojji onijje quea quene nee nee poani? —Pinato poanaje.

⁶ Jamatii Jesosa ba majje Jodio sohuinano cuana, joya Eyacuiñajji nijje mimiani cuana pea'ai taaanaje jama ba'a: —¡Oya acui ecueata'apeejo

ba'ehuanasohuajeacue! E'e, ¡acui ecueata'apeejo ba'ehuanasohuajeacue ca coma! —ojjaña janobajjima nei taaanaje.

—¡Miquiaaya jja oe oya dojo'yo majje acui ecueata'apeejo ba'ehuanasohuajeacue! Eyaya ca ca oya baña mimishi'ama nei nei —Pinato poanaje.

⁷ Jodio etii cuaa Pinato saja'a canaje jama ba'a: —Jesosa jama poanaje ba'a: “Eya Eyacuiñajjija Bacua Ejja”. ¡Jamajjeya oya cacuiajea'yahua! Jamaya ecuanaja etiiquianaja etehue'yo poani —jamaya poanaje jiquio Jodio etii cuaa; Jesosa Eyacuiñajjija Bacua Ejja pojjeama poso acanaje.

⁸ Jamajjeya “Jesosa Eyacuiñajjija Bacua Ejja” Jodio etii cuaa acajo, shajja'ajja majje Pinato quea mete nee nee poanaje. ⁹ Equi yasijje dobiqui o'oya majje Jesosa huohui'ajja ca o'oyanaje Pinatohua jama ba'a: —Jesosa, ¿achejo ani acuae miya poeyanaje so'o? —poanaje.

Jamatii oya Jesosaa saja'a jjima acanaje. Mimi jjima. ¹⁰ Jesosaja oya saja'a jjimajojo Shomano emeshi mese Pinatohua oya huohui canaje: —¡Dee! Miya enijje mimi ajja. ¡Bacue! Ecuea esohuijo pea cuaa miya pichojea caje pojja'a; ecuea esohuijo pea cuaa miya acui ecueata'apeejo me cacaajea caje pojja'a. ¿A'a miquea ba jjima eya Jodio huoojea'yojji poani jiquiojo? —Pinato poanaje.

¹¹ Majoya Jesosa onijje miminaje jama ba'a: —Eyacuiñajjija miya ejo huohui mee cani. Miyaya miyaye nei jamatii ejo huohui mee ajja. Jamajjeya joya e iña meeiji epo cuana quea mimishi nee nee poani. Miya o jayojja quea mimishi nee nee pojjeama —Jesosa poanaje.

¹² Jamajjeya Pinatohua Jesosa pichojea sa neinei acanaje. Jamatii jiquio Jodio etii cuana taaa majamajanaje. Janobajjima nei poanaje: — ¡A'a oya pichojea'yojji! Oya miya pichojea'yojo aje oe miya Shomano huoojea'yojji nei Sesa bajjanija epeeiji pojjeama poaje, de. Ojjaña joya emeshi mese nei po sa poani ca ca Sesa jeacuayajeajji epo, de —poanaje.

¹³ Majoya Jodio cuanaja esohui shajja'ajja majje Jesosa Pinatohua dojo capoquinaje ma ohua ona huoojea cani yasijje. Jomajo anioquenaje yohua bajjanijo ba'a: Mei E'iya nequijo, Jodioja esohuijo ca ca Jabata bajjanijo. ¹⁴ Jomajo ojjaña Jodio cuana cojja nei anioque majje Jodio etii cuaa huohui canaje: —¡Bacue oe Jesosa, miquianajaya Emeshi Mese! —Pinato poanaje.

Ojjaña jiquio Jodio etii cuana taaa neineinaje. ¹⁵ Jama poanaje ba'a: —Chojja, de. ¡Oya quecua'yocue! ¡Acui ecueata'apeejo ba'ehuanasohuajeacue!

—¿A'a eya miquianajaya Emeshi Mese nei me caca meeñañia acui ecueata'apeejo emano'yojji? — Pinatohua acanaje.

—Ecuana jaya emeshi mese yani, oya Shomano emeshi mese Sesa bajjani. Pea chama' —taaame acanaje Eyacuiñajji nijje emimijji etii cuaa.

¹⁶ Jamajjeya aje oe Jodio cuaa a sa acani jayojja jama Pinatohua amee canaje. Jesosa dojo mee canaje me caca meeya acui ecueata'apeejo eba'ehuanasohuajeajji. Jamaya poanaje epojja ejomishocajjijo eshequi biacojjajja nequijo, Jodio cuaa bobi chicha cani pojjajo, yahuajo nei esohuidojjiya Jodio etiiquianaja bacua cuana

cuia'yo jjima aca poa shejo. E'e, Jodio cuaa Jesosa manocuaji mee'yo sa acanaje emojea'yojji ojee ijji'a'ijjia jjimahuajo.

Jesosa acui ecueata'apeejo ba'ehuanasohuajea canaje cuaa

(*Mateo 27.32-44; Macoso 15.21-32; Noca 23.26-43*)

¹⁷ Jamajjeya Pinatohua Jesosa Jodio etii cuana huasijje quia ca'yonaje. Sohuinanoqua Jesosa iña majje acui ecueata'apee quea biquie nee bao mee majje dojo mee canaje. Dojo mee canaje eyiyo sisi yasijje, Sapa Jjii anijji bajjani meshi yasijje, Jodioja esohuijo ca ca Jonijota eyiyo huasi-jje. ¹⁸ Sapa Jjii bajjani eyiyo huasijje jaasohuaqui majje majo tii acui ecueata'apeejo Jesosa me caca-jea canaje sohuanano cuaa. Me caca majje ba'ehuanasohuajea canaje. Beca dejja mimishi pea acui ecueata'apee cuanajo me jeyo canaje pea'ai. Ba'ehuanasohuajea canaje Jesosa pejjejo, oe shanijje, pea ebianeijje. Jesosa ca ca eyiye-samaneijje ba'ehuanasohuajea canaje.

¹⁹ Pinatohua acuijo esohui tehue mee canaje Jesosajo. Etehue'yo acui ecueata'apeejo Jesosa ba'e sapa biacua caca mee canaje. Etehue'yo jama ba'a: OYA JESOSA NASANENAO BA'E JODIOJA EMESHI MESE NEI

²⁰ Jonijota ma Sapa Jjii eyiyo bajjani Jenosanena pejjejo nequi. Huesha'ama. Jamajjeya Jodio cuaa quea huisohua Pinatoja etehue'yo ba canaje. Ma etehue'yo Jodioja esohuijo tehue mee canaje, Shomano dejjaja esohuijo pea'ai, Jienoja esohuijo pea'ai tehue mee canaje, Pinatohua. ²¹ Jamajjeya

Jodioja Eyacuiñajji nijje emimijji etii cuana Pinatoja etehue'yo Jesosajo ba majje Pinato que poqui o'oyanaje. Huohui cañaquinaje jama ba'a: —¿Apiojji acuae miyaya tehue meenaje Jesosajo maya? Chojja, a'a jama tehuejji ba'a: “Jesosa Jodio cuanaja Emeshi Mese nei”. Jama tehueme acue ba'a: “Oya aje ca jja oe jama pojea'ajja nequinaje ba'a: —Eya Jodio cuanaja Emeshi Mese —poso poanaje”. Oya Jesosa ecuanaja Emeshi Mese nei pojjeama, de —Jodio etii cuana poanaje.

²² —Chojja. Jamatii. Apoa ecuea etehue mee'yo —Pinatohua oya cuana acanaje.

²³ Majoya Jesosa ba'ehuanasohuajeyo'yo majje ebeca pee pea'ai sohuinano cuaa oja daqui cuana chicha ca'yonaje. Iyachicha'yo majje peaajjeshe'yo, peaajjeshe'yo acanaje cuaa. ²⁴ Majoya oja daqui nei esipi bame iña canaje. Esipi aojo, esoco pojjeamajo jama poanaje ba'a: —¡A'a isajeajji! —poanaje.

Jamajjeya sohuinano cuaa quebanei po majje daqui nei majjo ca'yonaje ojaya pojji epo'yojji. E'e, joya ecua Eyacuiñajji ja esohui huohuijji ya yahuajo nei nei tehue ca poa jayojja jama acanaje sohuinano cuaa. Ma etehue'yo jama poa ba'a:

“Ecuea daqui iña caje. Ojjañaa jjeshe caje pea jayojja. Ecuea daqui ao iña majje, quebanei po majje daqui majjo caje'yo ojaya epo'yojji”.

Yahuajo nei nei tehue ca poa. Jamaya Jesosaja daqui acanaje, sohuinano cuaa.

²⁵ Jesosa acui ecueata'apeejo ba'e pejjejo nequinaje ojaya enaese Mania oja shehue nijje, Queopaja ehuanase Mania bajjani nijje, pea Mania Madanena cuiñajjijo ba'e nijje pea'ai.

²⁶ Jamajjeya Jesosaa enaese ba canaje enijje nequi. Eya aje oe Huani bajjani, Jesosaja quea jea nee nee. Jamajjeya Jesosa ojaya enaese nijje jama poanaje ba'a: —Ecue nae, Huani miquea ebacua ejja jayojja poaje'yo, mi jaahuanajji.

²⁷ Majoya eya acanaje: —Huani, ecue nae miquea enaese poaje. ¡Oya jaahuanacue! — Jesosaa acanaje.

Jamajjeya eyaya Jesosaja enaese Mania ecuea equi yasijje dojo'yonaje enijje eba'e'yojji.

Jesosa mano'yonaje

(*Mateo 27.45-56; Macoso 15.33-42; Noca 23.44-49*)

²⁸ Jesosaja eba poanaje ojaya ojjaña oja Chija esohui jayojja ajeyo canaje. Apoa poanaje. Jamajjeya Eyacuiñajji esohui yahuajo nei nei jayojja jama poanijo Jesosa taaaanje jama ba'a: —Eya quea naba taja nee nee.

²⁹ Jomajo oe meshimisijo nequinaje acuijjajja na sese. Jamajjeya shajashaja iyanobia canaje ena ejjequi yasijje. Majoya bequibobo sajo quecuahuosho majje Jesosaja enaba huasijje huo canaje ojaya e'ishiji. ³⁰ Jjequibibi majje ishi canaje, Jesosaa. Ishi majje jama poanaje ba'a: —Apoa. Ojjaña Eyacuiñajji ehuohui'yo jayojja jama eyaya ajeyo'yonaje —poanaje. Jama mimime po majje Jesosa mano'yonaje, poquijeyo'yonaje.

Jesosa mape quecua canaje sohuinano cuaa

³¹ Majoya Jodio etii cuana Pinato que poqui o'oyanaje. Ba majje jama poanaje ba'a: —Emeshi mese Pinato, ¡dejja cuana eba'ehuanasohua ba'eja equise sa' cuiasajajea meecue! Jamajjeya mano

cuajije. Mano'yajo jjequioquea meecue meshi yasi-jje emojejaji! —Jodio etii cuana poanaje.

Jamaya jjashahuabaquime poanaje ba'a: — Mecahuajje epojja ejomishocajji, ojee e'ijjia'l'ijjiajji quea bihui nee pea'ai. Jamajjeya joya cuana jjeya nei camano mee cahua! ¡A'a mecahuajje ba'e mee-jji acui ecueata'apeejo! —jjashahuabaquinaje Jodio etii cuana.

³² Jamajjeya Pinatohua sohuinano cuana huoo-jea canaje. Poe majje sohuinano cuaa dejja mimishi cuana quise sa' cuiasajajea canaje, ma Jesosa pejjejo acui ecueata'apee cuanajo ba'e.

³³ Majoya Jesosa ba canaje emano'yo. Jamajjeya oya quise sa' cuiasajajea jjima acanaje. ³⁴ Jamatii oe sohuinanohua Jesosa emapejje quecua canaje emeje aohua. Quecua cajje ena huo'o, ena oshe tejjee pea'ai cuayaquinaje. ³⁵ Eyaya, Huani bajjaniya, banaje ecuea ecojjaa. Jamaya poanaje ba'a: Sohuinano cuaa Jesosa ba'ehuanasohuajea majje oya emano'yo ba'e quecua canaje pea'ai. Oya quise sa' cuiasaja jjima acanaje. Jjeya eyaya jamaya tehueaña. Jamajjeya ojjaña cuana ba meeje ecuea ehuhui Jesosajo e'e jojo nei. Eya siajjepojji pojjeama. ³⁶ E'e, Eyacuiñajjija esohui etehue'yo yahuajo nei Jesosajo jama poanaje ba'a: "Ojaya esa' cuana pea cuanaja ecuiasaja'yoiji pojjeama". Ma ecua Eyacuiñajjija esohui tehue mee ca'ya poa jamaya Jesosa acanaje cuaa.

³⁷ Pea Jodio etiiquianaja etehue'yo yahuajo nei jama poa ba'a: "Oya quecua cajo, ojjaña cuaa oya ba caje'yo ecojjaa". Jamaya tehue ca'ya poa yahuajo nei nei Jesosajo.

*Jesosa mei jjani ai yasijke huananobia canaje
(Mateo 27.57-61; Macoso 15.42-47; Noca 23.50-56)*

³⁸ Majoya Jesosa mano'yo majje ojaya epeeiji Jose bajjani poeyanaje, pea Jose, Amatea meshijo ba'e. Oya Jodio cuanajo quea metejo quehuajje jjapeequi'yonaje Jesosa nijje yahuajo. Poe majje Jose Pinato huasijke poquinaje. Pinato ba majje huohui'ajja canaje Joseya: —Emeshi mese Pinato, Jesosa mano'yonaje. ¡Eyaya oya jjani yasijke cadojo'yahua ehuananobia'yoji! —poanaje.

—E'e, ¡dojocue! Eyaya sohuinano cuana jamaya huohuime aje —huoojea canaje Pinatohua.

Jamajoya Jesosaja epeeiji cuaa oya emano'yo acui ecueata'apeejo ba'e jjequioquea'yo majje dojo canaje jjani yasijke huananobiaa. ³⁹ Nicodemo, ma yahuajo Jesosa nijje miminaje mecajje, Jose nijje poquinaje Jesosa dojohua. Nicodemohua shiyeshiye pohuipohui, acui shiye sajja pohui quea shiye quea nahue pea'ai dojo canaje Jesosa shicuijji. Quea huiso nee nee dojo canaje 50 quiname. ⁴⁰ Jamajjeya Jesosa dojo majje shiyeshiye pohuipohuiya shicui canaje. Majoya daqui oshe eyacua neijo bebo canaje. E'e, jamaya Jodio cuaa acani emano'yo cuana ehuananobiajji mei jjani yasijke. ⁴¹ Jamajjeya Jesosa eyiyo Sapa Jjii bajjanijo acui ecueata'apeejo eba'ehuanasohua ba'e jjequioquea'yo majje shiyeshiyeya shicui canaje. Shicui majje dojo canaje que quea chipi nee yasijke, mei jjani jjeya nei teo huasijke. ⁴² Ma mei jjani quea chipi nee poanijo, ojaya epeeiji cuaa Jesosa jomajo huananobia ca'yonaje sinecua nei. Jodio cuanaja epojja ejomishocajji poanijo

Jesosa huananobia cuaji canaje. Mei copo quea quemohua esecue jjani jaja ca'ajeana'yo majje p oqui'y onaje.

20

Jesosa shequi o'oyanaje

(Mateo 28.1-10; Macoso 16.1-8; Noca 24.1-12)

¹ Majoya mecajjeahua nei nei jjaja'a'ajjaqui jjimahuajo ebionei jjapojjaquiajo, nomico pojaj Mania, pea Mania Madanenajo ba'e poquinaje mei jjani yasijke. Ba cañaquinaje mei copo quea quemo jjani capajji'ya ejeacajjajajea. ² Ba majje Mania cuajicuajipoquinaje Simohui Peno huohuiya, e huohuiya pea'ai. E'e, eya Jesosaja epeeiji, ojaya quea jea nee nee. Jamajjeya poe majje Maniaa huohui cañaquinaje jama ba'a: —Jesosa dojo canaje cuaa. Jesosa aje oe mei jjanijo chama' nei nei. ¿Achacua shai dojo canaje cuaa? Ecuea ba jjima —poanaje Mania, jjashahuabaqui jjima.

³ Jamajjeya Peno enijje poquicuajinaje mei jjani yasijke. ⁴ Ecuana ojee cuajicuajinaje. Eyaya cuajicuaji neinei majje ebionei mei jjani bañaquinaje. Peno ca ca quijje pishana poeyanaje. ⁵ Poe majje, eya jjacueanohuequi majje ye'e'ajjanaje. Daqui oshe banaje e'iyacoca'yo ani. ⁶ Majoya Simohui Peno e quiquishiji poeyanaje. Oya mei jjani ai yasijke dobiquinaje. Daqui oshe ba canaje meijo e'iyacoca'yo ani. ⁷ Pea daqui oshe Jesosa sapa bebojji'ya o sapa jaanajejo tii e'iyacoca'yo ani ba canaje pea'ai. ⁸ E'e, eya ebionei mei jjani yasijke poeyanaje. Jamatii Peno dobiquiyajo, eya dobiquinaje pea'ai. Banaje e'e jojo nei Jesosa

chama'. Daqui e'iyacoca'yo ani ba majje eya jjashahuabaquinaje jama ba'a: —¡E'e de! E'e jojo nei Jesosa emano'yo tii jaa shequi'yonaje. Ma ecua yahuajo ohuaya huohui canaje jamaya oya po'yonaje.

⁹ Eyacuiñajjija esohui etehue'yo Jesosajo jama poa ba'a: "Quito mano'yo majje shequije'yo". Jamatii yahuajo ma etehue'yo ecuanaja quea quehua poanaje.

¹⁰ Majoya jjani aijo Jesosa chama' ba majje eya Peno nijje equi yasijje poqui o'oyanaje.

*Mania Madanenaa Jesosa ba ca o'oyanaje
(Mateo 28.9-10; Macoso 16.9-11)*

¹¹ E'e, eya, Huani, Peno nijje equi yasijje poqui o'oyanaje. Jamatii Mania equi yasijje poqui'yo jjima. Mei jjani pejjejo pa aninaje. Oya pea'ai jjacueanohuequinaje eye'e'ajjaggi. ¹² Ba canaje beca esohuidojiji. Ojaya daqui quea oshe nee nee, bo oshe nee nee jayojja poanaje. Shequi o'oya jjimahuajo Jesosa mei jjani dojjojo jaanaje pea mei biajje. Jjeya ca ca beca esohuidojiji cuana anioquenaje Jesosa jaanaje mei biajje. Jesosa sapa jaanajejo oe esohuidojiji aninaje. O jiojji jaanajejo pea aninaje. ¹³ Esohuidojiji cuaa Mania jama acanaje ba'a: —Epona, ¿yajjajje acuae mi pani so'o?

—Ecuea Emeshi Mese Jesosa dojocuayaqui canaje cuaa. ¿Achacua shai dojo canaje? Ecuea ba jjima —Mania poanaje.

¹⁴ Jamaya mimi majje Maniaa Jesosa bajea canaje. Jamatii oya Jesosa eque mese poso acanaje, Jesosa pojjeama poso acanaje.

15 Jamajjeya Jesosaa oya jama acanaje ba'a: — Epona, ¿apiojji acuae mi pani? ¿A'ya cuae miyaya sa'ajjaña so'o? —Jesosa poanaje.

—¿A'a miya eque mese? ¿A'a miyaya oya dojonaje pojja'a? ¡Che mo oe huohuicue achacua oya dojonaje! Eyaya oya dojoje'yo shiyeshiye shicuiya —Mania poanaje.

16 —¡Mania! —Jesosa poanaje.

Jesosa mimije shajja'ajja majje Maniaa oya ba canaje Jesosa. Jamajjeya Maniaa oya jama acanaje ba'a: —¡Ecuea esohui huohuijji miya! — poanaje Mania, Jodioja esohuijo—. ¡Raboni! — poanaje.

17 —Mania, ja'a eya iña neineiji! ¡Eya capoquiahua ecue Chii ani yasijke! ijjeya poquicue; ecuea epeejji cuana huohuiquicue miyaya! Jama oe acue ba'a: “Jesosa jama poanaje ba'a: —Jjeya eya poquije'yo ecue Chii eyajo ani yasijke, mique Chii eyajo ani yasijke pea'ai. E'e, eya poquije'yo Eyacuiñajji ani yasijke. Oya Eyacuiñajji miquianajaya Chii pea'ai” jamaya aquicue ecuea epeejji cuana —Jesosa poanaje.

18 Majoya Mania Madanena poquinaje Jesosaja epeejji cuana ani yasijke. Ecuana nijje jama poanaje ba'a: —¡Shajja'ajjacue oe! Eyaya Jesosa ba'yonaje; e'e jojo nei eshe ca coma.

Jamaya huohui majje Mania Madanenaa ma Jesosaa huohui canajeya ecuana huohui canaje.

*Jesosa ojaya epeejji cuana huasijke poe'yonaje
(Mateo 28.16-20; Macoso 16.14-18; Noca 24.36-49)*

19 Quijje nomico pojjaño sinecuajo ecuana Jesosaja epeejji ojee aninaje equijo. Jodio yajjajo esecue eca'a nequinaje. Jamatii Jesosa equijo ecuana nijje jjaja'aqui'yonaje. Ecuana nijje miminaje jama ba'a: —¡Quea bei nee pocue miquianaya! —poanaje.

20 Majoya Jesosaa ecuana ba mee canaje onaja quecuahuejjajea oja eme jjoto, ojaya emape onaja quecua pea'ai ba mee canaje. Jesosa ba majje ecuana quea bihui nee nee poanaje. **21** Jesosaa ecuana huohui ca o'oyanaje jama ba'a: —¡Quea bei nee nee pocue! Yahuajo ecue Chiiya eya huoojea canaje ojaya echacojji. Jamaya jjeya eyaya miquianaya huoojeaña ecuea esohui huohuiya — Jesosa poanaje.

22 Majoya Jesosaa ecuana huasijke sipojea majje huohui canaje jama ba'a: —¡Edojjoshahua Pame miquiana huasijke cadobiquiahua! **23** E'e, ¡miquianaya ecuea esohui huohuijji pocue! Jamajjeya ojjaña joya oja mimishi pajea sa poani miquianaaaya huohuicue ejo jama ba'a: “E'e, Eyacuiñajjiya miquea mimishi cuijea ca'yonaje”. Mimishi pajea sa po ajjajo ca ca huohuicue jama ba'a: “Eyacuiñajjiya miquea mimishi ecuijea'yojji pojjeama” —Jesosa poanaje.

Jesosa Tomasi nijje miminaje

24 Jesosa ecuana nijje, o shajja'ajjajji cuana nijje jjaja'aqui'yonajejo, Tomasi, Beca Jaa bajjani chama' poanaje. **25** Jamajjeya ecuaaya Tomasi huohui majamajanaje jama ba'a: —E'e jojo nei ecuaaya Jesosa ba'yonaje. ¡Eshe ca coma! — ecuanaa anaje.

Jamatii Tomasiya saja'a canaje jama ba'a: — E'e pojja'a. Chojja, de. Equecuahuejja ojaya eme jjoto huejja cuana ba majje, napa'ajja majje, ojaya emapejje esi' napa'ajja majje pea'ai ecuea eba poaje Jesosa e'e jojo nei eshe —poanaje Tomasi; Jesosa shequi'yo ajja poso acanaje.

²⁶ Quijje me oeje pea beca cahuime, 7 po majje ecuana ma equijo ojee ani o'oyanaje Tomasi nijje pea'ai. Esecue eca'a nequinaje pea'ai. Jamatii Jesosa ecuana nijje jjaja'aqui o'oyanaje. Ecuana nijje mimi o'oyanaje jama ba'a: —¡Quea bei nee nee pocue! —poanaje.

²⁷ Majoya ohuaya Tomasi huohui canaje: — Tomasi, ¡ecuea eme bacue! ¡Eme jjoto equecuahuejja napa'ajjacue eme sisiya! ¡Emapejje esi' pea'ai napa'ajjacue! ¡Bacue eya eshequi'yo e'e jojo nei! ¡A'ya eya edojjoshahua poso ajji! —Jesosa poanaje.

²⁸ —Jesosa, miya ecuea Emeshi Mese nei, Eyacuīñaji —Tomasiya oya bihui canaje.

²⁹ —Tomasi, miya e ba majje jjabahuejjaquinaje eya e'e jojo nei eshequi'yo. Pea cuanaja ba jjima ecuea eme jjoto huejja, emape si' pea'ai. Jamatii oya cuana jjabahuejjaquije ejo, eya eshequi'yo. Jamajjeya ¡oya cuana e'e jojo nei quea bihui nee capoahua! —Jesosa poanaje.

¡Huani etehue'yojo jjabahuejjaquicue!

³⁰ Jesosaa quea huiso pea ma dejjaajjima acani acanaje. Maya ecuanaa, o shajja'ajjajji cuaa banaje. Jamatii eyaya, Huani bajjaniya maya tehue jjima jiquio etehue'yojo. ³¹ Jiquio ecuea etehue'yo eyaya tehueneje miquiana jjabahuejjaquijji. Jamajjeya jiquio etehue'yo ba majje miquianaya

jjabahuejjaquije Jesosa e'e jojo nei Eyacuiñajjija huoojea'yo ojjaña jaahuanajji. Oya Eyacuiñajjija Bacua Ejja nei. E'e, miquianaya majoya e'e jojo nei jjabahuejjaquiajo, Jesosaa miquianaya ba'e tiitii mee caje'yo onijj e eyajo.

21

Jesosa ba ca o'oyanaje ojaya epiejji cuaa me oeje beca huisomeya

¹ Quije ecuana Janinea bae yasijke poqui o'oyanaje. Jomajo Jesosa ecuana nijje, ojaya epiejji cuana nijje jjaja'aqui o'oyanaje. Jama poanaje ba'a: ² Simohui Peno, Tomasi Beca Jaa bajjani nijje, Natanaeni ma Canajo, Janinea meshijo ba'e nijje, ecuanaya Semeneoja bacua ejja eya, ecue o'i Jacobo nijje, pea beca dejja nijje pea'ai bae sahuajo aninaje. Mahuisoya ecuana ojee aninaje. ³ Peno ecuana nijje jama poanaje ba'a: —Eya ca iña poquije'yo nahuoo cuiashajaa.

—E'e, ecuana minijke poquije'yo —saja'ame anaje ecuaa.

Jamajjeya ecuana poqui'yonaje bae sahuajje. Bishe ai yasijke aninaje. Mecajje ecuanaa nahuoo cuiashaja'ajja nequinaje tii tii. Jamatii mecajjeahua jjaja'aqui jjimahuajo nahuoo cuiashaja jjima; chama' poanaje. ⁴ Mecajjeahua nei Jesosa bae sahuajo nequinaje. Jamatii ecuanaja bishejo nequia oya ba jjima poanaje Jesosa. ⁵ Jesosa ecuana huasijke taaanaje jama ba'a: —Epiejji cuana, ¿a'a nahuoo cuiashajanaje miquianaaya? —huohui'ajja acanaje.

—¡Chojja, chama'! —saja'ame ecuaa anaje.

6 —¡Eshajajji jeacue ena huasijje pea mijijje, bishe ebianei mijijje! Jomajo ani nahuoo cuana —Jesosa poanaje.

Jamajjeya ecuaaya eshajajji ebianei mijijje jea majje quea huiso nahuoo cuiashajanaje. Quea biquie nee neejo nahuoo cuana jjequisohua jjima anaje bishe yasijje. **7** Jamajjeya eya Peno nijje jama poanaje ba'a: —Peno, maya Jesosa nequi, e'e nei —eya poanaje.

E shajja'ajja majje Simohui Penohua oja daqui huosho ca'yonaje. (E'e, chacochacoanijo oja daqui ao huijjiajea canaje.) Daqui ao huosho'yo majje tohuaanaje ena huasijje Jesosa que besapoquiya.

8 Eyaya ca ca pea cuana nijje bishe yonaje meshijaji sahua huasijje. Nahuoo dojobesanaje eshajajjijo, enajo ba'e. Meshijaji huesha'ama, iye huesha nei, beshahua nei quea huesha 100 metros huesha nei. **9** Ba'eñaqui majje ecuanaa banaje Jesosaja nahuoo jiñaqui cuaquijo. Pahui yani equemijji pea'ai. **10** Majoya Jesosa ecuana nijje jama poanaje ba'a: —¡Nahuoo cuana miquianaja cuiashaja'yo jja oe jjequicue edahuajji!

11 Jamajjeya Simohui Peno bishe yasijje ani o'oya majje nahuoo cuiashajajji meshijaji yasijje jjequisohua sahua canaje. Majoya pejo majje nahuoo banaje quea huiso nee nee, 153 huisome. Ojjaña quea quemo nee, de. Quea biquie nee. Jamatii eshajajji quecuasejjajea jjima poanaje.

12 Majoya Jesosaa ecuana jama acanaje ba'a: —E'e, ¡poecue! ¡Nahuoo ijjiahua! —ecuana poanaje.

—¡Ocuae! ¡Ca'ijjiahua! —ecuana poanaje. Ecuanaja eba oya Jesosa. Jamajjeya oya huohui'ajja

jjima jama ba'a: —¿Ae bajjani acuae mi so'o? —
ajjima ecuanajaya.

¹³ Majoya Jesosaa pahui cuaqui pejjejo ani
jjeshe majje ecuana quia ca'yonaje e'ijjajji,
nuhuoo pea'ai.

¹⁴ E'e, Jesosa mano'yo majje shequi o'oyanaje.
Oya ecuana huasijke poe'yonaje. Jjeya pea beca
peejjima jjaja'aqui'yome po'yonaje.

Jesosa miminaje Peno nijje

¹⁵ Majoya ecuana ijjiailija majje Jesosa mim-
inaje Peno nijje. Jama poanaje ba'a: —Peno,
Huanija bacua ejja, ¿a'a miyaya eya quea jea nee
nee aña? ¿A'a jiquio pea cuanaja eya quea jea
pishana, miquea eya quea jea nee nee? —Jesosaa
oya huohui'ajja canaje.

—E'e Emeshi Mese, eyaya miya quea jea nee nee
aña. Jamaya miquea eba —Peno poanaje.

—Jamajjeya jecuea epeejji enijke jjeya nei jjapee-
quiani huasijke ecuea esohui huohuicue! Oya
cuana ñajjajjaja ebacua cuana jayojja jama; jamatii
ani poquiquehua chana'.

¹⁶ Majoya Jesosaa oya huohui'ajja ca o'oyanaje
jama ba'a: —Simohui, Huanija bacua ejja, ¿a'a
miyaya eya quea jea nee nee aña? —poanaje.

—E'e, Emeshi Mese, eyaya miya quea jea nee
nee aña. Jamaya miquea eba —Peno po o'oyanaje.

—Jamajjeya jecuea epeejji enijke jjeya nei jjapee-
quiani jaahuanacue! Oya cuana ñajjajjaja ebacua
jayojja jama; ca'a'ama —Jesosa poanaje.

¹⁷ Jesosaa pea beca peejjima huohui'ajjame
acanaje Peno jama ba'a: —Simohui, Huanija

bacua ejja, ¿a'a miyaya eya quea jea nee nee aña?
—po majamajanaje.

Peno quea yeno poanaje Jesosaja pea beca pee-jjima huohui'ajjame acajje. Jamajjeya Penohua Jesosa saja'a canaje jama ba'a: —Emeshi Mese, miquea eba ojjaña. Jamajjeya miquea eba eyaya miya quea jea nee nee aña —Peno poanaje.

—¡Ecuea epeeiji jjeya nei enijje jjapeequiani jaahuanacue! —Jesosaa oya aca o'oyanaje —.

¹⁸ Peno, e'e jojo nei eyaya miya huohuiaña jama poaje ba'a: Miya esho'yahuajo miquea daqui huosho majje cua mi poqui sa poani yasijje miya poquinaje. Quije ca ca miya tii'yajo, me jeyo majje dojo caje cuaa. Ojaya ejjashahuabiqui'yojji jayojja jama miya acaje'yo cuaa —jamaya Jesosa poanaje.

¹⁹ Ojaya ehuohuijo Peno ba mee canaje quijje nei oya manoje'yo eme jeyo. Cuanaya quijje nei Peno mano'yajo, ojjaña ba mee caje'yo Eyacuiñajji quea pame nee nee quea ca'a nee nee poani tii tii. Majoya Jesosaa Peno huohui canaje jama ba'a: —Peno, ¡enijje jjapee neineiquicue! —Jesosa poanaje.

²⁰ Majoya Penohua bajea canaje. Eya, Huani ba canaje o quiquishi poeyani. Yahuajo eya Jesosa pejjejo ijija'ijjianaje, eya ojaya quea jea nee neejo. Ijija'ijjianijo eyaya Jesosa huohui'ajjanaje jama ba'a: “Jesosa, ¿a'ya cuae mi iña meesahuajji epoji?” eyaya anaje. ²¹ Penohua e ba majje Jesosa huohui'ajja canaje: —¿Jesosa, yajja acuae Huani acaje cuaa so'o? —poanaje Peno.

²² Jesosaa Peno saja'a canaje jama ba'a: —Peno, ¿apiojji shai miyaya Huanijo huohui'ajjaña so'o?

E'e pojja'a eyaya Huani ecuea epoe o'oyajjijo ba'e mee sa aña. Jamatii. ¡Miya jja oe enijje jjapee neineiquicue! —Jesosa poanaje.

²³ Jesosaja esohui shajja'ajja majje ojjaña Jesosaja epeejji cuana huasijke huohuiqui canaje cuaa jama ba'a: —Huani ca pa jjaja ca oe mano'yo ajja poaje, de —poso acanaje cuaa.

Jamatii Jesosaja huohui jjima jama ba'a: "Huani emano'yojji pojjeama". Chojja. Ohuaya jama huohui canaje ejo ba'a: "Peno, ¿apiojji acuae miyaya Huanijo huohui'ajjaña so'o? E'e pojja'a eyaya Huani ba'e mee sa aña ecuea epoe o'oyajjijo, jamatii. ¡A'a peajo jjashahuaba majaquijji! ¡Enijje oe jjapee neineiquicue, miya!" poanaje Jesosa Peno nijje.

²⁴ Eya aje oe Huani bajjani Jesosa shajja'ajjajji poani. Ojjaña ecuea etehue'yo Jesosajo e'e jojo nei. Eyaya aje jja oe banaje ojjaña Jesosaa acaninaje cuana. Jamajjeya miquianajaya eba ecuea esohui Jesosajo e'e jojo nei. ²⁵ Jesosaa pea ma dejjaajjima acani quea huiso nee nee acaninaje cuana. Ojjaña ohuaya acaninaje cuana etehue poquia jojjemo quea huiso nee nee pome. Chama' pome papeni etehue'yo huanajji ojjaña meshijo, ca ojjaña Jesosaja esohui etehue poquia jojjemo.

Mahuiso ecuea esohui etehue'yo. Eyaya Huani bajjaniya esohui tehuejeyonaje. Apoa.

cli

Eyacuiñajjija Esohui New Testament in Ese Ejja (BL:ese:Ese Ejja)

copyright © 2012 Wycliffe Bible Translators, Inc.

Language: Ese Ejja

Translation by: Wycliffe Bible Translators, Inc.

Ese Ejja [ese], Bolivia

Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Ese Ejja

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

clii

2014-04-23

PDF generated using Haiola and XeLaTeX on 11 Nov 2022 from source files
dated 29 Jan 2022

88838088-e20d-51ca-8c91-69194f5ae678